

**eInjiri imbu bwakianga**  
**Ruka**  
**waandika yo**

Comité de Traduction de la Bible en Langue Kinyanga

République Démocratique du Congo

L'Evangile de Jésus-Christ selon Luc en Kinyanga

Publié sous le titre

**eInjiri imbu bwakianga Ruka waandika yo**

ISO 639-3: nyj

République Démocratique du Congo

© 2022 Comité de Traduction de la Bible en Langue Kinyanga

Première édition d'essai 2022

En ce qui concerne les illustrations:

Illustration aux pages 66 et 68 par Louise Bass

© The British & Foreign Bible Society, 1994.

Illustration aux pages 4, 10, 15 et 56 par Darwin Dunham

© United Bible Societies, 1989.

Illustration à la page 70 par Horace Knowles

© The British & Foreign Bible Society, 1954, 1967, 1972, 1995.

Illustrations aux pages 7, 9, 11, 12, 19, 29, 31, 32, 35, 41, 54, 62, 64, 75, 78, 82, 83,  
84, 87 et en couverture par Graham Wade © United Bible Societies, 1989.

# Ihano kuri ōngo ng'usomange ekitabo kino

Mu kitabo kino, ukūsungă mo binwa bimă mbi byebwange bumpe kukwinu, buri «kwabesenga» bampe mbu «kwabesanga» abe «nensi» na bampe mbu «nenki», «bushwa mbu» bampe «bushwe mbu», «nge» bampe mbu «ngi»... Nampo usibanga mbu ebiti mbyo nge butumba bw'ekinyanga. Bushwa mbu kusira mwebe ngu webwanga buma mu sankaro siti s'echuo. eKinyanga chaandikwa mbu bwatushéa erufabe rwa cho. Umisumya isoma ekitabo kino, ukūsiba binwa bingi mbi byabesengă bitangasomanga ōngo.

eKinyanga mwebe uma mu myebe y'eBabantu bushwa mbu kírí na binwa mbi bisondange isusana na ntíbyatura mwasi uma itukana n'efwayere. eKinyanga kírí na bikoe binye: kikoe chataya (´), kikoe chahita (˘), kikoe chataya n'ihita (ˆ) nanchi chahita n'itaya (˘). Buna «bibí/bíbi/bíbí», «muronge/murónge», «kúti/kúti, kâni/kăni», «wendanga/wendángă/wéndanga», «Ongo/ōngo», «mwaka/mwăka, kúno/kŭno», twabikira byo mbu mayari.

Mu rufabe rw'eKinyanga murikire mirenge 31: fwayere 7 na konsone 24. Kuri fwayere sibi nsi ntí saandikwa nguru bushwa mbu ito sisusange buri sishasha kuri eBanyanga, ina murisoma ukúteerera mbu /i/ na /u/ sasanguha nakiro mbu saandikwa /i/ na /u/ mu kinwa nchi kisirá mo iyari.

Kinsi kinwa kírí n'ekiteerere ch'enkekeni () chashea mbu ekinwa ncho chansonsomorwa hende n'ekitabo kino. Na kinsi binwa birikire mu [...], ngerieba mbu emukororo ngo usira mu bitabo bimă bya karekare by'eBibiria. Nampi hasesunga ōngo emitiro a, b, c, ngerieba mbu ekinwa chansonsorwa hisikwa n'ekaratasi nki kasomange ōngo.

Muribundura ekitabo kino cha Ruka mu Kinyanga, twabeseyo tukoreshange eBibiria y'eKikiriki hima na Bibiria bya impě myebe. Twabeseyo tukoreshange na bitabo mbi byiturángé emyasi y'eBibiria. Twakoreshayo hotu na impě mirimo nji yaronjiwanga karekare n'ebikembe mbi byabuchángă ibundura eBibiria mu mwebe w'eKinyanga. Ebikembe bya Seed Company na SIL-ECG hima-hima na Banyanga bingi nge bakutusakenga muribindura ekitabo kino cha Ruka mu Kinyanga.

**Ebabunduri b'eBibiria mu Kinyanga**



# eInjiri imbu bwakianga Ruka waandika yo

## Ntangiro

eInjiri imbu bwakianga Ruka waandika yo, iyo kitabo kimã mu bitabo binye byaroso munkati n'eRirai Rishasha imbi byatura ebuingo bwa Yesu n'ebinwa biti mbi byakoranga we. Mu bitabo binye mbyo, kira kima chabikirwa mbu «Injiri», nge rieba mbu «Mwasi Wakonda». Ebitabo mbyo byaandikwángá kuruma n'erikwa ra Yesu.

Matayo, Mariko, Ruka na Yohana nge baandikanga ebitabo mbyo. Ruka ntw'aandikanga ho bushwa n'ebuingo bwa Yesu n'ebinwa mbi byakoranga we, ina waandikanga hotu ekitabo ch'emeta abi inchi chabikirwa mbu «Mikorere y'esantumwa». Ekitabo ncho chatura ebinwa mbi byakoranga ebanafunsi ba Yesu kuruma n'erikwa n'erifuka, n'erikuruka ra Yesu mu mbingu.

Kusira mwea wosi shu ematu ngi aandikwanga eInjiri ino ya Ruka, abe impi haandikirénga we yo. Ina basomi bingi basimirana mbu yaandikwanga buna mu mwaka we 70 kuruma n'eribútwá ra Yesu Kirisitu.

Ruka nge mwandiki w'eInjiri ino, wabesenga hotu munganga (Bakorosai 4.14). Eburenga bw'erieba rae emwebe kumunda n'ekitabo kino bwashéá mbu Ruka wabesenga wasoma masomo a kwiyo nguru.

Ruka wahunanga iandika shŭ-shŭ ebinwa bushwa n'ebuingo bwa Yesu n'ebinwa mbi byakoranga we n'ieba mbu bwetángá byo kongo bampe bakasanirwa murisoma byo (Ruka 1.1-3). Ruka ntí wabesenga Muyuta, ina waandikanga imbu bwamukíá enti Muyuta wamukochá irukira. Ekinwa ncho chasungwa shŭ-shŭ mu ntambi nji iturange we ekutime y'eBayuta (Ruka 1.8).

eInjiri imbu bwakíánga Ruka waandika yo, iyo kitabo chasusana n'ebitabo bya Matayo na Mariko imbu bukiange ebitabo bino byatura ebinwa mu inse sasusana, nakiro mbu byarengana kakeke.

Mu bitabo bino binye, ekitabo cha Ruka chisine ngi chatura nguru emyasi y'eribútwá ra Yohana Mubatisai. Ruka wisimike nguru mu binwa mbi byakae emusasiro (Ruka 3.3; 11.4; 17.3-4; 23.34) nambi byeba bushwa n'emahemo (Ruka 3.21; 5.16; 6.12; 11.1-12; 22.32).

## Emutondeko w'ebinwa

1. Entangiro n'echasingwa eInjiri ino yaandikwa ..... 1.1-4
  2. Emyasi y'eribútwá ra Yesu n'ematarisho emurimo wae ..... 1.5—4.13
  3. Emahano a Yesu n'ebishisharo byae ..... 4.14—21.38
  4. Erikwa, erifúka n'erikuruka ra Yesu mu mbingu ..... 22.1—24.53
- 

## Ntangiro y'emyasi ya Yesu Kirisitu

**1** <sup>1</sup>Emukwakare Teofire, bea bingi bakwereká iandika emyasi y'ebinwa byetángá munkati nitu. <sup>2</sup>Bakuandika yo ímbu bwaturirwanga bate yo nãmbi barukirangá yo raroso, na nge baninkwangá emurimo weritura emwasi wa Ongo. <sup>3</sup>Ngyasingwa nani hotu nakúkianga namasibirira emwasi shŭ-shŭ, nasungá nti rakomenwa nikuandikiri óngo mukwakare Teofire. <sup>4</sup>Namaronja mbo kongo usiba eríra r'ebinwa byahanwangá óngo.

## Maraika waturá ebusebutwa Yohana

<sup>5</sup>Mu matu abesenga Herote mubake w'echuo cha ku Yundeá, kwabesenga kuhani\* umă nt'ubikirwange mbu Sakaria, wa mu kikembe ch'ebakuhani ba Abiya<sup>a</sup> na mukari Risabeti nti wa mu ruanda rw'ekuhani mukiri Aroni. <sup>6</sup>Ebati bábí babesenga bea baombokara mu makako a Ongo. Babesenga nti bamísá shu emyomba n'emiko iti ya Nyere kuritu. <sup>7</sup>Ina nti basiră mwana, bushwa mbu Risabeti nti ngumba nabo bábí nti bamakunguha nguru. <sup>8</sup>Otu rumă, Sakaria wabesenga ukorange emurimo wae mu makako a Ongo, bushwa mbu erotu ndo rwabesenga ukóro rw'ekikembe chábó. <sup>9</sup>Itukana n'emwenjo w'ebakuhani, Sakaria ngwárondorwa mu mishari mu rikime mu Numba ya Ongo\* isacha mo emwaka. <sup>10</sup>Mu ntambi Sakaria wabesenga usachange emwaka, ebea bati basia habutara bahemange. <sup>11</sup>Nampo maraika\* wa Nyere kuritu wásaire Sakaria, wásimana mu ruharo rw'ekwabume rw'ebutanda bw'erisachie emwaka. <sup>12</sup>Sakaria, mu rimusúnga wísarima, wátangirwa na böba. <sup>13</sup>Ina emaraika wámwire mbu: «Sakaria, angisubaha, Ongo wamarukira emahemo abe. Mukari wabe Risabeti wasekubute mwana wabume na ukûmuninkă rina ra Yohana. <sup>14</sup>Ukûbésě na ngoa hima n'imoa ringi, na bea bingi basemoere eribútwá rae. <sup>15</sup>Bushwa mbu wasebese mukwakare mu makako a Nyere kuritu. Watômuyo ndifai\* abe mau ati-ati. Waserisayo Mutima Washurukara

---

<sup>a</sup> 1.5 Abiya wabesenga mukwakare wa meta munani mu kikembe ch'ekuhani Sakaria. Soma 1Biranga 24.7-18.

itukire mu bura bwa nina. <sup>16</sup>Wasekuruchayo bingi b'ebana ba Isiraeri kuri Ongo wábó. <sup>17</sup>Wasesondore erieya ra Nyere kuritu na nti uri n'emutima hima n'ema buri emutahwa Eria, kongo waronganya tu ebana na bishe bábó. Wasebutwa hotu kongo wabindura ebakwemi ebatinangã ebinwa bya Ongo,<sup>b</sup> kongo bábése na bwenge buri bea bakomenwa mu makako a Ongo. Nampo wasetunganyieyo Nyere kuritu uanda rwakonda indu rwámurindirá.»

<sup>18</sup>Ina Sakaria wáshísha emaraika\* mbu: «Kinki chashenisheayo mbu ebinwa bino by'íira? Bushwa mbu ani na mukari'ani twamakunguha nguru.» <sup>19</sup>Maraika wámusako mbu: «Ani nge Kaburieri,<sup>ch</sup> ani nge nisimananga mu makako a Ongo! Iwe ngwanitámá ikutúre emwasi uno wakonda. <sup>20</sup>Ebinwa mbyo biseberererayo mu matu abyo, ina bushwa mbu nt'ukusimira byo, ukúbésě karumbu. Utukochiyo ieba ieya n'erotu indu rusekiayo ebinwa bino byabererera.»

<sup>21</sup>Mu ntambi njo, ebea mbi babesenga barindira Sakaria hambuka bashishara bushwa n'erísía rawe mu Numba ya Ongo\*. <sup>22</sup>Warekia wasaa mo, wafundwa ieba nabo. Ina bushwa mbu iwe ngie karumbu, wabucha ieba nabo na mine, basiba mbu wakusunga kiasha kumunda n'eNumba ya Ongo.

<sup>23</sup>N'ematú a Sakaria erikora arekia ásira, wákuruka kukwae. <sup>24</sup>Kuruma na matu makeke, mukari Risabeti wabese murito. Wámana myéri isanu ntwasasaa-saanga ekumbuka, ntwebange mbu: <sup>25</sup>«Mukai byakonda ebyamanikore Nyere kuritu! Wamanikuto nkene munkati n'eměso ebea.»

### Maraika waturá ebusebutwa Yesu

<sup>26</sup>Ebukure bwa Risabeti bwarekia bwarengekã myéri mutuba, Ongo watúma maraika\* Kaburieri ku Nasareti, ubungu rumã rwa ku Ngariraya. <sup>27</sup>Wámútúma kuri kitasa kimã nge Maria. Ekitasa ncho chabesenga nti nge muchúmba wa Yosefu, mushúkíra umã w'ekisasa ch'emubake Ndauti. <sup>28</sup>Emaraika ngo wéyere Maria mu mwabo n'imwire mbu: «Nakukea, óngo urishée nchumo ya Ongo! Nyere kuritu uri hima nabe.»

<sup>29</sup>Maria wáshishara mu kinwa ncho, waanikira mu mutima wae mbu: «Nkei ya buni ino?» <sup>30</sup>Maraika\* wámwire mbu: «Usubahi, eMaria, bushwa mbu umashée nchumo kwa Ongo. <sup>31</sup>Ukúriá bukure, ukúbutã mwana wabume, na ukúmuninkã rina nge Yesu. <sup>32</sup>Wasebese mukwakare, wábikirwa Mwana wa Ongo íngu uri hiyo n'ebítí. Nyere kuritu Ongo wasemuninkayo ekitumbi ch'ishiku Ndauti. <sup>33</sup>Iwe nge usesimanireyo ebea ba ku Isiraeri ematu ati, n'ebwami bwae butabesiyo na gendero.» <sup>34</sup>Maria wáshísha

<sup>b</sup> 1.17 Soma Maraki 3.23-24. <sup>ch</sup> 1.19 Soma Ndanyere 8.16; 9.21; Ruka 1.26.

emaraika mbu: «Ekinwa kino chasebese buni na ntínosi wabume?»  
**35** Emaraike wámusako mbu: «eMutima Washurukara usekuhite, n'ema a Ongo íngu ùri hiyo n'ebítí asekubumbe buri kirumbirumbi. Ngyasingwa, emwana wasebuta óngo wasebese Washurukara, wasebikirwa mbu Mwana wa Ongo. **36** Rukira! Risabeti w'eruanda rwabe nae ngié murito, wasebuta mwana wabume nakiro mbu wamakunguha nguru. Iwe ngu wabeseyo ubikirwange mbu ngumba ngié ùri na bukure bwa myëri mutuba. **37** Bushwa mbu kusira kinwa kihundusangá Ongo.»



*Emaraika wasaire Maria (1.28)*

**38** Nampo Maria wéba mbu: «Ani mukobe wa Nyere kuritu, kai bibesí ímbu bwameba óngo!» Kuruma nampo, maraika wênda rae.

### **Maria wendá katangura Risabeti**

**39** Mu matu a, Maria wásimana n'ienda tete mu chuo ch'esangu, mu rubungu rumá rwa ku Yundea. **40** Wákime mwa Sakaria n'ikea Risabeti. **41** Entambi Risabeti warukiranga enkei ya Maria, emwana witenja-tenja mu bura bwa Risabeti, nampo warísíwa n'eMutima Washurukara. **42** Wéba mu murenge mukiri mbu: «Ongo wamakukasane irénga ebamína bati, n'emwana wasebuta óngo nae hotu wakasanírwá! **43** Ani inyé murihierwa na nina wa Nyere kuritu mu mwani? **44** Bushwa nákkukía narukira emurenge w'enkei yabe mu mate áni, emwana witenja-tenja na ngoa kumunda n'ebura bwani. **45** Ukasánirwa óngo bushwa umárisíá mbu ebinwa byakweba Nyere kuritu bisebererera!»

### **Erumbo rwa Maria**

**46** Ngerikia Maria wéba mbu:

«Emutima wani wátatirisá Nyere kuritu,

**47** Namoere Ongo,  
 Muramya wani;

**48** Bushwa wamanikwire bonso ani mukori wae.

Mu riíra, itukire enompena, ebea bati basembikira mbu nakasanirwa,

**49** bushwa mbu Ongo Miné Maa wamanikore binwa bikíri.



Erina rae rashurukara ho!

<sup>50</sup> Na wasenda ukwírengi bonso  
ebámusubaha b'esankiso siti.

<sup>51</sup> Wamakoresha emaa ae mu rikoresha ebunkangwe bw'emömbó wae,  
wamansansabanya ebari n'emutima w'engári.

<sup>52</sup> Wamakuto ebami mu bitumbi byábó,  
n'itúmbía ebihoea.<sup>e</sup>

<sup>53</sup> Wákusukucha ebakwa rwaka,  
ina wákukurucha ebatúmbá kobokobo.

<sup>54</sup> Wakweya kásake emukori wae Isiraeri  
na ntí waköbya imukwire bonso,

<sup>55</sup> ímbu bwarananga we na batitanku bitu, ietere  
kuri Ibrahimu n'erubuto rwae ematu ati.»

<sup>56</sup> Maria wámana kwa Risabeti myëri ishatsu, kuruma nampo wákuruka  
ku kwábó.

### Eribútwa ra Yohana Mubatisai

<sup>57</sup> Entambi ya Risabeti y'eribúta yakia yarumirá, wabuta mwana wabume.  
<sup>58</sup> Ebanunsane na banachabo, barekia barukirá bwakukwíré Nyere kuritu  
Risabeti bonso, bamoá hima nae. <sup>59</sup> Kuruma na matu munani, banachabo  
bêya kamonesha<sup>f</sup> emwana. Bahuna imuninka erina r'ishe Sakaria. <sup>60</sup> Ina  
nina wátina mbu: «Ntí mbo, erina rae nge Yohana.» <sup>61</sup> Bamwíre mbu: «Ina  
kusira mwea mu ruanda rwabe uri n'erina ndo!»

<sup>62</sup> Basime ishe w'emwana mu rimushisha watikú erina rashimae kuri  
emwana e. <sup>63</sup> Sakaria wakonga bo kisaí, na waandika mu cho mbu: «Erina  
rae nge Yohana.» Ebati bisarima. <sup>64</sup> Hiha-hiha ebunu bwa Sakaria bwoboka,  
wabucha tu ieba n'itata Ongo. <sup>65</sup> Ebea bati imbi babesenga nko batingirwa  
na böba. Emwasi ngo wánsansabana mu sángu siti s'echuo cha ku Yundea.  
<sup>66</sup> Ebati mbi bárúkírángá emwasi ngo bâníkira na kwishishirisha mu  
mitima mbu: «Emwana uno wábeseyo buni?» Bushwa, mu riíra, emaa a  
Nyere kuritu abesenga hima nae.

### Erumbo rwa Sakaria

<sup>67</sup> Sakaria ishe w'emwana warísíwa n'eMutima Washurukara, n'ibucha  
ihurukwa, n'ieba mbu:

<sup>68</sup> «Watatwe Nyere kuritu, Ongo wa Baisiraeri,  
bushwa mbu wamasake ebea bae n'ishukaya bo.

<sup>e</sup> 1.52 Soma Yubu 5.11; 12.19. <sup>f</sup> 1.59 Soma Barawi 12.3.

- 69 Wamaturishie Rukombora miné bunkangwe,  
itukire mu ruanda rw'emukori wae Ndauti.
- 70 Nge bwebángá we karekare mu mǎnũ ebatahwa\* bae bashurukara mbu  
71 wasetutúmireyo íngũ usetushukayayo mu mine y'ebarenda bitu  
na mu mine yambi ebatubaangǎ.
- 72 Waraangá mbu wasekwireyo batitanku bitu bonso;  
n'isubukia erirai rae rashurukara,  
73 nge chaserenga we kuri titanku witu Iburahimu mbu  
74 wasetushukaya mu mine y'ebarenda bitu,  
kongo twamukore na nti tusira böba,  
75 na tushurukare n'ibese n'iombokara mu makako ae  
ematu itu ati.<sup>h</sup>
- 76 N'ongo, mwanani, ukubikirwǎ mutahwa\* wa Ongo íngũ uri hiyo  
n'ebítĩ,  
bushwa ukúsondorě Nyere kuritu mu rimutunganyie ênse,  
77 na kongo usubukia ebea bae mbu waseshukaya bo  
n'isasira esansambi sǎbó.
- 78 Íra, Ongo witu urisere nchime na burongu,  
waturebeki chaka ituka ko kwiyo.
- 79 Washéí bo chaka imbi barerika mu mwirimya n'ebahendwange  
n'eroku,  
kongo watushéa imisa ense y'ebuhoro.»
- 80 Emwana ngo wabesenga woshukange na maa emutima. Wênda karika  
ínkũ ekusira bea ieya n'erotu rw'ishéangá we kuri Baisiraeri.

### Eribátwa ra Yesu

(Matayo 1.18-25)

**2** <sup>1</sup>Mu biranga mbyo, Kaisari<sup>a</sup> Okisito wa ku Roma wakuto momba mbu baanse ebea b'ebyuo biti byasimanire we. <sup>2</sup>Emwanso ngo nge waroso waronjiwanga, mu matu Kurenio nti nge wasimanire echuo cha ku Suria. <sup>3</sup>Ebea bati bēnda kiandikisha kira mwea mu rubungu rwae rw'ebubutwa. <sup>4</sup>Yosefu nae wátuka mu rubungu rwa ku Nasareti, mu chuo cha ku Ngariraya, n'ienda mu chuo cha ku Yunde mu rubungu rw'emubake Ndauti, erubikirwange mbu Beterehemu. Wendángá nko bushwa wabesenga umǎ mu bǎna b'eruanda rwa Ndauti. <sup>5</sup>Wênda kiandikisha nko hima na Maria muchúmba wae, na nti murito. <sup>6</sup>Barekia

<sup>h</sup> 1.75 Soma Ntangiyo 22.16-17. <sup>a</sup> 2.1 *Kaisari*: Rina ra kinsi mwami wasimanirenga echuo cha ku Roma.

báří ku Beterehemu, ematu ae erikwikokora árumira. <sup>7</sup>Wabuta mwana, entangi yae. Wamubumbe byeri n'imuraamya mu muringa w'eririshié esanyama, bushwa bárúkwángá buari mu nkambi y'ebeni.

### **Maraika wasáíré ebasumba**

<sup>8</sup>Na mu chuo ncho, kwabesenga basumba mu michacha nti barangangã ebituana byábó mutu. <sup>9</sup>Maraika\* wa Nyere kuritu wásaíre bo nsisu, na chaka ch'ebusime bwa Nyere kuritu chabumbe bo. Nabo basubaha nguru. <sup>10</sup>Ina emaraika wére bo mbu: «Anga musubaha, bushwa naburishie Mwasi Wakonda eusekokomya nguru ebea bati. <sup>11</sup>Runotu runo Rukombora wamabutwa bushwa banu mu rubungu rwa Ndauti, iwe nge Kirisitu\* na nge tu Nyere kuritu. <sup>12</sup>Na mukûmuteerera buno: mukûkumana ekabonsobonso kabumbírwa mu byeri na nti kekinde kumunda n'emuringa w'eririshié ebituana.»



*Emaraika wasáíré ebasumba (2.9)*

<sup>13</sup>Nampo hasúngwa kikembe kikiri cha bamaraika\* ituka mu mbingu, bákúmána emaraika ngo, nti batatange Ongo n'ieba mbu:

<sup>14</sup>«Ongo watatwe mu mbingu,  
na buhóro mu chuo kuri ebea mbi ebashima we.»

### **Ebasumba benda ku Beterehemu**

<sup>15</sup>Ebamaraika\* barekia bamakuruka mu mbingu, ebasumba babucha ierane mbu: «Eo, twëndí ku Beterehemu kongo twasunga echakusaa ko, inchi echakutwire Nyere kuritu.» <sup>16</sup>Nge bumbo, benda tete, bákúmána

Maria na Yosefu, n'emwana wikinde mu muringa w'eririshie mo ebituana. <sup>17</sup>Barekia bamasunga ekabonsobonso, batura emyasi nji yakianga emaraika wére bo bushwa n'emwana ngo. <sup>18</sup>Ebea bati mbi bárúkirángá emwasi ngo ewaturanga ebasumba, bashishara. <sup>19</sup>Ina Maria iwe, warangángá ebinwa biti mbyo kumunda n'emutima wae n'ianikira mu byo nguru. <sup>20</sup>Nampo, ebasumba bákúruka nti batatange Ongo n'imumoe bushwa n'ebinwa biti ebyarukiranga bo n'ebyamasungá bo, bushwa mbu ebiti byakweta ímbu ebwaturirwanga bo byo n'emaraika.

### Emwana waninkwa rina ra Yesu

<sup>21</sup>Emwana warekia wamarúmisha matu munani wabutwa, bámumónéshe.<sup>b</sup> Bámunínka rina mbu nge Yesu. Erina ndo nge raninkwanga we n'emaraika\*, nina nti tínensi murito.

### Yesu washeiwa mu Numba ya Ongo

<sup>22</sup>Ematu erihoswa<sup>ch</sup> ra Maria na Yosefu akia arumirá, itukana n'ebweba emyomba ya Musa, benda n'emwana ku Yerusaremu kongo bámunínkana kuri Nyere kuritu. <sup>23</sup>Bushwa raandikwa mu Myomba ya Nyere kuritu mbu: «Kinsi ntangi ya muyu iseninkanwayo kwa Nyere kuritu.»<sup>e</sup> <sup>24</sup>Basibura tumpite tábí na byana bíbí bya pisho ímbu bweba emyomba ya Nyere kuritu.

### Ebutahwa bwa Simioni

<sup>25</sup>Mu matu ngo, ku Yerusaremu kwarikanga mwea umă wabikirwá mbu Simioni. Emwea ngo wabesenga waombokara na ntwasubaha Ongo. Wabesenga urindirengi na mbusha y'erisunga erishukara ra Baisiraeri. eMutima Washurukara nti uri hima nae, <sup>26</sup>wabesenga wamamushea mbu iwe watákwi kuba nensi ntí wasungá Kirisitu\* íngu usetúmwayo na Nyere kuritu. <sup>27</sup>Simioni wénjiwa n'eMutima Washurukara mu Numba ya Ongo\*. Ebabuti ba Yesu bámurisha mo kongo bámuronjee ímbu bweba eMyomba. <sup>28</sup>Simioni wángirira emwana Yesu mu mine, watata Ongo, wéba mbu:

<sup>29</sup>«Eo ke Nyere kuritu,  
umabereresha ebwaraanga óngo,  
ngíe umanireké ani mukori wabe  
nikwe rani mu buhóro,

<sup>30</sup>bushwa namisungire ani kisine emuramya watuká kuri óngo,

<sup>b</sup> 2.21 Bayuta babesenga bamoneshangá emwana w'emuyu erotu rw'emunani wabutwa. <sup>ch</sup> 2.22 Soma Barawi 12.1-8. <sup>e</sup> 2.23 Soma Ituka 13.2.

31 íngu watayarishanga òngo mu makako ebea bati,

32 na ngo Muramya ng'usebeseyo echaka ch'ebuyo, nae ngwaserishayo ebusime mu bea babe Baisiraeri.»

33 Mu rirukira ebinwa mbyo ebyebange Simioni bushwa n'emwana, ebuti ba Yesu bashishara. 34 Simioni wakasane bo, wére Maria, nina w'emwana mbu: «Emwana uno wamabutwa kongo wakíría n'isimanya bea bingi ku Isiraeri. Wasebese kiteerere chatuka kwa Ongo ekisetinwa n'bea, 35 kongo emihaki y'ebea bingi eyarebiswa itabukaré. Na òngo Maria, ukûrukirayo bwae buri mwea wasoswá itumo mu mutima.»



*Simioni waangirira Yesu (2.28)*

### Emutahwa Ana

36 Kwabesenga mutahwa\* umă mămína, erina rae Ana, kikumí cha Fanueri, w'eruanda rwa Aseri. Wabesenga nti wamakunguha nguru. Warikanga na moke myăka irínda ho itukire babingana. 37 Kuruma nampo, wámana myăka makumi munani na inye mu bushumbakari. Wárika mu Numba ya Ongo\* nti umukorengi mutu na mumwishi, nt'urekenga ebió na nti uhemange. 38 Wêya mu ntambi njo, wabucha itata Ongo. Wátura emyasi y'emwana kuri ebea bati e babesenga barindirengi ímbu busekiayo Ongo washukaya ebea ba ku Yerusaremu.

### Ebuti ba Yesu bakuruká ku Nasareti

39 Ebuti ba Yesu barekia bamakinda ironja ímbu bweba eMyomba ya Nyere kuritu, bakuruka hima nae mu chuo cha ku Ngariraya, mu rubungu rwabo rwa ku Nasareti.

40 Emwana ngo wabesenga woshukange n'ibese na maa, nti urisere butésá, n'enchumo ya Ongo yabesénga hima nae.

### Yesu mu Numba ya Ongo

41 Kira mwăka, ebuti ba Yesu nti bendangá ku Yerusaremu mu rotu rukiri rw'ePasaka\*.

<sup>42</sup> Yesu warekia wabese na myăka ikúmi na ibi, wênda hima nabo ekunkumanano y'erotu rukiri itukana n'emwenjo w'eBayuta<sup>f</sup>. <sup>43</sup> Ematu ePasaka arekia ameta, bákúrúka ku kwabo, ina emwana Yesu iwe wasia ku Yerusaremu n'ebabuti bae nti tíbósi. <sup>44</sup> Babesenga bânikirange mbu kúti uri hima nămbi ebendanga nabo. Barekia baměnda uendo rw'otu rumă, babucha imusondekanyie kuri banachabo na kuri mbi bamosi. <sup>45</sup> Ina bushwa ntí bamusungángá, bákuruka tu ku Yerusaremu nti bamusondekanyange. <sup>46</sup> Kuruma na matu ashatu, bāmukúmána mu Numba ya Ongó\*, ntwarika munkati n'ebahani b'eMyomba, nti urukirange bo n'ishisha bo binwa. <sup>47</sup> N'ebati mbi bāmurúkírángá bashishara mu risúnga ebwenge bwae n'emisubyo yae. <sup>48</sup> Ebabuti bae barekia bamamusunga, bashishara nguru. Nina wamushisha mbu: «Emwana'ni, bushwa nki utukóré biri buno? Ani na iso twamakusonda na nti twatingirwa na koha.» <sup>49</sup> Yesu wásako bo mbu: «Banu munisonderengi inki? Nti banu mosi rero mbu rakomenwa nibesi mu numba ya Tita?» <sup>50</sup> Ina batateereri ekinwa ncho chakianga wére bo.

<sup>51</sup> Ngerikia ke Yesu wákuruka hima nabo ku Nasareti, wênderana irúkire bo. Nina wabesenga nt'usubukianga ebinwa biti mbyo kumunda n'emutima wae. <sup>52</sup> Yesu wênderana ibese na butésá, nti woshukange n'ikokomya Ongó hima n'ebesa.



*Emwana Yesu usishanange ebakwakare  
binwa mu Numba ya Ongó (2.46)*

<sup>f</sup> 2.42 EkuBayuta, emwana wamarúmisha myăka ikumi na ibi, nti tí mwana tu. Nge rieba mbu ngíe wamukomenwă ieya hari ebamakunguhe mu binwa bya Ongó.

## Emahubiri a Yohana Mubatisai

(Matayo 3.1-12; Mariko 1.1-8; Yohana 1.19-28)

**3** <sup>1</sup>Mu mwāka w'erikumi n'isanu w'ebwami bwa Tiberio mubake wa ku Roma, ebakorangá nae nge bano: Ponso Pirato nti nge wasimanire echuo cha ku Yundeia, na Herote nti nge wasimanire ku Ngariraya, na musike wábó Firipo nti wasimanire echuo cha ku Iturea na cha ku Tarakoniti. Risania nae ntwasimanire echuo cha ku Abirene. <sup>2</sup>Anasi bána

Kayafa nabo babesenga nti nge bakuhani bakíri\*. Mu matu ngo, Ongo wanínka Yohana musike wa Sakaria ekinwa chae nti ɔri munkati n'ebweru.

<sup>3</sup>Yohana wetana mu byuo biti bya mwendende erusi Yorondani, nti uhubiringi eMwasi Wakonda. Wére ebea mbu: «Múbunduké kongo mureke esansambi sinu, mubatiswe, na Ongo wasebusasira.» <sup>4</sup>Nge bumbo, ebinwa byabererera ebyaandikanga mutahwa\* Isaya mu kitabo chae mbu:



Yohana uhubiringi ebea (3.3)

«Murenge wa mwea ukuange mu bweru mbu:

«Mutunganyanye ense ya Nyere kuritu, muombore ekusetayo we!

<sup>5</sup> Kira mpúkú isebumbirwa.

Kira ntata na kira ou biserengechiwa.

Esanse saomba-omba siseomborwayo, n'esânse s'ebiribu sisebumbirwayo.

<sup>6</sup> Kira mwea wasungi ímbu búkianga Ongo washukaya.»»

<sup>7</sup>Nampo bea bingi beyerengá Yohana wabatise bo. Nae wére bo mbu: «Banu mɔri bɔri nsoka! Banu muhakange mbu mumakocha ibeka ebusubuke bwa Ongo ímbu bweyange? <sup>8</sup>Kai mwendi mushea mu mikorere mbu mumabunduka mwireke esansambi sinu. Kiro mwendi mwitata ho mbu Iburahimu nge titanku winu. Nibwiringi mbu Ongo wamúkocha ibundura emakoi ano abesi bána ba Iburahimu! <sup>9</sup>N'enompena, emwandá

ngié uri hitina n'emítí. Kira mutí íngu ntwabútá byuma byakonda usekerwa n'itawa munkati n'ekashá.»

<sup>10</sup>Ngerikia ke ebea bamushisha mbu: «Túkié ke buni?» <sup>11</sup>Nae wásako bo mbu: «Kinsi ngu uri na nchangi sibi waninkane nima kuri íngu usira kikai, nāngu uri na bió nae wakié hotu būbo.» <sup>12</sup>Batuanyi ba horo nabo bamwiyere hotu kongo wabatisa bo. Bamushisha mbu: «eMuhani, túkié buni?» <sup>13</sup>Na Yohana mbu: «Kiro mwendi banu mutáríkange bimpe hiyo nāmbi byakongwa mu mituro.»

<sup>14</sup>Ebasura nabo bamushisha mbu: «Na bate túkié buni?» Nae wásako bo mbu: «Kiro mwendi muronja bukongobanya mu mwea uti-uti abe imuhambike kinwa, ina mwendi mumoere ebihembo byinu.»


<sup>15</sup>Ebea babesenga barindirengi erieya ra Kirisitu\*, n'ebati báanikira mbu kúti ke Yohana nge iwe. <sup>16</sup>Nampo, Yohana wére bo mbu: «Ani nabubatisa mu mecha, ina íngu weyange kuruma nani uri na maa inirenga. Kasa nani ntí nakomenwa iobora n'emirí y'ebirato byae. Iwe usebubatisa mu Mutima Washurukara na mu kashá. <sup>17</sup>Watíngé rweri mu mine yae mwifufura engáno. Usekumanyányá engáno n'iranga yo mu mwiso wae, ina waseshiká ebifufuru mu kashá inki katarimanga.»

<sup>18</sup>Yohana wabesenga uturengi ebea mbo eMwasi Wakonda n'ininka bo mahano mingi. <sup>19</sup>Emubake Herote wábinga Herotia mukari wa Firipo musikyabo. Wákora hotu bimpe bibí bingi. Bushwa nāmbyo, Yohana wamufine. <sup>20</sup>Ina Herote watáríka tu kímpě kibi mwitáa Yohana mu mwiyóróró.

### Eribatiswa ra Yesu

(Matayo 3.13-17; Mariko 1.9-11)

<sup>21</sup>Ebea bati mbo barekia bamabatiswa, Yesu nae wabatiswa. Warekia uhemange, embingu yóboka, <sup>22</sup>eMutima Washurukara wahite hiyo nae kimubi buri pisho. Na murenge warukírwa ituka mu mbingu wéba mbu: «Ōngo nge musike wani kitwana chani, nakushima nguru.»



Yohana wabatisa Yesu (3.22)



**Ekisasa cha Yesu**

*(Matayo 1.1-17)*

23 Yesu warekia wabucha emurimo wae, wabesenga nti uri na myäka buna makumi ashatu. Ebea babesenga bahakange mbu Yesu musike wa Yosefu.

Yosefu wabesenga nti musike wa Heri,

24 na Heri wabesenga nti musike wa Matati,  
na Matati wabesenga nti musike wa Rawi,  
na Rawi wabesenga nti musike wa Mereki,  
na Mereki wabesenga nti musike wa Yana,  
na Yana wabesenga nti musike wa Yosefu.

25 Na Yosefu wabesenga nti musike wa Matatia,  
na Matatia wabesenga nti musike wa Amosi,  
na Amosi wabesenga nti musike wa Nahumu,  
na Nahumu wabesenga nti musike wa Esiri,  
na Esiri wabesenga nti musike wa Nake,

26 na Nake wabesenga nti musike wa Mati,  
na Mati wabesenga nti musike wa Matatia  
na Matatia wabesenga nti musike wa Simei,  
na Simei wabesenga nti musike wa Yoseki  
na Yoseki wabesenga nti musike wa Yota.

27 Na Yota wabesenga nti musike wa Yoanani,  
na Yoanani wabesenga nti musike wa Resa,  
na Resa wabesenga nti musike wa Serubaberi,  
na Serubaberi wabesenga nti musike wa Saratieri,  
na Saratieri wabesenga nti musike wa Neri,  
na Neri wabesenga nti

28 musike wa Mereki,  
na Mereki wabesenga nti musike wa Ati,  
na Ati wabesenga nti musike wa Kosamu,  
na Kosamu wabesenga nti musike wa Erimatamu,  
na Erimatamu wabesenga nti musike wa Eri.

29 Na Eri wabesenga nti musike wa Yeshua,  
na Yeshua wabesenga nti musike wa Erieseri,  
na Erieseri wabesenga nti musike wa Yorimu,  
na Yorimu wabesenga nti musike wa Matati,  
na Matati wabesenga nti musike wa Rawi.

30 Na Rawi wabesenga nti musike wa Simioni,

- na Simioni wabesenga nti musike wa Yuta,  
na Yuta wabesenga nti musike wa Yosefu,  
na Yosefu wabesenga nti musike wa Yonamu,  
na Yonamu wabesenga nti musike wa Eriakimu.
- 31 Na Eriakimu wabesenga nti musike wa Merea  
na Merea wabesenga nti musike wa Mena,  
na Mena wabesenga nti musike wa Matata,  
na Matata wabesenga nti musike wa Natani,  
na Natani wabesenga nti musike wa Ndauti.
- 32 Na Ndauti wabesenga nti musike wa Yese  
na Yese wabesenga nti musike wa Obeti,  
na Obeti wabesenga nti musike wa Buasi,  
na Buasi wabesenga nti musike wa Sarumoni,  
na Sarumoni wabesenga nti musike wa Nasoni.
- 33 Na Nasoni wabesenga nti musike wa Aminatabu  
na Aminatabu wabesenga nti musike wa Atimini,  
na Atimini wabesenga nti musike wa Ramu,  
na Ramu wabesenga nti musike wa Esironi,  
na Esironi wabesenga nti musike wa Peresi,  
na Peresi wabesenga nti musike wa Yuta.
- 34 Na Yuta wabesenga nti musike wa Yakobo  
na Yakobo wabesenga nti musike wa Isake,  
na Isake wabesenga nti musike wa Iburahimu  
na Iburahimu wabesenga nti musike wa Tera  
na Tera wabesenga nti musike wa Nahori.
- 35 Na Nahori wabesenga nti musike wa Serungu,  
Serungu wabesenga nti musike wa Reu  
na Reu wabesenga nti musike wa Perengi,  
na Perengi wabesenga nti musike wa Eberi,  
na Eberi wabesenga nti musike wa Sera, na Sera wabesenga
- 36 nti musike wa Kainama,  
na Kainama wabesenga nti musike wa Aripakisati,  
na Aripakisati wabesenga nti musike wa Semu,  
na Semu wabesenga nti musike wa Noa,  
na Noa wabesenga nti musike wa Rameke.
- 37 Na Rameke wabesenga nti musike wa Metusera,  
na Metusera wabesenga nti musike wa Enoke  
na Enoke wabesenga nti musike wa Yareti,  
na Yareti wabesenga nti musike wa Mahareri,

na Mahareri wabesenga nti musike wa Kainama.

**38** Na Kainama wabesenga nti musike wa Enosi,  
na Enosi wabesenga nti musike wa Seti,  
na Seti wabesenga nti musike wa Andamu,  
na Andamu wabumbwanga na Ongo.

### Yesu werekwá na Mushumbu


(Matayo 4.1-11; Mariko 1.12-13)

**4** <sup>1</sup>Yesu wátuka ekúsi muri Yorondani ntwamarísa eMutima Washurukara. N'eMutima ngo wamwenja mu bweru. <sup>2</sup>Nángo, Mushumbu\* wamwereká mu matu makumi anye. Mu matu ati ngo, Yesu ntwárerisa bió. Kuruma n'emátú ngo, wákwa rwaka.

<sup>3</sup>Kuruma nampo, Mushumbu\* wamweyere n'imwire mbu: «Kuba óngo Musike wa Ongo, eba n'erikoi ríno ribinduki mukati.» <sup>4</sup>Yesu wámusako mbu: «Raandikwa mu Mitiro Yashurukara mbu: «Emwea watakoche íishi bushwa n'emikati ho.»»<sup>a</sup>

<sup>5</sup>Ituka mpo, Mushumbu wámuría hakangama nguru. Na mu rikohya, wamushea emami ati echuo, <sup>6</sup>n'imwire mbu: «Nasekuninka emaa n'ebútumba b'wemami ati ingi, bushwa mbu nareninkwa ebite mbi, nani namuninkana byo mu kinsi mwea ewashima ani. <sup>7</sup>Umanisimanike, ebite mbi bisebesa byabe.» <sup>8</sup>Ina Yesu wámusako mbu: «Raandikwa mu Mitiro Yashurukara mbu: «Usimanikenga Nyere kurwabe Ongo wabe n'imukore iwe kisine.»»<sup>b</sup>

<sup>9</sup>Nampo, Mushumbu wámuría ku Yerusaremu. Wamutarisha hamambio eNumba ya Ongo\* n'imwire mbu: «Kuba óngo ho Musike wa Ongo, ítáe



*Mushumbu watarisha Yesu  
hiyo n'enumba (4.9)*

<sup>a</sup> 4.4 Soma Isubukia 8.3.    <sup>b</sup> 4.8 Soma Isubukia 6.13.

ekwansi itukire hano, <sup>10</sup>bushwa raandikwa mu Mitiro Yashurukara mbu: «Ongo waseere ebamaraika\* bae bakurange.» <sup>11</sup>Raandikwa mbu: «Basekuria mu mine yābo, kongo ekisando chabe kiro chasitara mwikoi.»<sup>ch</sup> <sup>12</sup>Ina Yesu wámusako mbu: «Raandikwa mu Mitiro Yashurukara mbu: «Angienda ōngo werekange Nyere kurwabe Ongo wabe.»»<sup>e</sup>

<sup>13</sup>Mushumbu\* warekia wamakind'iereka Yesu mu sânse siti, wamureke kasa kashángi kakeke.

### Yesu wabucha emurimo wae mu chuo cha ku Ngariraya

(Matayo 4.12-17; Mariko 1.14-15)

<sup>14</sup>Yesu wákuruka mu chuo cha ku Ngariraya nti urisere n'ebunkangwe bw'eMutima, n'emyasi yae yêya kuti-kuti mu sankaro'nso. <sup>15</sup>Wabesenga uhanange mu masinangoki\* ábó, n'itatwa n'ebeta bati.

### Yesu watinwa ku Nasareti

(Matayo 13.53-58; Mariko 6.1-6)

<sup>16</sup>Yesu wêya mu rubungu rwa ku Nasareti kwôshukenga we. Erotu rw'eSabato\* rwarekia rweya, wákime mu sinangoki\* ímbu esenga buronjangá ho we. Wásimana mwisoma eMitiro Yashurukara. <sup>17</sup>Bámunínka ekitabó ch'emutahwa\* Isaya. Nampo, wóbora cho, wásúnga impi haandikwa mbu:

<sup>18</sup>«Mutima wa Nyere kuritu uri hima nani,  
bushwa wamanirondora nihubirĩ ebasene eMwasi Wakonda.  
Wanítámá iture ebamínwa mbu baseoborwa  
n'ebihumihumi mbu bisekae.

Wanítámá kobora ebanénwá,

<sup>19</sup>n'iture ebea ímbu emwáka wameya íngu usekiayo Nyere kuritu  
washéá enchumo yae.»<sup>f</sup>

<sup>20</sup>Kuruma nampo, wôndonda ekitabó, wanínka cho emukori w'esinangoki n'irika. N'ebeta bati ebabesenga kumunda n'esinangoki\* babesenga nti bamukaengi nguru. <sup>21</sup>Yesu wabucha ke iere bo mbu: «Emitiro ino yamarukira banu hano yamabererera runotu.» <sup>22</sup>Ebati bamukokome n'ishishara mu binwa byakonda ebyebangá we. Beba mbu: «Mbeni uno nti mwana wa Yosefu?»

<sup>23</sup>Yesu wére bo mbu: «Íira, nosi mbu mukânĩre emushumo uno: «Emunganga, iramyé ōngo kisine!» Na bumbo tu mukânĩre mbu: «Tamarukira ebiti byakukora ōngo mu rubungu rwa ku Kaperenaumu,

kai kora tu byo kũno kurinu.»<sup>24</sup> Nae wéba mbu: «Íra nibwirengi: kusira mutahwa\* eusimírwanga ku rwabo. <sup>25</sup> Nibwirengi íra: kwabesenga bashumbakari bingi mu chuo cha ku Isiraeri mu biranga by'emutahwa Eria. Mu matu ngo, embura ntí yakengá mu myáka ishata na chunda, na kwábése rwaka rukiri mu chuo kiti. <sup>26</sup> Ongo ntí watúmánga Eria kuri mwea uti-uti, ina ho kw'emushumbakari wa ku Sarepata, mu chuo cha ku Sindoni. <sup>27</sup> Na mu chuo cha ku Isiraeri kwabesenga hotu babembi bingi mu biranga by'emutahwa Erisha. Kusira mwea uti-uti waramanga, ina ho Naamani w'echuo cha ku Suria.»<sup>h</sup>

<sup>28</sup> Ebea bati ebabesenga kumunda n'esinangoki\*, mu rirukira ebinwa mbyo, basubuka nguru. <sup>29</sup> Básímána, bakurúraa Yesu ieya na hikúra n'erubungu erwabesenga rwumbwa mu ntata. Bamutarisha hambasiro kongo bamurekera kumbo n'erou. <sup>30</sup> Ina iwe wéta munkati-nkati nabo, n'ienda rae.

### Yesu wahénsá kifwasi mu mwea

(Mariko 1.21-28)

<sup>31</sup> Nampo Yesu wahitire ku Kaperenaumu, mu chuo cha ku Ngariraya. Erotu rw'eSabato\* rwarekia rwameya, wáhana ebea. <sup>32</sup> Nabo bashishara nguru murísúnga ímbu buhanange we, bushwa wabesenga uhanange bo na burai. <sup>33</sup> Mu sinangoki\* njo mwabesenga mwea umă watíngírúwá na kifwasi. Nae wákuwa mu murenge mukiri mbu: <sup>34</sup> «eYesu wa ku Nasareti, óngo utusondange mo nki? Ukweya katushiria? Ani nikosí nguru, óngo nge Mushururuka watúmwá na Ongo.»

<sup>35</sup> Yesu wamufine mbu: «Bibira, na tukă kumunda n'emwea uno!»

Hiha-hiha, ekifwasi ncho chamurekera ekwansi mu makako ebea, n'ituka kumunda nae nti tíchamubabaya. <sup>36</sup> Ebea bati bashishara nguru n'ishishana mbu: «Inki kino? Tutangasunganga binwa biri buno! Emwea uno uhensange ebifwasi mu bunkangwe na maa ae, nabyo byatuka!» <sup>37</sup> Emyasi ya Yesu yánsansabana ekuti mu chuo ncho.

### Yesu waramyá bakoni bingi

(Matayo 8.14-17; Mariko 1.29-34)

<sup>38</sup> Yesu wátuka kumunda n'esinangoki\*, wênda kakime mwa Simoni. Inabe wa Simoni wabesenga ntwamatingirwa na kaburura kasuma, bákónga ke Yesu wamuramye. <sup>39</sup> Yesu wíndama kwihi n'emumína ngo, wáfine ekaburura mbu katuke kumunda nae, nâko katuka. Hiha-hiha, emumína ngo wásimana n'ibucha ironjee bo bió.

<sup>h</sup> 4.27 Soma 2Bami 5.14.

<sup>40</sup>Emwishi warekia wamasika, ebabesenga n'ebakoni babó ba kira bususé barisha bo kuri Yesu. Wátereka emine yae hambasiro na kira umă mubo, wáramya bo. <sup>41</sup>Ebifwasi byatuka kumunda na bea bingi, na nti bikuange mbu: «Ōngo nge Musike wa Ongo!» Ina Yesu wáfine byo, na ntwasierenga byo mbu byebe, bushwa byáteererangá mbu iwe nge Kirisitu\*.

### Yesu wahubiri ku Yundeá

(Mariko 1.35-39)

<sup>42</sup>Ebutu bwarekia bwamacha, Yesu wátuka mu rubungu n'ienda kishíka kwahehe. Kikembe kikiri cha bea babucha imusondekanya. Barekia bamamusunga, básonda imuhangire mbu anga wasia tu bo. <sup>43</sup>Ina Yesu wére bo mbu: «Rakomenwa nihubirí eMwasi Wakonda w'eBwami bwa Ongo\* mu simpě mbungu hotu, nge chasingwa Ongo wanitúamá.»

<sup>44</sup>Nae wênderana n'erihubiri mu chuo cha ku Yundeá kumunda n'em asinangoki\*.

### Yesu wabikira ebanafunsi baroso

(Matayo 4.18-22; Mariko 1.16-20)

**5** <sup>1</sup>Otu rumă, Yesu wásimana mu kirindo ch'enyansa Kenesareti<sup>a</sup> na bea bingi nti bamukutakutange kongo barukira ekinwa cha Ongo. <sup>2</sup>Wásúnga mitumbu ibi kumushi n'eririba, n'ebarobi nti bamatuka kumunda nayo, babesenga bashuange etukira twábó. <sup>3</sup>Yesu wákime mu mutumbu umă, na nti nge wa Simoni. Yesu wámwire mbu wahimire o kore kakeke n'ensocho. Nampo wárika mo, wabucha ihana ebea.

<sup>4</sup>Warekia wamakind'ihana, wáshísha Simoni mbu: «Kensea emutumbu ehari emecha mingi na muhiche etukira twinu, murobe bikwă.»

<sup>5</sup>Simoni wámusako mbu: «eMuhani, twamanuba n'eriroba emutu uti, twăkuhina. Ina bushwa mbu ōngo nge uměba, nasehicha tu etukira.»

<sup>6</sup>Barekia bamahicha etukira, bashura bikwă bingi nguru n'etukira twáhiere mu ngerero y'isonda ibereka. <sup>7</sup>Nampo basime banachabo b'emutumbu umpě mbu beye kásake bo. Nabo bêya, barísía emitumbu ibi bikwă, nayo yábucha itia. <sup>8</sup>Simoni Petero warekia wasúngă ebinwa mbyo, waanda emaru mu makako a Yesu n'ieba mbu: «Nyere kuritu, umátúkánge kwihi nani, bushwa mbu ani mwea wa nsambi!» <sup>9</sup>Simoni webángá mbo bushwa iwe na babine bati bashishara nguru mu risúnga ebwingi bw'ebikwa ebyashuranga bo.

<sup>a</sup> 5.1 Nyansa ya Kenesareti: Ríno rimpe rina r'enyansa ya ku Ngariraya.



*Petero na banachae bashura bikwa bingi bushwa na Yesu (5.6)*

<sup>10</sup> Yakobo na Yohana basike ba Sebendayo ebabesenga hotu barobi hima na Simoni, nabo bashishara. Yesu ke wére Simoni mbu: «Kiro usubaha, itukire enompena ukúkoră murimo w'iroba bea.»

<sup>11</sup> Ngerikia ke bakurura emitumbu yăbo kumushi, bareke ebiti n'imisa Yesu.

### **Yesu waramyá mubembi**

*(Matayo 8.1-4; Mariko 1.40-45)*

<sup>12</sup> Yesu warekia uru m'ubungu rumă mu chuo ncho, kwasaa mwea umă nti urisere bibembi emubi uti. Warekia wasungă Yesu, wíndama embaso ieya n'ekwansi, n'imuhema mbu: «eNyere kuritu, úmasasa, umuniramyab.»

<sup>13</sup> Yesu wôro emwine, wamutinge mo n'imwire mbu: «Nashima! Ramá!»

Hiha-hiha, emwea ngo warama ebibembi. <sup>14</sup> Yesu wamuhangire nguru mbu: «Angítire mwea emwasi uno. Ina endá kishéá kuri ekuhani\*. Nănko, ukutonga ebisabo ímbu bwebanga Musa, kongo rashea mu bea ebati mbu umarama.»

<sup>15</sup> Na kiro mbo, emwasi wa Yesu wênda nkúru na bea bingi benda batumanange mwirukira ebinwa byae n'irama emakoni ábó. <sup>16</sup> Ina wabesenga ntwishíkange nabo kwahehe n'ihema Ongó nko.

<sup>b</sup> 5.12 Soma Matayo 8.2.

**Yesu waramyá mwea wa rumbonsa**

(Matayo 9.1-8; Mariko 2.1-12)

17Otu rumă Yesu warekia uhanange ebea. eBafarisayo\* n'ebahani b'eMyomba\* ebatukángá mu kira ubungu rw'echuo cha ku Ngariraya na ku Yundea n'ituka ku Yerusalemu, babesenga nti barerika mpo. Yesu wabesenga nti uramyange ebakoni mu maa a Nyere kuritu.

18Bea bimă bêya na nti bária mwea wa rumbonsa mu kipoi. Básonda inse y'imukimisha kumunda n'enumba kongo bamutereka hamakako na Yesu. 19Ina barúkwa ense y'erimukimisha kumunda bushwa n'enteko nkiri y'ebea. Bushwa náncho, bataya hamambio enumba njo, bakakura mu matebura, bahicha emwea w'erumbõnsa munkati-nkati n'ebea, nt'uri mu kipoi chae, n'imusicha mu makako a Yesu.<sup>ch</sup> 20Yesu warekia wamasunga erisimira rabo, wéba mbu: «Emirani, esansambi sabe samasasirwa.»

21Ebahani b'eMyomba\* n'eBafarisayo\* babucha kwishisha mbu: «Inyé mwea ngu eukambange Ongo? Inyé ngwamukochă isasira nsambi, kuba ntí Ongo wisine?» 22Yesu warekia wamateerera emihaki yăbo, wáshísha bo mbu: «Bushwa nki banu mwishishange ebinwa biti mbyo mu mitima yinu? 23Kini kinwa nge chatamba, mu rieba mbu: «Esansambi sabe samasasirwa», abe ieba mbu: «Simaná, endá?» 24Nisondänge musibe mbu ani eMwana w'eMwea\* niri na maa erisasira esansambi hano hansí.» Nge bumbo, Yesu wére emwea w'erumbõnsa mbu: «Ani nge nikwiréngi mbu: simaná, ria ekipoi chabe na kurukă ku kwabe.»

25Hiha-hiha, emwea ngo wásimana kubusondori nabo ebati. Wáría ekipoi chabesenga chikindirengi mu we, wênda ku kwae nti utatange Ongo. 26Ebea bati bashishara n'itingirwa na böba. Batata Ongo n'ieba mbu: «Runotu, rero twamasunga binwa bya bishisharo!»

**Yesu weré Rawi mbu wamumise**

(Matayo 9.9-13; Mariko 2.13-17)

27Kuruma nampo, Yesu wátuka mu numba njo. Wásúnga mukongori umă wa horo erina rae nge Rawi<sup>e</sup>, ntwarika hamesa yae y'erituanya ehoro. Yesu wámwire mbu: «Nimise!» 28Rawi wásimana, wasia ebiti n'imumisa.

29Ituka mpo Rawi waronjee Yesu bió bingi mu numba yae. Bakóngóri bingi ba horo na bampe bea bingi babesenga barisange hima nabo. 30eBafarisayo\* n'ebahani b'eMyomba\* barekia bamarukira mbo, babucha

---

<sup>ch</sup> 5.19 Bayuta bimă, mu riimba emanumba ábó, babesenga báriangă mití hiyo n'itereka mu yo matebura. <sup>e</sup> 5.27 Rawi nge wabikirwá tu mbu Matayo. Soma Matayo 9.9.



ihuhuma. Bashisha ebanafunsi\* ba Yesu mbu: «Bushwa nki banu murisange n'iomore hima n'ebakongori b'ehoro, n'ebakori b'ebibí?»

<sup>31</sup>Yesu wásako bo mbu: «Ebankangwe ntibaráé mu munganga, ina ebakoni. <sup>32</sup>Nti neyángá kabikira ebea mbi baombokara mu makako a Ongo, ina ebari n'ebubí kongo babundúka ituka mu sansambi sábó.»

### eBafarisayo bashíshá Yesu bushwa n'ebió

(Matayo 9.14-17; Mariko 2.18-22)

<sup>33</sup>Bafarisayo\* bimă bashisha Yesu mbu: «Ebanafunsi\* ba Yohana hima n'ebitu baronjangă mahemo na bihangisangă ringi irisa bió, ina ebanafunsi babe ibó barisange n'ioimo.» <sup>34</sup>Yesu wásako bo mbu: «Banu mwanikirange mbu mumakocha ihangire ebira ba'ngu waherucha irisa bió entambi ukiri hima nabo? Anga! <sup>35</sup>Ina kuseyayo matu shiherucha ngo wakuturwa munkati nabo, n'emátú ngo ke nge asekwihangisayo bo irisa.»

<sup>36</sup>Yesu wákere bo emushumo uno: «Kusira mwea ngu wamukeră kiraka mu nchangi nchasha n'iranda cho mu nchangi yamanaa. Kúti wakia mbo, wabese nti wamabenga enchangi nchasha, n'ekiraka ch'enchangi nchasha kitamukocha itingane n'enchangi yamanaa. <sup>37</sup>Na kusira hotu mwea wamúria ndifai\* nchasha kumunda na nkũ y'ohu<sup>f</sup> esamanaa. Emwea wámaronja mbo nti endifai nchasha isebuya esanku s'ekihũ; nampo endifai isekubuka n'esankũ sisekwa busa. <sup>38</sup>Ina rakomenwa iría endifai nchasha kumunda n'ohu rushásha. <sup>39</sup>Emwea wámomo mu ndifai ya karekare wataraenga tu mu ndifai nchasha, bushwa waseba mbu: «Endifai ya karekare yashamuka nguru!»

### Yesu nge miné Sabato

(Matayo 12.1-8; Mariko 2.23-28)

**6** <sup>1</sup>Otu rumă rwa Sabato\*, Yesu wabesenga wetange mu mashwă a ngáno. Ebanafunsi\* bae babucha ikekeraa etukobe tw'engáno, babungabunga to mu mine n'irísa etuma. <sup>2</sup>Bafarisayo\* bimă bashisha bo mbu: «Era! Bushwa nki banu mukíángo binwa ebyahangirwa ikorwa erotu rw'eSabato?»

<sup>3</sup>Yesu wásako bo mbu: «Ntínensi musoma ímbu bwaronjanga Ndauti wisine n'ebea bae entambi yarukiranga bo rwaka? <sup>4</sup>Wakimenga mu Numba ya Ongo\*, wátinge mikati eyasiburwanga Ongo, warísa yo n'ininka mu

---

<sup>f</sup> 5.37 *Inkũ s'ohu*: sabesenga inkũ satunganyiwa na ohu rwa mpene. Bayuta babesenga bushienga ndifai mu nkũ s'ohu sishásha bushwa mbu ito sitakoche ibereka entambi endifai ibukange. Babesenga baronjangă mbo bushwa mbu esanku s'erohu insi samanaa satamba-támá na nti samubereka tete. Hano hebange mbu ebinwa mbi byabesengá bihanange Yesu byabesengá bishásha na nti bitamusonyana n'emwenjo wéma wa karekare.

yo ebea bae, n'emikati njo yakomenwanga rero iriwa ho n'ebakuhani\* bisine.»<sup>a</sup> <sup>5</sup>Ngyasingwángá ke Yesu wére bo mbu: «Ani Mwana w'eMwea\* nge miné erotu rw'eSabato\*.»

**Yesu waramyá mwea w'ikasa ra rumbonsa**

*(Matayo 12.9-14; Mariko 3.1-6)*

<sup>6</sup>Otu rûmpě rwa Sabato\*, Yesu wákime mu sinangoki\* n'ibucha ihana ebea. Kumunda mo nti mûri mwea umă wa rumbonsa mu rikasa r'ekwabume. <sup>7</sup>Ebahani b'eMyomba\* n'eBafarisayo\* babesenga bakairirengi Yesu kúti useramya mwea mu rotu rw'eSabato, kongo bashée kinwa chimusongere. <sup>8</sup>Ina bushwa Yesu wabesenga wosi emyanikiri yăbo, nge rikíá ke wére emwea w'erumbõnsa mu rikasa mbu: «Simaná! Kensere habusondori n'ebea.» Nae wênda kasimana mpo. <sup>9</sup>Ngerikíá ke Yesu wére bo mbu: «Nibushishange: mbeni eMyomba yatukonga ikora byakonda abe ebyema mu rotu rw'eSabato? Iramya mwea abe imushura?»

<sup>10</sup>Yesu wákæe bo ebati, kuruma nampo wére emwea ngo mbu: «Oró erikasa rabe.»

Nae wôro erikasa, n'erikasa rae rabesa tu shu. <sup>11</sup>Ina ebahani b'eMyomba n'eBafarisayo mbo basubuka nguru, babucha ishíshana bisine kinki echamukore bo Yesu.

**Yesu warondorá esantumwa ikúmi na sibi**

*(Matayo 10.1-4; Mariko 3.13-19)*

<sup>12</sup>Otu rumă, Yesu wátaya mu rou, wênda kakérésha mwihema Ongo emutu mutí. <sup>13</sup>Ebutu bwarekia bwamacha, wabikira ebanafunsi\* bae, n'irondora mu bo ikúmi na bábí, wabikira bo mbu ntumwa\*. <sup>14</sup>N'emína ábó nge ano: Simoni íngũ wakíanga Yesu wáninka erina ra Petero na musikyabo Nderea, na Yakobo, na Yohana, na Firipo na Bariteremayo, <sup>15</sup>na Matayo, na Tomasi, na Yakobo musike wa Arufayo, na Simoni w'ekikembe ch'eBaseroti, <sup>16</sup>na Yuta musike wa Yakobo, na Yuta Isikarioti íngũ wasiburanga Yesu.

**Yesu uhanange bea n'iramya bakoni**

*(Matayo 4.23-25)*

<sup>17</sup>Yesu wáhita mu rou hima n'esantumwa sae, n'isimana hari buari bwarambama. Himpó nge habesenga ebanafunsi\* bae hima na kikembe kikiri nguru cha bea ebatúkángá mu rubungu rwa ku Yerusaremu, na mu

<sup>a</sup> 6.4 Soma Barawi 24.9.

chuo cha ku Yundea, na mu sankaro-nkaro s'esambungu sa ku Tiro na ku Sindoni mwendende enyansa. <sup>18</sup>Ebea mbo beyánga karukira Yesu na kongo wáramya emakoni ábó. Námbo ebabesenga barenubiwa n'ebifwasi bárama. <sup>19</sup>Ebea bati básondángá imutinge mo, bushwa mbu kumunda nae kwabesenga kusaange maa aramyange ebati.

### **Erikanirwa n'erihirwa**

*(Matayo 5.1-12)*

<sup>20</sup>Yesu wákæ ebanafunsi\* bae n'ieba mbu:

«Mukasanirwa banu mbi ebasene,  
bushwa mbu eBwami bwa Ongó\* bwinu.

<sup>21</sup>Mukasanirwa banu mbi mürí na rwaka enompena,  
bushwa mbu mukûsukutǎ.

Mukasanirwa banu mbi murëngi enompena,  
bushwa mbu mukûsea.

<sup>22</sup>«Mukasanirwa banu, kuba ebea bábubaá, bamikuto kuri banu, bámábukamba n'ibubishie emina inu bushwa nani eMwana w'eMwea\*!

<sup>23</sup>Ebinwa mbyo bisêkía byamasaa, mumoanga na kwikuba-kuba, bushwa mbu mubikirwa bihémbó bikíri mu mbingu. Bumbo nge bwakíángá bishiku bábó bákóre ebatahwa\*.

<sup>24</sup>«Ina mumaherwa banu ebatúmbá,  
bushwa murikinda ishée esango sinu.

<sup>25</sup>Mumaherwa banu mbi musukuta enompena,  
bushwa mbu mukúkwa rwaka.

Mumaherwa banu mbi museange enompena,  
bushwa mbu mukusungayo buhanya n'irire.

<sup>26</sup>Mumaherwa banu kuba ebea bati babutatange, bushwa mbu bumbo nge bwakíángá bishiku bábó batata hotu ebatahwa b'emanko!»

### **Mushime ebarénda binu**

*(Matayo 5.38-48; 7.12a)*

<sup>27</sup>«Ina banu mbi munirukirange, nibwirengi mbu mwendi mushima ebarénda binu, mwendi mukóra byakonda kuri imbi bábubaá. <sup>28</sup>Mwendi muhemere mukisa imbi ebabuhérange. Mwendi mûheme imbi babuterange. <sup>29</sup>Emwea wámakurasa kihi mu ritema rima, mushée n'erîmpě hotu. Emwea wámakunyaka erikóti rabe, musieri n'erishibabu hotu. <sup>30</sup>Emwea wamakuhema kikái múninké cho, n'ewakunyaka bikái byabe, angimuhema mbu wakukurichii byo. <sup>31</sup>Mwendi mukore bampe ímbu busondange ikorerwa hotu banu.

<sup>32</sup>«Banu m̄uri n'ishima ra buni k̄uti mushima ho mbi ebabushima? Bushwa mbu n'ebea b'esansambi nabo bashimangã ho imbi ebashima bo. <sup>33</sup>Kuba banu mukorengi byakonda kuri ho mbi ebabukorengi byakonda, ínĩ nchime ishéange banu? Bushwa mbu n'ebea b'esansambi nabo hotu bakoranenga bumbo. <sup>34</sup>Kuba banu musombyange ho mbi ebinyihire banu ho mbu bamubutua, ínĩ nchime ishéange banu? N'ebea b'esansambi hotu nabo basombyangã banachabo b'esansambi mu mwinyihire mbu basetua ímbu bwakwisombyanga bo! <sup>35</sup>Ina banu, mwendi mushima ebarénda binu. Mwendi mukore bo byakonda n'isombya bo na nti tímwinyihire ikuruchiwa. Nampo mukuninkwã uhembo rukiri na mukubeseyo băna ba Ongo íngũ urĩ hiyo n'ebĩtĩ, bushwa mbu iwe mōngó mu bea bati ebabĩ nãmbi ebatashimanga mu byakorera bo. <sup>36</sup>Mwendi mukwĩrane bonso, ímbu bubukwiringã Tita winu bonso.»

### Kiro muhukumu bampe

(Matayo 7.1-5)

<sup>37</sup>«Kiro mwendi banu muhukumungi bampe, na Ongo nae watēndi ubuhukumungi. Kiro mwendi banu mwansiranengi bibĩ, na Ongo nae watēndi ubuansirengi bibĩ. Mwendi musasira bampe, na Ongo nae wendĩ ubusasirange na banu hotu. <sup>38</sup>Mwendi banu muninkange bampe, na Ongo nae wasenda ubuninkange. N'ekisebuninka we, waserisĩa cho shu n'isoseka cho, n'irisĩa esanku sinu mu meno. Bushwa mbu Ongo wasebupimireyo mu nengo nji ipimirengi mo banu kuri bampe.»

<sup>39</sup>Yesu wákere tu ebanafunsi bae emushumo uno, wáshĩa bo mbu: «Mbeni kihumihumi chamakochã ibũnja kimpě kihumihumi? Ebati bábĩ batakirĩ mu kiribu? <sup>40</sup>Emwanafunsi\* watáréngánga emuhani wae. Ina kinsi mwanafunsi íngũ warihanwa shu, wamubesě burĩ emuhani wae.

<sup>41</sup>«Buni bwamusungã ōngo ekasũ kárĩ kumunda n'erĩso ra munakinu, ina utungarae mu kitíká kírĩ mu rĩso rabe? <sup>42</sup>Abe, buni bwamukocha ōngo iere munakinu mbu: «Reké nikúkútu ekasũ mu rĩso rabe», na kendekeke kumunda n'erĩso rabe ōngo mukírĩ kitíká! Ōngo mwea wa nkusé! Kuto kasa ekitíká kírĩ mu rĩso rabe, kongo ukae ishũ n'ikuto ekasũ mu rĩso ra munakinu.»

### Emuti n'byuma byao

(Matayo 7.16-20; 12.33-35)

<sup>43</sup>«Kusira mutĩ wakomá wámubuta byuma byema, abe kusira mutĩ wēma wámubuta byuma byakonda. <sup>44</sup>Bushwa mbu kira mutĩ usibwangã mu byuma byao. Ebea batamusiro byãmbã abe nkobe mu mutĩ w'eruso.

<sup>45</sup>Nge bumbo, emwea wakomá wěbanga binwa byakoma ímbu bwakonda emutima wae. N'emwea wemá wěbanga binwa byema ímbu ebwema emutima wae. Bushwa mbu ebunú bw'emwea bwebangă binwa ebirisere mu mutima wae.»

### **Emanumba abi**

*(Matayo 7.24-27)*

<sup>46</sup>«Bushwa nki banu mumbikirange ‹Nyere kuritu, Nyere kuritu›, na mutungakora imbi bibwirengi ani? <sup>47</sup>Nihunange ibushéa ímbu bwususá emwea ngu unimisange, n'urukirange ebinwa byani n'ikora byo: <sup>48</sup>wasusanyiwa na mwea wumbángá numba. Watíma nguru eroto n'ieya na mu rutandare. Kuruma nampo, wumba emúsíngi hiyo n'erutandare n'iumba enumba hiyo n'emúsíngi. Mbura nyankende yarekía yamake, erusi rwarisa n'emikombi yírasa mu numba njo, ina itatengí, bushwa mbu yimbwángá shu. <sup>49</sup>Ina íngú warukirá ebinwa byani na watangaronja byo, wasusanyiwa na mwea wumbángá numba mu roto na nti tíwimba músíngi. Emibimbi yarekía yirasa mu numba njo, mu kashángi ho kakeke, yenduka n'ikakukara.»

### **Yesu waramyá mukori wa mukwakare wa basura**

*(Matayo 8.5-13)*

**7** <sup>1</sup>Yesu wakíanga waměba ebinwa biti mbyo kuri ebea mbi babesenga bamurukirange, wěnda mu rubungu rwa ku Kaperenaumu. <sup>2</sup>Nănko kwabesenga mukwakare umă wa basura wa Baroma. Emukwakare ngo wabesenga na mukori wae umă washima we nguru. Emukori ngo wabesenga usambange nti urí mu nsanga nareke. <sup>3</sup>Entambi yakianga emukwakare o warukirá emwasi wa Yesu, watúma kuri we bakúngú bimă ba Bayuta imuhema weye kăramya emukori wae. <sup>4</sup>Ebakúngú mbo barekia basaa hari Yesu, bamuhema nguru mbu: «Emwea uno wakomenwa umákori ebikuhemange we, <sup>5</sup>bushwa mbu iwe utushimanga bate eBayuta, nae ngwakutwimbenga n'esinangoki\* yitu.»

<sup>6</sup>Năhă Yesu wěnda hima nabo. Warekia wěya kwihi n'enumba y'emukwakare ngo, watúma bira bae bamweberi kuri Yesu mbu: «Nyere kuritu, kiro winubya, bushwa mbu ani ntínakomenwa ikukóke mu mwani. <sup>7</sup>Ngyasingwa nasunga nti tínakomenwa ieya harikire ōngo. Ina, ōngo eba kinwa kimă ho, n'emukori wani waserama. <sup>8</sup>Niri n'ebanisimanirengă mu murimo witu, ina nani niri nămbi basimanirengă ani. Námeré umă mbu: ‹Endá!› Nae ntwendana! Námeré umpě mbu: ‹Iya!› Naha nti weyá! Námeré ntumwa yani mbu: ‹Kora buno!› Nae nti wakórá na bumbo!›»

<sup>9</sup>Yesu warekia warukirã ebinwa mbyo, wáshishara bushwa n'emukwakare ngo. Wákæe kuri ekikembe ch'ebamumisange, n'ieba mbu: «Nibwirengi, ntángasunganga mu chuo kiti cha ku Isiraeri mwea ɯri n'isimira nguru buri uno!»

<sup>10</sup>Ebea mbi batúmwanjá barekia bákuruka ekunumba, bákúmána emukori ngo ntwamarama.

### Yesu wafura musike w'emushumbakari

<sup>11</sup>Kuruma n'ebinwa mbyo, Yesu wênda tu m'ubungu rumã nge Naina. Ebanafunsi\* bae hima na kikembe kikiri cha bea bamumisa. <sup>12</sup>Wakíanga wasond'ieya mu rubi rw'erukito rw'erubungu ndo, kwasaa bea báriá kînda cha ngómó ya musike. Na nina w'emusike ngo nti mushumbakari. Bea bingi b'erubungu ndo babesenga nti batindikiane nyamukwirirwa. <sup>13</sup>Nyere kuritu warekia wasúngã nyamukwirirwa, wámukwire bonso n'imwire mbu: «Angíre.» <sup>14</sup>Yesu wásheere kwihi n'tinge mu sanduku, n'ieba mbi babesenga báriá esanduku básímána. Wéba mbu: «Nikwiréngi óngo musike, sumuka!» <sup>15</sup>Himpo, wásumuka, wárika n'ibucha ieba. Yesu wámukurucha kuri nina. <sup>16</sup>Ebea bati batingirwa na böba, batata Ongo nti bebange mbu: «Emutahwa\* mukiri wasáiré tu ku kwitu! Ongo wameya kashukaya ebea bae.» <sup>17</sup>Emwasi ngo wánsansabana ku Yundea ekuti na mu byuo biti bya mwendende.

### Yohana watúma banafunsi bae bábí kuri Yesu

(Matayo 11.2-19)

<sup>18</sup>Ebanafunsi\* ba Yohana bamuture emwasi w'ebiti mbi byetayo. Nampo Yohana wabikira bábí mu bo. <sup>19</sup>Watúma bo kwa Nyere kuritu kãmushisha mbu: «Mbeni óngo nge Masia íngu wakomenwanga ieya, abe turindire umpě?» <sup>20</sup>Ebanafunsi mbo barekia bêya kuri Yesu, bamwíre mbu: «Yohana Mubatisai wamätútúma kuri óngo tukúshíshe kuba óngo nge Masia íngu weyange, abe turindire umpě.» <sup>21</sup>Mu ntambi iya-iya, Yesu wáramya bea bingi imbi babesenga banubange na makoni mingi, n'eburema hima nãmbi batigirwa n'ebifwasi. Wáninka hotu bihumihumi bingi enchumo y'erikæe. <sup>22</sup>Nampo, Yesu wásubíe ebanafunsi ba Yohana mbu: «Mwëndí kature Yohana ebiti mbi byamasunga banu n'irukira banu: ebihumihumi ngíe bikaengi, n'ebirema ngíe byendange, n'ebabembi ngíe baramange,<sup>a</sup> n'ebatwitwi ngíe barukirange, n'ebakwire ngíe bafukange, n'eMwasi Wakonda ngíe uturwange kuri ebasene. <sup>23</sup>Wamákasanirwa kinsi mwea ngu watâriminyiyo erisimira rae kuri ani.»

<sup>a</sup> 7.22 Hano, erirama r'emubembi nge rishukara.

**24** Ebanafunsi ba Yohana barekia bamakuruka kuri we, Yesu wabucha iture ebikembe by'ebea emyasi yebá kuri Yohana mbu: «Mbeni mwendángá mu bweru kasunga ko nki? Mbeni eriséké indi rabesenga rirubiywange n'eriuhu? Anga! **25** Mwendángá kasunga ko inki ke? Mbeni mwea íngu wambara nchangi yahunda? Anga! Ebambarangá nchangi sa busí bwasuma na bári mu muanoano, barikangá mu manumba ebwami. **26** Mbeni mwendángá kasunga nki ke? Mutahwa\*? Ae, nibwirengi banu mbu iwe wabesenga nti mukwakare irénga emutahwa. **27** Yohana ngo nge washembwa mu Mitiro Yashurukara mbu:

«Rukira! Natú má entumwa yani íkusondori,  
kongo yatunganya ense yasêtere mo óngo!»<sup>b</sup>

**28** Nibwirengi mbu: «Mu bea mbi barikire mu chuo, kusira mukwakare waréngá Yohana. Ina kinsi íngu mwanunke mu Bwami bwa Ongó\*, iwe nge mukwakare imurénga.» **29** Ebea bati mbi bári kírangá Yohana, n'ebakongori b'ehoro hotu basimira mbu Ongó nge waombokara, na Yohana wabatisa bo. **30** Ina eBafarisayo\* n'ebahani b'eMyomba ibó bítiníre ebisondange Ongó kuri bo. Bushwa náncho, batina mbu batabatiswi na Yohana. **31** Yesu wéba tu mbu: «Nísusanyé ebea ba runotu na banye? Ibó bea bári buni? **32** Barengékane na bána mbi bári ká kwansi mu butara nti babikirange babine mbu:

«Twakubwombere ngoma ina ntímukumína!  
Twakubusimbengá rumbo rwa kiro ina ntímukure!»

**33** «Nge buno hotu bweyángá Yohana Mubatisai, iwe nti witinishangá irisa bió n'iomu ndifai\*. Banu nti mwebangá mbu uri na bifwasi. **34** Ani Mwana w'eMwea\* nameya nirisange n'iomu, banu mwebange tu mbu: «Mukai! Uno murohoroho tuna mutamiri, mwíra w'ebakongori b'ehoro na bísa esansambi.» **35** Ina ebati mbi basimira Ongó, basibirira mbu ebutesa bwae bwaombokara.»

### Yesu mu numba ya Simoni Mufarisayo

**36** Mufarisayo\* umá wabikira Yesu mbu weye karisa bió mu mwae. Yesu wénda mu numba y'eMufarisayo ngo, wárika n'irísa bió. **37** Na mu rubungu ndo mwarikanga mómína umá nti uri na nkú rú yemá. Emómína ngo warekia warukirá emwasi mbu Yesu urá nge bió mw'eMufarisayo, wéya mo na nti wahátá murangi umá urisere marashi a busí bwasuma. **38** Wéya n'isimana kuruma na Yesu, kwihi n'ebisando byae n'urengi. Ebiririo byae byabucha irare mu bisando bya Yesu, wakono byo n'ebuteo bwae.

<sup>b</sup> 7.27 Soma Maraki 3.1.

Warimba ebisando<sup>ch</sup> bya Yesu n'isingo byo marashi. <sup>39</sup>eMufarisayo ngu wabikiranga Yesu mu mwae warekia wasúngă bumbo, w'iebesha mu mutima mbu: «Emwea uno wamubesengi mutahwa\*, wamusibange mbu emumina uno umutígengi mo wasusa buni. Wamuteererange rero mbu iwe uri na nkúru yemá.»

<sup>40</sup>Yesu wére eMufarisayo ngo mbu: «Simoni, niri na chikushisha.» Simoni wásako mbu: «eMuhani, ebă.» <sup>41</sup>Yesu wéba mbu: «Kwabesenga bea bábí bisombya behe kwa mwea umă. Umă wabesenga na mwinda wa tinari<sup>e</sup> mia isanu, n'eumpě makumi asanu. <sup>42</sup>Shemine ebehe mu risúnga mbu barúkwa maa erikurucha ebehe byae, wásasira bo. Niri ke, mu bano bábí, inyé ngwaseshima emwea o nguru?» <sup>43</sup>Simoni wásako mbu: «Nasunga nti ungu wasasirwanga emwinda mukiri.» Yesu wámwire mbu: «Umasako shu.»

<sup>44</sup>Nampo, Yesu wákae kuri emumina ngo n'iere Simoni mbu: «Usunga emumina uno? Năkukime múno mu mwabe nt'ukumbese mecha ishua ebisando, ina emumina uno, iwe wamashúwá ebisando byani n'ebiririo byae n'ikono byo n'ebuteo bwae. <sup>45</sup>Ōngo umanikoke na nt'ukunirimba ebisando, ina emumina uno ntíwakureke irimba ebisando byani itukire nakime múno. <sup>46</sup>Ōngo nt'ukusingo mafuta mu muntwe wani, ina iwe wamasingo ebisando byani marashi. <sup>47</sup>Bushwa năncho, nikwiréngi mbu nakiro esansambi s'emumina uno síngi nguru, ina esiti samasasirwa. Kino nge chashea mbu emumina uno washima nguru. Ina ngu wasasirwa mu bikeke watakoche ishéa nchime ningi.»

<sup>48</sup>Nampo ke, Yesu wére emumina ngo mbu: «Esansambi sabe samasasirwa.»

<sup>49</sup>Imbi babesenga barisange hima na Yesu, babucha kwiebesha mbu: «Uno nae inyé usasirange esansambi?» <sup>50</sup>Ina Yesu wére tu emumina ngo mbu: «Endá rabe na buhóro, erisimira rabe ramakushukaya.»

### Ebamina ebasakenga Yesu mu murimo wae

**8** <sup>1</sup>Kuruma naha, Yesu wéta mu sambungu nkiri-nkiri n'eseke-seke nti uhanange n'itura eMwasi Wakonda w'eBwami bwa Ongó\*. Esantumwa sae ikúmi na sibi sabesenga hima nae, <sup>2</sup>na bamina bimă mbi baramyiwangá nae bifwasi na makoni ampe. Munkati n'ebamina mbo, habesenga umă erina rae nge Maria, íngu ubikirwange mbu wa ku Makitara íngu wakíanga Yesu wahambură mo bifwasi birinda, <sup>3</sup>na

<sup>ch</sup> 7.38 EkuBayuta, kuba emwea uhunange ishéa umpě eshima mu rimukoke, wabesenga urimbanga ebisando byae. <sup>e</sup> 7.41 Tinari yabesénga behe. N'etinari nima nge yabesénga ikorerwanga mu mubisi w'otu rumă.



Shani mukari wa Kusa, murangi w'ebehe bya Herote, hima na Susana na bampe bingi. Ebamána bano babesenga bakutongã behe byábó mwisake Yesu n'esantumwa sae.

### Mushinga wa mweki w'embuto

(Matayo 13.1-9; Mariko 4.1-9)

4 Bea ba kinsi ubungu babesenga biyerengi Yesu, na kikembe kikiri cha bea bákúmánana. Nampo Yesu wákere bo emushinga uno mbu:

5 «Mweki umã wendángá keka mbuto sae. Warekia urekeraange esambuto mu rishwa rae, sima sarare mwendende n'êñse. Ebea banyenchaa to n'emirónge yára to. 6 Simpě sakire habasirwa n'erutandare. Sarekia samashuka, sákáma bushwa n'erirukirwa mecha. 7 Simpě mbuto sakire munkati n'emenke. Emenke njo yáshuka hima n'embuto n'iekenya to. 8 Ina simpě mbuto ito sarare mu oto rwakonda, sashuka na kira kakobe kabúta mpinga iyana.»

Yesu warekia wamakinda ieba ebinwa bya, wéba mbu: «Íngu uri n'emate eririkira warukire!»



*Emweki urekeraange esambuto sae (8.5)*

### Yesu webange mu mishumo bushwa nki?

(Matayo 13.10-17; Mariko 4.10-12)

9 Ebanafunsi\* ba Yesu bamushisha ke buni nge bweba emushinga ngo. 10 Wásubíe bo mbu: «Banu mumashee nchumo y'erisiba enama y'eBwami bwa Ongó\*, ina ntí nge bumbo mu bea bampe. Ibó nerengi bo ebinwa bino mu ngano, kongo

«Bákae ina batasungi kikai,  
barukire ina batasibi kikai.»<sup>a</sup>

### Yesu wansonsomora emushinga w'emweki

(Matayo 13.18-23; Mariko 4.13-20)

11 Yesu wéba mbu: «Emushinga w'emweki weba buno mbu: embuto nge kinwa cha Ongó. 12 N'embuto eyararenga mwendende n'êñse nge

<sup>a</sup> 8.10 Soma Isaya 6.9.

sasusanyiwa n'ebea barukirangă ekinwa cha Ongo. Ina Mushumbu\* weyanga kakuto ekinwa ncho mu mitima yăbo kongo batasimiri n'ikocha ishukara. <sup>13</sup>Esambuto nsi sararenga hutandare sasusanyiwa nămbi barukirangă ekinwa cha Ongo n'isimira cho na ngoa. Ina ekinwa ncho kitarikanga na miri kumunda nabo. Basimirangă cho mu ntambi nkeké ho, emyereko yámahiere bo nti basia cho. <sup>14</sup>Embuto nsi sakirenga munkati n'emenke sasusanyiwa n'ebea mbi barukirangă ekinwa cha Ongo. Ina eminubo, ebusoki n'erishima by'echuo byékenyangă ekinwa ncho mu mitima yăbo. Ngyasingwangă batábúti byuma byákó. <sup>15</sup>Na nsi esararenga mu roto ndu rwakoma, ito sasusanyiwa n'ebea mbi barukirangă ekinwa cha Ongo n'ibika cho mu mutima wakonda na w'íira. Bimbo nge bārangangă ekinwa ncho n'isumya mutima n'ihiere mwibúta byuma byakonda.»

### Emushinga w'eritára

(Mariko 4.21-25)

<sup>16</sup>Kuruma nampo, Yesu wéba mbu: «Kusira mwea wamusachă eritára n'ibumbe ro mu kikai abe warie ro kumunda n'entangé. Ina urembeanga ro mu kango kongo ebakimengi mu numba basungé echaka. <sup>17</sup>Kiti nchi chabiswa kisetaburwayo, na kinsi nama isesaayo hambuka.

<sup>18</sup>«Kai mukohyanga n'eburukirange banu ebinwa. Bushwa mbu íngu urikire na kikai wasénikwa tu kîmpé, ina íngu usira kikai wasenyakwa nănchi chanikirengi we mbu chae.»

### Banachabo Yesu na nina

(Matayo 12.46-50; Mariko 3.31-35)

<sup>19</sup>Otu rumă, banachabo Yesu na nina bêya kămusúnga, ina ntíbákočángă imusúnga bushwa n'ekikembe kikiri ch'ebea. <sup>20</sup>Ngerikia ke ebea bere Yesu mbu: «Banakinu na nsoko básímáná hambuka, basondange ikusunga.» <sup>21</sup>Ina Yesu wásubíe bo mbu: «Banakitu na koyo nge bimbi barukirange kinwa cha Ongo n'ikora cho.»

### Yesu wakobesha enyansa

(Matayo 8.23-27; Mariko 4.35-41)

<sup>22</sup>Otu rumă Yesu wákime mu mutumbu hima n'ebanafunsi\* bae. Wére bo mbu: «Tusoké mu o mwiri w'enyansa.» Bênda. <sup>23</sup>Barekia basokange, Yesu wênda toro. Hiha-hiha, iuhu rasuma ríkásó mu nyansa. N'emecha ábucha ikime mu mutumbu, bêya mu ngerero y'isonda itia. <sup>24</sup>Ebanafunsi bae bákensere kwihhi nae, bamusimo nti bebange mbu: «Nyere kuritu, Nyere kuritu, twakwa!» Yesu warekia wabambukă, wáfine emibimbi,



*Yesu wafine emibimbi y'emecha (8.24)*

nayo yakóba n'emecha na o ákóba. <sup>25</sup>Nampo ke Yesu wáshísha ebanafunsi bae mbu: «Erisimira rinu riri kuni?» Básubaha n'ishishara, babucha ishíshana mbu: «Mwea wa buni uno? Ufinengi emibimbi n'enyansa, nabyo byamusúbáhá ná kubá!»

**Yesu waramyá mwea watíngírúwá na bifwasi**

*(Matayo 8.28-34; Mariko 5.1-20)*


<sup>26</sup>Kuruma nampo, Yesu n'ebanafunsi bae básoka enyansa. Basia emutumbu mu chuo ch'eBakerasi, mu o mwiri w'echuo cha ku Ngariraya. <sup>27</sup>Yesu wakianga watuká mu mutumbu, wákumanana na mwea umă mu rubungu ntwatingirwa na bifwasi. Emwea ngo wamananga matu mingi ntwatambaranga tu nchangi, na nti watarikanga tu mu numba, ina ekutuburi

ho. <sup>28</sup>Warekia wasúngă Yesu, wírake na kwirúnda ekwansi mu makako a Yesu, n'íeba mu murenge mukiri mbu: «eYesu Musike wa Ongo íngu ũri hiyo n'ebítĩ, mbeni kuri kinwa munkati ani nabe? Nikuhemange, angininubya!»

<sup>29</sup>Webángá mbo bushwa mbu Yesu wabesenga wamere kifwasi ncho mbu kituke kumunda n'emwea ngo. Ekifwasi ncho chabesenga kitingengă emwea ngo meta mingi. Nakiro mbu bāmumína emaboko n'ebisando mu burébúré na byŕma kongo wataromboki, wabesenga ukekeraanga byo. Ekifwasi ncho chabesenga kimutaangă ínkũ kutarikanga bea. <sup>30</sup>Yesu wamushisha mbu: «Erina rabe ng'inye?» Nawe wásubya mbu: «Erina rani ‹Kikembe.›» Wasakonga mbo bushwa mbu kumunda nae kwabesenga bifwasi bingi. <sup>31</sup>Ebifwasi mbyo byakónga Yesu mbu wamahensa bo kiro warekera bo ekwirúngá.

<sup>32</sup>Nampo habesenga nti harikire iimba rikiri ra mpunu sihuange hambasiro n'erou. Ebifwasi mbyo byakónga Yesu nguru mbu wareki byo, bikimi mu riimba r'esampunu. Yesu wárisia byo. <sup>33</sup>Ngerikia ebifwasi byatuka mu mwea ngo n'íkime mu sampunu. Eriimbá riti r'esampunu rahita n'erou n'ikwirekera mu nyansa n'itia. <sup>34</sup>Ebasumba b'esampunu barekia basunga ekinwa ncho, bēnda tete katura emwasi ekumbuka n'ekutunsari. <sup>35</sup>Ebea bēya kasunga ebyameta. Barekia bēya hari Yesu, bákúmána emwea ngo wamakaturwa mo ebifwasi ntwarika mu makako a Yesu. Emwea ngo wabesenga nti wamambara nchangi, n'ebwenge bwae nti bwamakuruka. Ebea mbo basubaha. <sup>36</sup>Ebasunganga ebyakweta, babucha itura emwasi kuri bampe bea ímbu bwakukianga emwea ngu wabesenga n'ebifwasi wárama.

<sup>37</sup>Ebea bati b'echuo ch'eBakerasi batingirwa na koha nguru. Bushwa nāncho, bere Yesu mbu: «Tutukiriri mu chuo kitu.» Nge bumbo, Yesu wákime mu mutumbu na kwikuruke rae.



*Esampunu satia mu nyansa (8.33)*

<sup>38</sup>Emwea ngu wakuturwanga ebifwasi wahema Yesu mbu wêndi hima nae, ina Yesu wamutinire, wámwire mbu: <sup>39</sup>«Kurukã ku kwinu, endá katura ebiti byamakukore Ongo.» Emwea ngo wênda kurwabo n'itura ebiti mu rubungu rûti ebyakumukore Yesu.

**Yesu waramyá mwisi wa Yairo na mămína umă**

*(Matayo 9.18-26; Mariko 5.21-43)*

<sup>40</sup>Yesu warekia wakurukã wásoka mu umpě mwiri w'enyansa, nkumanano nkiri yámukoke na ngoa bushwa mbu ebati babesenga bamurindirengi. <sup>41</sup>Nampo, mukwakare umă wa sinangoki\* mbu nge Yairo wëya. Wísunda ekwansi mu bisando bya Yesu n'imuhema mbu weye ku kwae, <sup>42</sup>bushwa mbu engomo yae y'ekikumi yabesénga iri mu nsanga nareke. Ekikumi ncho chabesenga kírí na myăka buna ikúmi na ibi.

Yesu warekia wendange kwa Yairo, kikembe kikiri cha bea chabesenga nti kimukutakutange. <sup>43</sup>Mu kikembe ncho mwabesenga mămína umă warisamba bukoni bw'ituka mo nchama. Wabesenga wamaheha n'ebukoni mbo myăka ikúmi na ibi. Wabesenga ntwamaheha ebehe byae biti kuri ebanganga. Ina kwárúkwana na umă ewakochanga imuramya. <sup>44</sup>Emămína ngo wásaíre Yesu kuruma nae, wáturana mwendende enchangi yae. Hiha-hiha, ebukoni bwae bw'erituka enchama bwarama nákwabá.

<sup>45</sup>Yesu wáshisha mbu: «Inyé ngwamanitinge mo?» Ebea bati bítána, ina Petero wéba mbu: «Nyere kuritu, utungasunga mbu bea bingi bakutimbá n'ikukutakuta?» <sup>46</sup>Ina Yesu wéba mbu: «Kuri ho mwea ewamanitinge mo, bushwa mbu nasunga ntyemaa amanituka mo.» <sup>47</sup>Emămína ngo warekia wasúngă mbu bamamukíma, wírisha wisine nti utitimanengi na bôba na kwisunda mu makako a Yesu. Nampo habusondori n'ebea bati, wátura echakusingwa wamutinge mo nămbu wamarama we hiha-hiha. <sup>48</sup>Yesu ke wámwire mbu: «Emwisi'ani, erisimira rabe ramakushukaya. Endá rabe mu buhóro.»

<sup>49</sup>Yesu warekia ukiri webange ebinwa bya, kwa Yairo mukwakare w'esinangoki\* kwasaa mwea umă n'iere Yairo mbu: «Enyere kuritu, Oho! Mwisyabe wamakera emutima! Anginubya tu eMuhani.» <sup>50</sup>Ina Yesu warekia warukirá mbo, wére Yairo mbu: «Angisubaha, simirá ho, wasêrama.»

<sup>51</sup>Yesu warekia wëya mu numba ya Yairo, ntíwananga ikime mo na umpě mwea waréngá Petero, Yohana, Yakobo, hima n'ishe w'emwana na nina. <sup>52</sup>Ebea bati babesenga barëngi na kwikama-kama bushwa n'erikwa r'ekikumi ncho. Ina Yesu wére bo mbu: «Kiro mure, bushwa mbu ntíwakwa ina urere!» <sup>53</sup>Ebea mbo babucha imusea, bushwa ibó basibanga mbu wamakind'ikwa. <sup>54</sup>Yesu wamutinge mu rikasa n'imwire

mu murenge mukiri mbu: «Emwisi'ani, simană!» <sup>55</sup>Hiha-hiha, wakurucha emutima, n'isimana. Yesu wére bo mbu: «Mumunike bió.» <sup>56</sup>Ishe na nina bashishara nguru. Ina Yesu wáhangire bo nguru mbu kiro bereka itura kuri mwea uti-uti imbi byamasunga bo.

### Yesu watúamá esantumwa ikúmi na sibi

(Matayo 10.5-15; Mariko 6.7-13)

**9** <sup>1</sup>Otu rumă, Yesu warikecha esantumwa sae ikúmi na sibi, wáninka to maa na burai bw'erihensa ebifwasi n'iramya ebakoni. <sup>2</sup>Watúma to katura emyasi y'eBwami bwa Ongó\* n'iramya ebakoni. <sup>3</sup>Wére to mbu: «Mu ruendo rwinu, anga muría kikai kiti-kiiti abe nkoma, abe inkũ, abe bió, abe behe, kira mwea waríanga ho nchangi nima. <sup>4</sup>Murikanga mu numba yasekokerwá mu banu nămbu bwâtuki banu mu rubungu ndo. <sup>5</sup>Mu kinsi ubungu indu rwasekia bîsa kuro batina ibukoke, mutukanga mu ro nti banu mutitongi emukungú w'ebisando byinu.<sup>a</sup> Ekinwa ncho kiseshéá bo mbu bakukora bubí.» <sup>6</sup>Esantumwa sênda, seta ubungu m'ubungu, siturange eMwasi Wakonda n'iramya ebea ekuti.

### Herote wasúbáhá emwasi wa Yesu

(Matayo 14.1-12; Mariko 6.14-29)

<sup>7</sup>Herote, mukwakare w'echuo cha ku Ngariraya, wárúkíra emyasi iti y'ebinwa bikorwange. Năwe wákwa koha bushwa mbu bea bimă babesenga bebange mbu Yohana Mubatisai ngwamafuka. <sup>8</sup>Na bampe babesenga bebange mbu emutahwa\* Eria nge wamasungwa tu. N'ebampe beba mbu umă mu batahwa ba karekare nge wamafuka. <sup>9</sup>Ina Herote wéba mbu: «Ani nge nebángá mbu bákeré emuntwe wa Yohana. Mbeni íngu nirukirange emyasi yae, iwe inyé tu?» Bushwa năncho, Herote wásonda ke buni bwasesunga we Yesu.

### Yesu wasukucha bea erefu isanu

(Matayo 14.13-21; Mariko 6.30-44; Yohana 6.1-14)

<sup>10</sup>Esantumwa\* sarekia sakurukă, bature Yesu emyasi iti nji yakukora bo. Năhă wénda nabo hima. Kuruma nampo, Yesu wíshíka nabo kwihi na ku Betesaita. <sup>11</sup>Ebikembe by'ebea byarekía byamasiba mbu kuko nge kwameta we, byamutúcha ko. Yesu wakoke bo n'ibucha ieba nabo bushwa n'eBwami bwa Ongó\*. Nampo wáramya ebati mbi bahunángá mbu waramye bo.

<sup>a</sup> **9.5 Itito emukungú w'ebisando:** nge rieba mbu emwea ewakutúmwanga usira tu mwinda kuri ebea ebakurishiwangá emwasi nabo bítine o.

<sup>12</sup>Emwishi warekia wamabucha itamba, entumwa ikúmi na sibi sa Yesu samweyere n'imwire mbu: «eNyere kuritu, Reké ebea bano bendi kásonda nkambi na bió mu sambungu esiri kwihi-kwihi bushwa mbu hano turi hasirã bea.» <sup>13</sup>Ina Yesu wásako bo mbu: «Banu bisine múninké bo bió!» Nábó bamusubie mbu: «Bate turi ho na mikati isanu na bikwã bibí. Öngo'hunange mbu twëndí kachure ebea bati bano bió?» <sup>14</sup>Himpo habesenga nti harikire babume buna erefu isanu. Yesu wére esantumwa sae mbu sirikeche bo mu bikembe bya bea makumi asanu-asanu.

<sup>15</sup>Esantumwa sakora bumbo, sarikecha ebea bati ekwansi. <sup>16</sup>Kuruma, Yesu wátinge emikati isanu njo n'ebikwã bíbí mbyo, wákæ ekwio, watata Ongo. Nampo, wabengaa byo, wáninka byo ebanafunsi\* bae mbu bábanyíí ebea bati. <sup>17</sup>Ebati barísa n'isukuta. Esantumwa sasombo ebyasianga bo, barísía mitúndú ikúmi na ibi.



*Yesu wasukucha bea bingi bió (9.17)*

**Petero webá mbu Yesu nge Kirisitu**

*(Matayo 16.13-19; Mariko 8.27-29)*

<sup>18</sup>Otu rumã Yesu wabesenga uhemange Ongo iwe wisine. Ebanafunsi\* bae babesenga barikire kwihi nae, wáshísha bo mbu: «Mbeni ebea bebange mbu ani ng'inye?» <sup>19</sup>Nabo mbu: «Bimã bebange mbu öngo nge Yohana Mubataisai, bampe mbu öngo nge Eria, n'ebampe mbu öngo umã mu batahwa\* ba karekare ewafukanga.» <sup>20</sup>Yesu wáshísha bo mbu: «Na banu ke mwebange mbu ani ng'inye?» Petero wamusubie mbu: «Öngo nge Kirisitu\* íngu watutúmiré Ongo.»

**Yesu waturá emwasi w'erikwa rae n'erifuka rae**

*(Matayo 16.20-28; Mariko 8.30—9.1)*

21 Yesu wáhangire bo nguru mbu kiro bereka iture umpě mwea emwasi ngo. 22 Wére tu bo mbu: «Rakomenwa ani Mwana w'eMwea\* ninube n'itinwa n'ebakúngú, n'ebakuhani\* hima n'ebahani b'eMyomba\*. Niseshurwa, ina erotu rw'emeta ashatu nti nafuka.»

23 Ngerikia wére ebea bati mbu: «Kuba emwea waráé inimisa, watêndi wiraengi mo. Ina wênda uriange emusaraba wae n'initúcha ematu ati. 24 Bushwa mbu íngũ usondángo iramya ebuingo bwae waseriminyayo bo, ina íngũ waseshia ebuingo bwae bushwa nani waseramyayo bo. 25 Emwea wámashéé ebusoki bw'echuo kiti, wabese ntwamashéé kikai nki ke kuba wariminya ebuingo bwae abe kwitaa mu roku wisine? 26 Emwea wamanikwire nkene n'ikwire ebinwa byani nkene, ani eMwana w'eMwea\* nasemukwireyo hotu nkene. Rasebeseyo bunu mu rotu ruseyayo ani mu busimé bwani, na nge busimé bwa Tita, na nge bw'ebamaraika\* bashurukara. 27 Ííra, nibwirengi mbu: bimă mu banu mbi mŭri hano, batâkwiyo kúti ntíbasunga nensi ebwasimana eBwami bwa Ongó\*.»

**Yesu wabundurwa embaso**

*(Matayo 17.1-8; Mariko 9.2-8)*

28 Kuruma na matu buna munani Yesu warekia wamakinda ieba ebinwa mbyo, iwe wáringa Petero, Yakobo na Yohana, wátaya nabo hiyo n'erou kahema Ongó. 29 Warekia uhemange, embaso yae yábinduka, n'esanchangi sae sásana n'inyenya nguru. 30-31 Nampo, kumunda n'echáká ncho kwasaa babume bábí, Musa bána Eria. Ebabume bábí mbo, babesenga nti bebanange na Yesu bushwa n'ebusekinda we emurimo wae, mu rikwire ku Yerusaremu. 32 Entambi njo, Petero na babine babesenga baměnda toro twingi. Ina barekia basimukă, basunga ebusime bwa Yesu n'ebabŭme bábí mbo babesenga básímáná hima nae. 33 Ebabume bábí mbo barekia básonda isiana na Yesu, Petero wámwire mbu: «eNyere kuritu, rakonda bunu bŭri bate hano. Twîmbé héma ishata: nima yabe, impě ya Musa na impě ya Eria.» Nae wabesenga webange nti tíwosi echebange we.

34 Mu ntambi Petero wabesenga webange mbo, erutundo rwahita n'ibumbe bo. Esantumwa nso sasubaha mu ribumbirwa n'erutundo ndo. 35 Kwarukirwa murenge umă wasaa mu rutundo ndo ntwebange mbu: «Uno nge Musikyani ewarondoranga ani. Mwendu banu mumutee mate!» 36 Kuruma n'erirukira emurenge o, Yesu wasúngwa ntwamasia wisine.



Ebinwa biti mbyo ebyasunganga esantumwa mpo, ntibatúrénká mwea uti-uti enama njo ematu ati ngo.

**Yesu waramyá mwana uri na kifwasi**

*(Matayo 17.14-18; Mariko 9.14-27)*

<sup>37</sup>Mu richa r'ebutu, Yesu n'entumwa sae ishatsu nso báhíta erou. Kikembe kikiri cha bea bamwiyere. <sup>38</sup>Hiha-hiha, mwea umă munkati n'ekikembe wakua mbu: «eMuhani, nakukónka unikairi mu musikyani, bushwa mbu iwe nge mwanani umă ho! <sup>39</sup>Ukiange wamatingirwa n'ekifwasi, hiha-hiha, emwana ntwirake, nti chamuinya-inya nguru n'erihúro nti ramutuka mu bunu. Ekifwasi ncho kitangamutuka mo tete, kimunubyanke nguru. <sup>40</sup>Nakongayo ebanafunsi\* babe mbu bahense cho, ina kárankuso.»

<sup>41</sup>Yesu wásũbya mbu: «Ah! Banu ebea b'ematu ano, banu bea bema! Murúkwa n'erisimira! Naserikayo ninu tu matu ánga? Niseshireyo kuni n'erirukira ebinwa binu? Rishá musikyabe hano.» <sup>42</sup>N'emwana ngo warekia weyanke hari Yesu, ekifwasi ncho chamutaa ekwansi n'imuinya-inya nguru. Ina Yesu wákéme cho, wáramya emwana n'imukurucha kuri ishe. <sup>43</sup>Ebea bati bashishara mu risúnga ebunkangwe bwa Ongo.

**Yesu waturá tu ebusibusurwa we**

*(Matayo 17.22-23; Mariko 9.30-32)*

Ebea bati barekia bashisharange mu binwa biti ebyamaronja Yesu, iwe wére ebanafunsi\* bae mbu: <sup>44</sup>«Munitée emate shu: Ani Mwana w'eMwea\* nisêsiburwa mu mine y'ebéa.» <sup>45</sup>Ina ibó batateereri ebweba ebinwa mbyo, bushwa mbu byabesengá byamabiswa kuri bo kongo batasibi byo, nabo basubaha imushísha buni nge bwebange byo.

**Inyé nge mukwakare?**

*(Matayo 18.1-5; Mariko 9.33-37)*

<sup>46</sup>Otu rumă, ebanafunsi ba Yesu básonda isiba inyé nge mukwakare munkati nabo. <sup>47</sup>Yesu warekia wamasiba emihaki yăbo, warisha mwana, wámuría hamushi nae, <sup>48</sup>wére bo mbu: «Emwea uti wasekokeyo emwana uno mu rina rani, ntyani ngwamanikóke. Na kinsi ngu wanikoke, wakoke íngu warinitúma. Bushwa mbu emwanunke munkati ninu nge mukwakare.»

**Kinsi ngu ntí murenda winu uri mu ruharo rwinu**

*(Mariko 9.38-40)*

<sup>49</sup>Ngyasingwanga Yohana wéba mbu: «eNyere kuritu, twákusunga mwea umă uhensange kifwasi mu rina rabe, twámuhangireyo, bushwa

mbu iwe ntí umă mu bate.» <sup>50</sup> Yesu wámusako mbu: «Kiro mumuhangire, bushwa mbu kinsi íngũ ntí murenda winu urikire mu ruharo rwinu.»

### eBasamaria batina ikóke Yesu

<sup>51</sup> Ematu erikuruka ra Yesu mu mbingu arekia ari këya, wásúnga mbu rakonda wataye ku Yerusaremu. <sup>52</sup> Watúma kasa bea bimă kubusondori nae. Bênda, bêya mu ubungu rumă rwa Basamaria\* kongo bamutunganyie ekwasehiere we. <sup>53</sup> Ina ebea b'erubungu ndo batina ikóke Yesu ku rwabo bushwa mbu wabesenga uteanange ienda ku Yerusaremu.<sup>b</sup> <sup>54</sup> Ebanafunsi\* bae, Yakobo na Yohana barekia basúngă mbo, beba mbu: «eNyere kuritu, ushima tuheme kashá kâhitiri bo ituka ekwio n'ishiria bo?» <sup>55</sup> Ina Yesu wíkebera kuri bo n'ifine bo. <sup>56</sup> Ituka mpo bênda mu rûmpě ubungu.

### Ebasondange itucha Yesu

(Matayo 8.19-22)

<sup>57</sup> Yesu n'ebanafunsi bae barekia bári mu munse, mwea umă wére Yesu mbu: «Nendí nikumisange ekuti kwasêta ōngo.» <sup>58</sup> Ina Yesu wámwire mbu: «Emiterere irikanga na biribu by'isáme mo, n'emirónge irikanga na birumba, ina ani Mwana w'eMwea\* nisira n'ehamusame ani.»

<sup>59</sup> Yesu wére umpě mwea mbu: «Nimise.» Emwea o nae wéba mbu: «eNyere kuritu, nikuhemange mbu nendi kasa kataa tita.»<sup>ch</sup> <sup>60</sup> Yesu wámwire mbu: «Rekê ebakwire batae ebakwi bábó, ina ōngo endá katura emwasi w'eBwami bwa Ongó\*.»

<sup>61</sup> Umpě mwea wére Yesu mbu: «eNyere kuritu, nendí nikumisange, ina nikuhemange mbu nendi kasa karaá eruanda rwani.» <sup>62</sup> Yesu wámusako mbu: «Emwea wámabuchá ihinga nukaengi tu kuruma, nti twâkomenwa ikora mu Bwami bwa Ongó\*.»

### Yesu watúamá banafunsi makumi arinda

(Matayo 10.7-16)

**10** <sup>1</sup> Kuruma n'ebinwa mbyo, Nyere kuritu wáronдора bampe bea makumi arinda.<sup>a</sup> Wátúma bábí-bábí bamusondori ieta mu kira ubungu na kira nku kwasondángá ienda we. <sup>2</sup> Wére bo mbu: «Emukene mwingi, ina ebakori nge bakeke. Nge bumbo, múkongé Nyere kuritu miné

<sup>b</sup> **9.53** Itukire karekare, eBayuta n'eBasamaria nti batashimanga. Bushwa nâncho, eBasamaria babesenga batânanga mbu eBayuta bete munkati n'echuo chábó mu rienda kahema ku Yerusaremu. <sup>ch</sup> **9.59** EkuBayuta, itáa tita ngerimuranga mu matu ebukúngú bwae ieya n'erotu rusekwayo we. <sup>a</sup> **10.1** Bimpe bitabo byeba mbu bea makumi arinda na bábí.

emukene wátumé bakori kákao. <sup>3</sup>Mwëndí! Ina mukohyanga! Nabutúma banu buri byana bya mburi munkati n'esambibi s'ebusara. <sup>4</sup>Anga muría behe, abe kimbesa, abe birato, kiro mukea mwea munkati n'ense. <sup>5</sup>Kinsi numba yakime mu banu, mukeanga kasa bo mbu: «Euhoro bubesi múno!» <sup>6</sup>Kuba mu numba njo muri mwea waráá mu buhóro, euhoro bwinu busie nae. Ina kuba ntí mbo, euhoro mbo busébukúruke tu banu. <sup>7</sup>Murikanga mu njo numba, murisanga n'iomu kiti-kiti chaninkwa banu, bushwa mbu emukori w'emurimo wakomenwa ininkwa ebihembo byae. Kiro mukime-kime mu kira numba. <sup>8</sup>Kinsi ubungu rúti rusekokerwa mu banu, murisanga kiti chaninkwa banu. <sup>9</sup>Muramyanga ebakoni b'erubungu ndo na mwebanga na bisa kuro mbu: «Bwami bwa Ongo\* ngie buri kwihi ninu.» <sup>10</sup>Ina mu kira ubungu rwákime mu banu, kuba bisa kuro ntíbabukóke, mwétanga mu mitangá nti banu mwerengi bo mbu: <sup>11</sup>«Twabutiture banu emukungú w'erubungu rwinu íngu uri mu bisando bitu. Ina musibiriranga mbu eBwami bwa Ongo ngie buri kwihi ninu.<sup>b</sup>» <sup>12</sup>Nibwiringi mu riíra, mu rotu rwa hende, mukusungayo muró irénga ku Sondoma.»

### Ubansa mu sambungu esatina isimira Yesu

(Matayo 11.20-24)

<sup>13</sup>Yesu wénderee n'ieba mbu: «Buhanya kuri óngo ubungu rwa ku Korasini! Buhanya kuri óngo ubungu rwa ku Betesaita! Bushwa mbu kuba ebishisharo byakuronjiwa banu byámúronjiwange ku Tiro na ku Sindoni, kongo bisa nko bamabunduká kare, bámúmarángo makunia n'irika mu mote mu rishea eminsori yábo, n'ireke esansambi sábó. <sup>14</sup>Ngyasingwa, erotu rwa hende, mukúsungayo muró irénga bisa ku Tiro na ku Sindoni. <sup>15</sup>Na óngo ubungu rwa ku Kaperenaumu, óngo'hakange mbu basékutarishayo mu mbingu? Ukúhichiwayo ekwirángá.» <sup>16</sup>Yesu wére tu ebanafunsi bae mbu: «Kinsi waburukira banu, ani ngwandúkíra, nángu wabutina, wanitina ani, n'ewanitina ani, watíná íngu wanitámanga.»

### Erikuruka r'ebanafunsi makumi arinda

<sup>17</sup>Kuruma nampo, ebanafunsi makumi arinda mbo bákuruka na ngoa nti bebange mbu: «Nyere kuritu, n'ebifwasi nabyo biturikirengi entambi turikítángo byo mu rina rabe!» <sup>18</sup>Yesu wére bo mbu: «Nasúngáyo Mushumbu\* uhúkángo buri kimpunya ituka ekwiyo. <sup>19</sup>Murukire! Nabuninka maa inanta nsoka na nkutú hima na maa ihundusa emurenda Mushumbu. Kusira tu kikai kiti-kiti chámabusindika. <sup>20</sup>Kai kiro mumoa

<sup>b</sup> 10.11 Soma Ruka 9.5; Mariko 6.11.

bushwa mbu ebifwasi biburukirengi, ina múmoe bushwa mbu emina inu amatirwa mu mbingu.»

### Erimoa ra Yesu

(Matayo 11.25-27; 13.16-17)

<sup>21</sup> Mu ntambi iya-iyā, eMutima Washurukara wárísia Yesu ngoa, nampo Yesu wéba mbu: «eTita, Nyere kuritu w'embingu n'echuo, nikutatange bushwa mbu ebinwa byabisanga ōngo ebea b'ebutesa n'ebasomi, umākandó byo mu băna banúnké. Ae Tita, ebiti mbyo ng'erisasa rabe.» <sup>22</sup> Nampo, Yesu wére ebea mbu: «Tita waréria ebikai bití mu mine yani. Kusira mwea unosi ani eMwana kuba ntí Tita, abe kusira mwea wosi Tita kuba ntí ani eMwana nămbi ebahunange ani mbu bāmúsíbe.» <sup>23</sup> Kuruma nampo, Yesu wabindúke ebanafunsi\* bae bisine, wére bo mbu: «Ebasungange ebinwa bisúngange banu, bakasanirwá! <sup>24</sup> Bushwa mbu, nibwirengi: batahwa\* bingi na babake bahunángá isúnga ebinwa bino bisúngange banu, ina ntíbarisúnga byo, n'irukira ebinwa birukirange banu, ina ntíbarerukira byo.»

### Mushinga w'eMusamaria murongu

<sup>25</sup> Kuruma nampo, muhani umă w'embyomba wásimana mwiereka Yesu. Wamushisha mbu: «eMuhani, mbeni namúronjá buni kongo nashée ekaramo k'ematu ati?» <sup>26</sup> Yesu wásúbya mbu: «Inki chatirwa mu myomba yitu? Buni nge burukirangă ōngo yo kuba usoma yo?» <sup>27</sup> Emwea ngo wásúbya mbu: «Ushimanga Nyere kurinu Ongo mu mutima wábé uti, mu mihaki yabe iti, mu maa abe ati na mu bwenge bwabe buti. Ushimanga hotu minu ímbu bwishima ōngo kisine.»<sup>ch</sup> <sup>28</sup> Nampo, Yesu wámwire mbu: «Umasúbyá shŭ, wenda uronjá ebwameba ōngo, kongo usheeyo ekaramo.»

<sup>29</sup> Ina emwea ngo, mwisonda kwíninka erífra, wáshísha Yesu mbu: «Na inye nge mitu?» <sup>30</sup> Yesu wásúbya mbu: «Mwea umă watukanga ku Yerusaremu mwihite ku Yeriko. Warekia uri mu munse, ebanyai bamuhenda, bamunyaa ebite byabesengá nae. Bamuhumbaka n'imusia mu nsanga nareke, bíire rabo. <sup>31</sup> Isisimuke, kwasaa kuhani\* umă uhitirengi mu'nse njo. Warekia wasúngă emwea o, wéta kumushi nae, wíteane rae. <sup>32</sup> Bumbo hotu, Murawi\* umă nae wéya mpo. Wakíanga wamusúngă, nae weitire mu uharo rwânse, na kwiire. <sup>33</sup> Ina Musamaria\* umă wabesenga wetange mu'nse njo, wéya mpo hari emwea ngo. Wakíanga wămusunga, wamukwire bonso. <sup>34</sup> Wákensere kwihi nae, wakubure mu bihuru ndifai\* na mafuta mwimushakire, wámína byo. Kuruma nampo, wamutarisha hiyo

n'embúndá yae, wamusicha hankambi y'ebeni n'irangana nae. <sup>35</sup> Mu richa r'ebutu, wakuto byunda bibí bya rufaranga n'itua byo kuri miné numba n'imwire mbu: «Uranganga emwea uno ishu, n'esafaranga siti sâkoresha tu ōngo hiyo nansi faranga mu rimushakire, nasekurucha to mu rikuruka rani.»»

<sup>36</sup> Ngerikia ke Yesu wáshísha ingo muhani w'eMyomba mbu: «Inyé mu bashatu bano ngwasúngá ōngo buri munachabo emwea íngu wahendwanga n'ebanyai?» <sup>37</sup> Emuhani w'eMyomba wásubya mbu: «Íngu wamukwiringa ebonso.» Nampo ke Yesu wámwire mbu: «Na ōngo hotu, wenda ukia mbo.»»



*Emusamaria murongu washákire emwea ngu wahumbwanga n'ebarénda. (10.34)*

### Yesu wakímé mwa Marita na Maria

<sup>38</sup> Yesu n'ebanafunsi bae barekia bendange, bakime mu kubungu kimă. Nánko, mũmína umă nge Marita wámukoke mu mwae. <sup>39</sup> Marita ngo nti uri na mot'we nti nge Maria. Iwe wêya karika kumushi na Nyere kuritu, mu ririkira ebyebange we. <sup>40</sup> Ina Marita iwe wabesenga nti utubatubange bushw'emirimo y'eriteka ebió. Ngyasingwanga wêya kuri Yesu n'imushisha mbu: «eNyere kuritu, utungakae bwakíá mot' wani wansiere emurimo ani kisine? Mwĩri mbu wanisaki.» <sup>41</sup> Nyere kuritu wamusubie mbu: «Marita! Marita! Ōngo utubatubange n'inuba mu bikai bingi. <sup>42</sup> Ina kuri kikai kimă ho nge charaísha. Maria iwe wamarondora muhango wakomá nguru íngu utâbakwiyo we.»»

### Yesu uhanange ebanafunsi bae ihema

*(Matayo 6.9-13; 7.7-11)*

**11** <sup>1</sup> Otu rumă, Yesu wabesenga uhemange Ongo fasi nima. Mu rihea ihema, umă mu banafunsi\* bae wámwire mbu: «eNyere kuritu, tuhanise ihema, bwakíángá Yohana wáhana ebanafunsi bae.» <sup>2</sup> Yesu wére bo mbu: «Entambi banu muhemange, mwendi banu mwebange buno mbu:

«Tita!

Erina rabe ritatwe,

eBwami bwabe bweye.

<sup>3</sup> Wendi utuninka ebió bitu kirotu.

<sup>4</sup> Wendi utusasira esansambi situ, bushwa mbu na bate hotu tusasiranga ebati mbi batukorengi bibí, angiturekerere ikire mu myereko.»»

<sup>5</sup> Kuruma wére tu ebanafunsi bae mbu: «Kuba umă mu banu Ƴri na mira'we, nae wámamwendere munkati ebutu n'imwire mbu: «Era mira'ni, nisombye mikati ishatu, <sup>6</sup> bushwa mbu umă mu bira bani wamaneyere na Ƴri mu ruendo, nani namarúkwá bió by'imushee.» <sup>7</sup> Năngu Ƴri kumunda n'enumba kuba wamámusubiě mbu: «Ndeki, angininubya! Namakinda irindika erubi. Ani n'ebăna bani twamikinde, ntakochi tu isimana bushwa ho n'erikuninka emikati.» <sup>8</sup> Nibwirengi mbu, nakiro ngu Ƴri kumunda enumba watamurindo bushwa erimuninka emikati bushwa n'ebwıra ho, ina wamusumukă n'imuninka ebiti ebimuhemange we bushwa n'erikwimíma rae.

<sup>9</sup> «Nani nibwirengi mbu: mwendi muhema kongo mwendi munínkwa, mwendi músonda kongo mwendi mushée, mwendi mukongota kongo bendi báburundurengi erubi. <sup>10</sup> Ngyasingwa, kinsi mwea íngu uhemange ng'uninkwanga, năngu usondángo ng'ushéenga, năngu ukongotange ng'urundurirwanga erubi. <sup>11</sup> Inyé ishe wa mwana wamámuninkă nsoka kuba emwanae wamukonga kikwa? <sup>12</sup> Abe wámuninke nkutú kuba wamukonga í? <sup>13</sup> Banu kasa bea bema, ina banu mwosi ininka ebana binu bikai byahundá, nge rashea mbu Tita winu wa mu mbingu waseninkanayo eMutima Washurukara kuri mbi bamukongane!»

### Yesu wahensá ebifwasi

(Matayo 12.22-30; Mariko 3.22-27)

<sup>14</sup> Otu rumă, Yesu wabesenga uhensange kifwasi inchi chabunduranga mwea umă wabe karumbu na mutwitwi. Ekifwasi ncho chakianga chatukă, hiha-hiha emwea ngo wabucha ieba. Ebea bashishara nguru. <sup>15</sup> Ina bimă munkati nabo, ibó báburu mbu: «Emwea ngu uhensange ekifwasi mu maa a Bereseburi, mukwakare w'ebifwasi.» <sup>16</sup> Na bampe bahuna imweka, bamukonga mbu waronjei bo kengeko káshéá mbu ebishisharo byae bitukange kwa Ongo. <sup>17</sup> Ina bushwa mbu Yesu wasibanga emyanikiri yăbo, wére bo mbu: «Kuba bea b'ebwami buma bamakwana ibó mu ibó, ebwami mbo nti bwahona. Kuba tu ebana b'eruanda rumă bákwaná ibó mu ibó, eruanda ndo nti rwakire. <sup>18</sup> Ramabese ke mbu Mushumbu\* wikwánishá wisine, ebwami bwae butakochi tu isimana. Nibwirengi mbo mu risúnga banu mwebange mbu ani nihensange ebifwasi mu kăra ka Bereseburi. <sup>19</sup> Na kuba ke ani nihensange ebifwasi mu kăra ka Bereseburi, mbeni ebashukira

binu bahensange ebifwasi mu kăra kányé? Ngyasingwa ebashukira binu mbo basebushéáyo mbu banu baríú <sup>20</sup>Kúti ani nihensange ebifwasi mu kăra ka Ongo, ngerieba mbu eBwami bwa Ongo\* bwamakinda ieya kuri banu.

<sup>21</sup>«Kuba emurai wambara ebikai biti byae by'erikwana nabyo mwiranga enumba yae, himpo ebehe byae byarangwa mu buhóro. <sup>22</sup>Ina wámahendwa na umpě murai wamurenga, nampo wasemubaka ebikai biti byae by'erikwane ebinyihire rero we n'ibanya ebikai by'emushokoro. <sup>23</sup>Kinsi mwea ngu ntúri hima nani nti murenda wani, na kinsi mwea watangasonja hima nani usebese nti unsansabanyange.»

### Emakurukiro ekifwasi mu mwea

(Matayo 12.43-45)

<sup>24</sup>Yesu wênderana n'erieba mbu: «Ekifwasi chamakindi'tuka kumunda n'emwea nti chatúbatúba mu bweru mwisondekanya maruhukiro. Chámarukwa maruhukiro, nti cheba mbu: «Nasekuruka mu numba yani emwakituka ani.» <sup>25</sup>Chámakuruka, chákumana enumba yahairwa n'itondwa shú. <sup>26</sup>Himpo ke, chasênda kăringa bimpe bifwasi birinda byema nguru imurénga, nabyo nti byakime n'irika mo. N'emwea o wasebinduka wemá nguru irénga mbu ebwabesenga we raroso.»

### Emukisa w'eriíra

<sup>27</sup>Yesu warekia webange ebinwa mbyo, mămína umă munkati n'enteko wákua murenge mukiri mbu: «Emumína íngu wakubutangá n'ikurisha mabere, wakasanírwa!» <sup>28</sup>Ina Yesu wásúbya mbu: «Ebakasanírwa nge bimbi barukirange n'ironja mbu bweba ekinwa cha Ongo.»

### Ebea bákónga Yesu wakorí bo kashingishiro

(Matayo 12.38-42)

<sup>29</sup>Bea bingi barekia batumanange hari Yesu, iwe wabucha ieba mbu: «Ebea b'ekiranga kino bema. Basondángé isúnga kashingishiro. Ina bátásúngíyo ko kuba ntí inki ka Yona. <sup>30</sup>Bushwa ebwabesanga Yona kashingishiro mu bea ba ku Ninawi,<sup>a</sup> nge bwabeseyo hotu ani eMwana w'eMwea\* kashingishiro mu bea ba runotu. <sup>31</sup>Mu rotu rwahende, Nyamumbo íngu watukirenga kumbo echuo<sup>b</sup> wasêfukayo hima ninu banu bea b'ematu ano kongo wabusongere. Bushwa mbu iwe watukirenga kore nguru mwienda karukira binwa by'ebutesa by'emubake Soromono. Na hano nge harikire ngu waréngá Soromono!

<sup>a</sup> 11.30 Soma Yona 3.3-5. <sup>b</sup> 11.31 Soma 1Bami 10.1-10.

<sup>32</sup>«Erotu rwa hende rwákii rweya, bïsa ku Ninawi nabo basefukayo hima ninu ebea b'ematu ano n'ibusongere. Bushwa ibó babundukángá n'ireke esansambi sábó bakiangá barukirá emahubiri a Yona! Na hano nge harikire ngu waréngá Yona!»

**Eriso ng'eritára r'emubi**

*(Matayo 5.15; 6.22-23)*

<sup>33</sup>«Kusira mwea usachanga eritára na wabise tu ro abe wabumbi ro na mbeketi. Ina urembeanga ro mu kango kongo ebea bakimengi basunga chaka. <sup>34</sup>Emeso ng'eritára r'emubi. Kuba emeso abe akaengi shu, emubi wábé uti userika mu chaka. Ina kuba emeso abe abihá-bihá, emubi wábé na o hotu usebese mu mwirimya. <sup>35</sup>Bushwa náncho, ukohyanga. Echaka kírí kumunda nabe kitabinduki mwirimya. <sup>36</sup>Kuba emubi wábé uti uri mu chaka na kusira kitambo inchi kírí mu mwirimya, kai emubi wábé uti na o wasebese mu chaka, ímbu bakianga eritára rakurishie chaka.»

**Yesu watondé eBafarisayo n'ebahani b'eMyomba**

*(Matayo 23.1-36; Mariko 12.38-40)*

<sup>37</sup>Yesu wakianga waheä ieba, Mufarisayo\* umä wére Yesu wêndi karisa bió mu mwae. Yesu wênda mo n'ibucha irisa. <sup>38</sup>eMufarisayo ngo wáshishara isúnga Yesu warísa na nti twákushua emine. <sup>39</sup>Nampo Nyere kuritu wámwire mbu: «Banu Bafarisayo, banu mushúanga ho ekusungwange mu rusára na mu ntengi. Ina banu murisere mbusha ya bwibi na bumpe bubí kumunda ninu. <sup>40</sup>Banu birunge! Ntí banu mwosi mbu íngu wabúmbángá imbi bisúngwange ngwabúmbánga hotu kumunda? <sup>41</sup>Kai mwendi musake ebasene n'ebikai imbi birikire kumunda n'esansara sinu nãmbi birikire kumunda n'esantengi sinu. Múmaronjá mbo, ebiti biseshurukara mu mongerero winu.

<sup>42</sup>«Murikíndá iherwa banu Bafarisayo\*! Banu muninkanga Ongo echakumi ch'ematumguru, na ch'isusa, na ch'esanyenyi siti. Ina banu munénángá eriombokara n'inéna erishima Ongo. Bimbyo nge byakomenwa rero ienda bikorange banu. Kiro mwobya tuna erikuto echakumi ch'ebimpe mbyo.

<sup>43</sup>«Muriherwa banu Bafarisayo\*! Banu mumoerenga irika mu bitumbi bya kubusondori mu masinangoki\*. Banu mumoerenga tu ná kubá ikeiwa n'isubahwa n'ebea mu sankumanano. <sup>44</sup>Muriherwa banu! Mususanyiwa n'emasinda ingi asirá tu biteerere, ebea bánantángé o nti tíbasiba tu mbu hari masinda.»

<sup>45</sup>Umä mu bahani b'eMyomba wére Yesu mbu: «eMuhani, mu rieba ongo mbo, na bate utukamba.» <sup>46</sup>Yesu wámwire mbu: «Na banu ebahani



b'eMyomba, muriherwa! Banu murieshanga ebea mirio yaritohyaa, ina banu bisine mutwerekanga itinge mu yo mu risake bo.

47 «Muriherwa banu! Banu mwimbishanga emasinda ebatahwa\*, ná kubá batitanku binu nge báshurangá bo. 48 Rashea mbu banu mubéré n'emikorere ya batitanku binu, bushwa mbu basuku báshurangá batahwa, na banu nge mwimbengi bo emasinda. 49 Nge chasingwangá Ongo mu butésá bwae wéba mbu: «Naseburebeka batahwa hima na ntumwa\*. Baseshurayo bimă n'inubya bampe mu bo.» 50 Ngyasingwa ebea b'ematu ano basetuayo enchama y'ebatahwa eyakubukanga itukire echuo chabumbwa, 51 itukire erishurwa ra Aberi ieya na mu rikwa ra Sakaria<sup>ch</sup> ewashurwanga mu Numba ya Ongo\* munkati n'ebutánda bw'emaherero n'endikaro yashurukara. Íra, nibwirengi mbu enchama y'ebea bati mbi bashurwanga isebeseyo hambasiro n'emintwe yinu.

52 «Muriherwa banu ebahani b'eMyomba! Mumabisa erufunguo rw'eririndo erubi rw'erisiba Ongo. Mutukimenga mpo banu bisine. Nám bi basondange ikime, banu mómínírenga bo erubi.»

53 Yesu warekia wamasaa mu numba y'eMufarisayo\* ngo, ebahani b'eMyomba\* hima n'eBafarisayo babucha imusubuke nguru n'imushishashisha binwa bingi. 54 Benda bamwekange binwa kongo bashée buni bwasemusongere bo.

### Mahano kuri ebea b'enkuse

(Matayo 10.26-27)

**12** <sup>1</sup>Mu kashá ngi kika-kika, esangenche ningi sa maerefu a bea bákúmánana nti banyantanange. Yesu wabucha kasa ieba n'ebanafunsi\* bae mbu: «Mwiranganga n'echachu y'eBafarisayo\*, ngerieba mbu enkuse yábo. <sup>2</sup>Kinsi chabiswa kisetaburwayo, na kinsi nama isesibwayo. <sup>3</sup>Ngyasingwa ebinwa biti bisébá banu mu mwirimya biserú kirwayo munkati echaka. N'ebinwa biti bisebayo banu mu nama ekundani kwabisama, biseturwayo hamambio.»

### Íngũ wakomenwa isubahwa

(Matayo 10.28-31)

<sup>4</sup>Yesu wenderana nieba mbu: «Nibwirengi banu bira bani, anga musubaha rotu imbi bamukochă ishura emubí ho, na batakoché ironja tu kímpě kikai irénga cha. <sup>5</sup>Nisebushéa íngũ mukomenwa isubaha: mwendi musubaha Ongo bushwa mbu iwe, wamakinda ishura, iwe nge

wamúkocha tu itáa emwea mu marunga. Mu riíra, nibwirengi mbu iwe nge mukomenwa isubaha!

<sup>6</sup>«Kasa bishwi bisanu bisirá busí! Ina Ongó iwe wosi kinsi kimă mu byo. <sup>7</sup>Iwe wosi iansa n'ebuteo buti bw'emintwe yinu. Kai kiro mwendi musubaha, bushwa mbu banu muraisha nguru irénga bishwi bingi!»

### **Erisimira n'erítúna Yesu Kirisitu**

*(Matayo 10.32-33; 12.32; 10.19-20)*

<sup>8</sup>Yesu wéba tu mbu: «Nibwirengi mbu kinsi mwea wanirisia munkati na bea, ani eMwana w'eMwea\* nani nisekurisiayo munkati n'ebamaraika\* ba Ongó. <sup>9</sup>Ina kinsi mwea wasenitúna munkati na bea, basemutúnayo nae munkati n'ebamaraika ba Ongó. <sup>10</sup>Kinsi mwea webá bubí kuri ani eMwana w'eMwea, wasesasirwayo, ina kinsi mwea wakambá eMutima Washurukara, iwe watasasirwiyo.

<sup>11</sup>«Ebea basekiayo baburia kabuhukumu mu masinangoki\*, abe mu makako ebakwakare n'ebikondó, kiro mwianya mu binwa bisesubayyo banu, abe imbi bisebayo banu. <sup>12</sup>Bushwa mbu hiha-hiha eMutima Washurukara usebushéayo ebinwa byakomenwa ieba banu.»

### **Mushinga w'emutumba kiténgi**

<sup>13</sup>Mwea umă munkati n'enkumanano wére Yesu mbu: «eMuhani, eba na munakitu wambesi emuhango wani mu mwandu watusierenga tita.» <sup>14</sup>Yesu wamushisha mbu: «Era! Inyé ngwakunironja ibinduke mushunguri winu abe mubanyii w'ebutumba bwinu?» <sup>15</sup>Nampo Yesu wére ebea bati mbu: «Mukohyanga, kiro mwendi mubese na karawa ka behe, bushwa mbu ebehe bitakoche iranga ebuingo bw'emwea, nakiro mbu wamubesě mutumba nguru.»

<sup>16</sup>Yesu wákere bo emushinga uno mbu: «Kwarikanga mutumba umă wabesenga na mashwă. Emashwa ngo áse mo mukene mwingi. <sup>17</sup>Wabucha ianikira na kwishisha mbu: «Nikie buni buno bwarukwa ani buari bw'ibike mo emukene wani uti?» <sup>18</sup>Nampo ke wéba mbu: «Niseronja buno: nasekakura esambicho sani kongo nimba simpě nkiri-nkiri sibike mo emukene wani, n'ebimpe behe byani. <sup>19</sup>Kuruma nampo, ani kisine nasiebishayo mbu: "Ani namibike behe bingi itukire myăka mingi. Kai ngíe namiruhuke, nírise, n'omu n'imoa."»

<sup>20</sup>«Ina Ongó wámwire mbu: «Rero-rero óngo kiténgi! Mu butu bwa runotu, óngo ukúkwă. Nampo ke, ebikai biti byarekwibike óngo byasebese byanye?»»

<sup>21</sup>Yesu wámína ke kinwa mbu: «Bimbyo nge bibesengă kuri emwea íngũ wibikengi behe bingi wisine, ina iwe ntíwanswa ibese na kikai mu makako a Ongó.»

### Erikwinyihire Ongó

(Matayo 6.25-34)

22 Kuruma nampo, Yesu wére ebanafunsi\* bae mbu: «Ngyasingwa nábwiré mbu: kiro mwianya bushwa n'ebuingo bwinu, bushwa n'ebiserisa banu, abe kiro mwinubya bushwa n'emibi yinu kuba mukûmbarâ inki. 23 Bushwa mbu ebuingo bwaréngá ebió n'emubi waréngá esanchangi. 24 Musunge ebikona: bitékanga mirime, bitakaonga ná kubá, bisirá buari bw'ibike mo mukene na bisirá mbicho. Ina Ongó uríshanga byo. Kasa banu muréngá kore emirónge! 25 Inyé mu banu, bushwa n'erikwianya rae, wamitarike otu ho rumá mu buingo bwae? 26 Kuba ke mutukoche ironja kikai kikeke buri ncho, banu mwianyange mu bikai bimpe bushwa nki? 27 Musunge kasa ebushukangá esantondo mu mashwá. Sitakoranga murimo, anga kwiruke na nchangi. Ina nibwirengi mbu nakiro emwami Soromono, mu busimé bwae, ntwâambarangá nchangi yakón da yaréngá n'entondo nima. 28 Kuba ke Ongó wambichange bisu by'emashwa, imbi bisungwange runotu na bisekâma mukómá n'itawa n'ishikwa, kai ke watamubumaricha shu banu b'erisimira rikeke?

29 «Kai kiro mwianya mwisondekanya ebyârisa n'iomu banu. 30 Ebapakani b'echuo kino ibó nge basondekanyangá ebikai biti mbyo. Ina banu, Iso winu wosi mbu muráé mu bikai biti mbyo. 31 Kai banu mwendi musodekanya eBwami bwa Ongó kasa, nae usebutarikeyo ebikai bino biti.»

### Erikwibike ebütumba mu mbingu

(Matayo 6.19-21)

32 Yesu wére tu bo mbu: «Banu bea bakeke, kiro mwendi musubaha! Bushwa mbu Iso winu washimanga ibuninka eBwami bwae. 33 Mwendi muchuya ebikai byinu mu risake ebasene. Mwendi mwibike busoki ímbu butabihiyo na butasiriyo, nge kiku kitasiriyo mu mbingu. Inko, éyibi bateyiyo ko n'erunsenge naru rutarisiyo ebehe mbyo. 34 Bushwa mbu impi habike banu ebütumba bwinu nge harikangá n'emitima yinu.»

### Eririndire ikuruka r'eMwami

35 Yesu wére tu bo mbu: «Mwendi murika nti banu mwitunganyanyange ikora murimo n'ematára inu na o nti arika asakange. 36 Mubesenga buri bakori barindirengi nyere kurwabo utukange ekundoa, kongo entambi iserembérá we n'ikongota, hiha-hiha nti bamurundure erubi. 37 Bakasanirwá ebakori imbi basekumanwayo báshéré entambi iseyayo we! Nibwirengi mu rífra mbu: wasembarayo enchangi y'emurimo, warikechi bo n'ishee

bo bió. <sup>38</sup>Bakasanirwá ebakori imbi basekumanwayo na Nyere kurwabo nti báshéré munkati ebutu abe mu richa r'ebutu nti bákírí bamurindirengi.

<sup>39</sup>«Musibanga mbu kuba miné numba wamusibange rero entambi yameya emwibi kashuma mu mwae, watumusiange enumba yae ikakurwe.

<sup>40</sup>Kai na banu mukohyanga, bushwa mbu ani eMwana w'eMwea\* nisekurukayo mu ntambi ntíyaanikire rero banu.»

### Emukori wakomá n'emukori wemá

(Matayo 24.45-51)

<sup>41</sup>Nampo Petero wáshísha Yesu mbu: «eNyere kuritu, mbeni emushinga watukere ōngo watukae ho bate bisine abe w'ebea bati?»

<sup>42</sup>Nyere kuritu wásúbya mbu: «Inyé ke nge kapíta k'eriíra na kárí na bwenge? Nge íngu watúmwa na nyere kurwabo mwisimane babine ininka bo bió mu ntambi yakomenwa. <sup>43</sup>Kakasanirwa ekapíta nko kuba kakumanwa kákiri kakorange emurimo entambi yakuruká nyere kurwabo. <sup>44</sup>Nibwirengi mu ríra mbu: nyere kurwabo waseria ho ekapíta nko kasimanirí ebehe byae biti. <sup>45</sup>Ina ekapíta nko kuba kiebesha kisine mbu: «Nyere kuritu wasíá nguru kwendanga we!» N'ibucha ihúmba ebakori banachae babume na bamína, n'ibucha írisa, n'ibucha iomo n'itamira. <sup>46</sup>Ekapíta nko, Nyere kurwabo usekurukayo erotu ntírwaanikira we n'ekashangi ntíkosí rero we. Nampo Nyere kurwabo wasemukekeraa mo byunda bibí n'imúsúnga buri umá mu mbi bea ntíbinyihirwa.

<sup>47</sup>«Emukori ngu wosi ebyashima nyere kurwabo, ina wámarúkwa kwitunganyanya n'irúkwa ikora imbi byashima nyere kurwabo, waseraswayo tushushu twingi. <sup>48</sup>Ina emukori íngu wamubesě ntwosi ebishimangá nyere kurwabo, wamakora ebyamusingwa wahumbwa, waseraswayo tushushu tukeke. Emwea waninkwanga bingi, wasekongwayo bingi. Nāngu wabichiwanga bingi waseshishiwayo bingi nguru.»

### Yesu weyangá kasianya ebea

(Matayo 10.34-36)

<sup>49</sup>«Neyángá kataa kashá mu chuo, na namushimange nguru kábesí nti kamasaka! <sup>50</sup>Naria murio wa minúbo íngu wakomenwa iría ani. Na ninubange nguru mu mutima ieya nāmbu bwakíá eminubo njo yábererera! <sup>51</sup>Mbeni banu mwanikirange mbu nareya karisha buhóro mu chuo? Anga! Nibwirengi mbu nareya kārisha isiana. <sup>52</sup>Itukire runotu, bea basanu b'uanda rumá basesiana. Bea bashatu bendi babanganange na bábí, na bábí bendi babanganange na bashatu. <sup>53</sup>Bamwāna n'ishe bendi babanganange, na kikumí na nina bendi babanganange. Bamwasáná n'inabe bendi babanganange.»

**Isiba ebiteerere by'esantambi***(Matayo 16.2-3)*

**54** Yesu wére esangenche s'ebea nabo hotu mbu: «Mumasúnga erutundo rwsaire mu ruharo ruraamanga mo emwishi, hiha-hiha banu mwebanga mbu: «embura iseeke», nayo nti yake ná kubá. **55** N'entambi isúnganga banu eriũũ rasaire uharo rwa kumbo, banu mwebanga mbu: «Kusebese chuka kingi», n'echuka nti chabesa hona. **56** Banu bea ba nkusé! Banu musibanga ebiteerere by'echuo na by'ekwiyo, bushwa nki mufundwa iteerera ebinwa byetange ematu ano?»

**Murongane n'ebarénda binu***(Matayo 5.25-26)*

**57** Yesu wéba tu mbu: «Inki chasingwa banu mutukoche ikora kinwa chakonda inchi chakomenwa ikorwa? **58** Úmenda kaburana na mwea, wisumyanga urongane nae munkati n'ense. Kuba ntí mbo, wasekusongere mu makako emushunguri, n'emushunguri nae wamukuría ekubaporisi, n'eporisi nae ntwákutaa mu mwiwóróró. **59** Nikwiréngi mbu utukoche isáa mo kuba ntí utua nensi erufaranga rwa hende.»

**Rakomenwa ireke esansambi**

**13** **1** Mu ntambi njo, bea bimă bêya kature Yesu emwasi ímbũ bwakíángá Pirato watúma bea kashiria bîsa ku Ngariraya bimă, imbi babesenga bachinjange esanyama s'erisibure Ongo. **2** Yesu wáshisha bo mbu: «Mbeni banu mwanikirange mbu bîsa ku Ngariraya mbo bakushurwa bumbo, bushwa mbu babesenga bea ba nsambi irénga bîsa ku Ngariraya bampe bati? **3** Anga ntí mbo! Ina nibwirengi mbu kuba ntímubunduka ireke esansambi sinu, na banu bati mukúshiriră bumbo hotu. **4** N'ebea ikúmi na munani ebásikírwanga n'enumba nere mu rubungu rwa ku Siroamu, mbeni banu muhakange mbu ibó babesenga nge bea bema irénga bîsa ku Yerusaremu bati? **5** Anga ntí mbo! Ina nibwirengi mbu kuba ntímubunduka ireke esansambi sinu, na banu bati hotu mukushiriră bumbo».

**Mushinga w'emuti íngu ntíwarebuta byuma**

**6** Kuruma nampo, Yesu wákere bo emushinga uno mbu: «Kwabesenga mwea umă wéka mutí wa tini mu rishwa rae r'emisabibu. Otu rumă, wéya kăsonda mu o byuma, ina wárúkwa mo kiro n'echuma kimă. **7** Nampo, wére emukori w'erishwa rae ndo mbu: «Kaé ke! Ngíe myăka ishata ino neyanga kăsonda byuma mu mutí uno w'etini, ina kárankuso! Konda o, bushwa

mbu ubisha-bishange ho eroto busa-busa.»<sup>8</sup> Ina emukori ngo wámusako mbu: «Nyere kuritu, rekerere tu kasa o mu mwăka uno. Năshekere tu o n'itereka mu o bumpe buinú.»<sup>9</sup> Kuri ntambi wámubuta byuma mu mwăka musindu, na kuba ntiwabúta ho, nti ngié ukûkondă o.»

### Yesu waramyá mămína umă otu rwa Sabato

<sup>10</sup>Otu rumă rwa Sabato\*, Yesu wabesenga uhanange ebea mu sinangoki\*.  
<sup>11</sup>Kai mu sinangoki mo nti muri mămína umă mukoni. Emămína ngo wabesenga wamaronja myăka ikúmi na mumane nt'unubiwange n'ishumbu. Erishumbu ndo rabesenga rarimukunya, na nti watakochange tu ioro emongo.  
<sup>12</sup>Yesu warekia wamusúngă, wamubikira n'imwire mbu: «Ekoyo, umakíndă irama ebukoni bwabe.»  
<sup>13</sup>Nampo Yesu wátereka emine yae kuri we, nae wôro emongo hiha-hiha n'ibucha itata Ongo.

<sup>14</sup>Ina emukwakare w'esinangoki\* wásúnga bubí bushwa na Yesu mu riramyá mwea mu rotu rw'eSabato\*. Bushwa năncho, wére ebea ebabesenga batumáná mpo mbu: «Kurikanga matu mutuba ikora. Mwendí mweyange karamyiwa mu matu ngo, ina kiro rwabunduke otu rwa Sabato!»

<sup>15</sup>Ina Nyere kuritu wámusako mbu: «Banu bea ba nkusé! Mbeni inyé mu banu íngu wataboranga enkambu abe embúndă yae hamínirwangă yo n'ienda komosha yo mecha otu rwa Sabato\*?»  
<sup>16</sup>Emămína uno w'erubuto rwa Ibrahímu, wabesenga waminwá na Mushumbu\* myăka ikúmi na munani, mbeni ntwakomenwa rero iborwa erotu rw'eSabato?»

<sup>17</sup>Yesu warekia wameba mbo, ebarénda bae bati bákwa nkene. Ina enteko iti y'ebea yákokoma mwisúnga emikorere y'ebishisharo bití ebyabesenga bikorange we.

### Mushinga w'ekambuto kakeke nguru

(Matayo 13.31-32; Mariko 4.30-32)

<sup>18</sup>Kuruma nampo, Yesu wéba tu mbu: «Mbeni eBwami bwa Ongo\* bwamusana nânki? Namususanya bo nânki?»  
<sup>19</sup>eBwami mbo bwamusanyiwa na kambuto kakeke ka harandari, inki kákíangă mwea umă wátíngé n'ieka ko mu rishwa rae. Embuto njo y'oshuka, yábese ke mutí mukiri, n'emirónge yéya k'umba birumba mu santabi saó.»

### Emushinga w'echachu

(Matayo 13.33)

<sup>20</sup>Yesu wéba tu mbu: «Nisesusanya eBwami bwa Ongo\* nânki?»  
<sup>21</sup>eBwami mbo bwamusanyiwa na chachu eyakianga mămína umă wakubure yo mu nengo ishatu sa nchano y'ironja mikati, ieya na mu ntambi nji enchano iti yábímba.»

### Erubi rwekene

(Matayo 7.13-14,21-23)

22 Yesu warekia wendange ku Yerusaremu, wéta mu mbungu nkiri-nkiri na mbungu nkeké-nkeké nt'uhanange ebea. 23 Mwea umă wamushisha mbu: «eNyere kuritu, mbeni bea bakeke ho nge baseshukarayo?» Yesu wásubíe ebati mbu: 24 «Mwisumyanga ikime mu rubi rwekene. Bushwa nibwirengi mu riíra mbu bea bingi baseerekayo mbu bakimi mu ró, ina bátâkochiyo.

25 «Etambi miné numba wakíí wamasimana n'irindika erubi, mukûsiayo hambuka n'ibucha ikongota erubi, n'ieba mbu: «Nyere kuritu, turunduri!» Ina wasebusakoyo mbu: «Muntukiriri, ntínosi kusairengi banu.» 26 Nampo ke mukubuchayo imwire mbu: «Twabeséngá turisange n'iomu hima nabe, ubesenga ongo uhanange ebea mu mitangá ya kuritu.» 27 Ina iwe wasebusakoyo tu mbu: «Ntínosi ekusairengi banu. Mutuke kwihi nani, banu bati bakori bema.»

28 «Mukusungayo Iburahimu, Isake, Yakobo n'ebatahwa\* bati mu Bwami bwa Ongó\*. Ina banu mukurekerwayo habutara! Năńko mukûreyo n'ishiisha emeno. 29 Ebea basesaireyo ekuti mu chuo, nabo baserikayo nti barisange bió hima mu Bwami bwa Ongó. 30 Murukire! Bimă mu basindu runotu basebeseyo baroso, na bimă mu baroso runotu basebeseyo basindu.»

### Yesu wariré erubungu rwa ku Yerusaremu

(Matayo 23.37-39)

31 Mu ntambi njo, Bafarisayo\* bimă beyere Yesu n'imwire mbu: «Tukă hano, írî rabe kumpe, bushwa mbu Herote usondáńge ikushura.» 32 Yesu wásako bo mbu: «Mwëndí kere emuterere o mbu runotu na mukómá nasêhensa ebifwasi n'iramya ebakoni, na mukakóma nasekindanya emurimo wani. 33 Kasa nahwa imisa eruendo rwani runotu, mukómá na mukakóma, bushwa mbu emutahwa\* ntwakomenwa ishurwa mu rûmpě ubungu kuba ntí ku Yerusaremu.

34 «Banu bísa ku Yerusaremu! Banu nge mushuranga ebatahwa\*, n'esantumwa sibatumirengă Ongó banu mushuranga to na makoi. Meta mingi năkusondá ibusonja bukíanga enkókó yasonja etunyau kumunda ebyubi byae, ina banu mwítínire! 35 Murukire ke! Erubungu rwinu rusesia kima. Na nibwirengi mu riíra mbu: mutunisungiyo tu ieya n'erotu rusebayo banu mbu: «Wákasaniirwé íńgũ weyá mu rina ra Nyere kuritu.»<sup>a</sup>

<sup>a</sup> 13.35 Soma Saburi 118.26.

**Yesu waramyá mukoni mu rotu rw'eSabato**

**14** <sup>1</sup>Otu rumă rwa Sabato\*, Yesu wênda kara bió mu numba ya mukwakare umă wa Bafarisayo\*. Ebea mbi babesenga kumunda n'enumba bárika nti bamukairirengi mwisúnga ebisekora we. <sup>2</sup>Na habusondori na Yesu, kai nti hari mwea umă wasamba bukoni bwibimbabimba emubi. <sup>3</sup>Yesu wáshísha ebahani b'eMyomba n'eBafarisayo mbu: «Mbeni eMyomba yitu yarisía abe yahangire iramya mwea otu rwa Sabato?» <sup>4</sup>Ina bíbebere. Nampo ke, Yesu wátíng'e mu mukoni, wamuramya n'imwire mbu wêndi rae. <sup>5</sup>Kuruma nampo, Yesu wáshísha ebea mbo mbu: «Inyé munkati ninu, emwana wae abe enkambu yae yámahuka kumunda n'ekiribu cha mecha, wamurukwă ieya tete n'ikuto yo mo bushwa ho mbu otu rwa Sabato?» <sup>6</sup>Ina ntíbakochanga isako mu binwa mbyo.

**Ongo wasétarisha imbi bihíchá**

<sup>7</sup>Yesu warekia wamasunga ebukiange ebakubikirwa bitóma eburiki bwa roso, wáninka bo ihano mbu: <sup>8</sup>«Kuba mwea wakubíkíra mu ndoa, angienda utairire irika mu kitumbi cha kubusondori. Munantambi kwakubikirwa umpě mwea wakurenga itúndá. <sup>9</sup>Năngu ewakububikiranga banu bábí wámeya, wákwírí mbu: «Sierě uno ekitumbi warike.» Nampo ukúsimană n'ienda karika mu kitumbi cha kuruma na nkene singi. <sup>10</sup>Ina kuba ubikirwa, wendanga kárika mu kitumbi cha kuruma, kongo íngu wakukubikiranga wasekía wêya, wákwírí mbu: «Emirani, iya kúno kubusondori.» Nampo ukúbésě nti umaninkwa itúndá munkati n'ebea bati mbo ebaríréngi hima. <sup>11</sup>Ngyasingwa kinsi mwea witaríshanga wasehichiwayo, na ngu wihichanga wasetarishiwayo.»

<sup>12</sup>Kuruma nampo, Yesu wére emwea ewakumubikiranga mbu: «Kuba ōngo ubikirange ebea mu karamu, rabesa mukoma-koma abe mwiyo, kiro ubikira ho bira babe, abe basike binu, abe ebuti babe, abe ebatúmbá imbi bári mwendende nabe, kongo nábó bákubíkírayo. Nampo risebeseyo buri ikukuruchie ebyaninkanga ōngo bo. <sup>13</sup>Ina kuba ubikira bea mu karamu, wendi ubikira ebasene, esankáta, ebirema, n'ebihumihumi. <sup>14</sup>Nampo, Ongo wasekukasane bushwa mbu ebea bano basiră ch'erikukuruchie. Na wasekukuruchieyo erotu rusekiayo ebakorangá byakonda báfuka.»

**Emushinga w'erirísa ebió mu Bwami bwa Ongo**

*(Matayo 22.1-10)*

<sup>15</sup>Mwea umă mu bea ebabesenga barisange hima na Yesu, wakíanga warukirá ebinwa mbyo, wére Yesu mbu: «Wakasanírwá emwea íngu userayo bió mu Bwami bwa Ongo\*.»



<sup>16</sup> Yesu wámukere emushinga uno mbu: «Kwarikanga mwea umă wáronja bió bya karamu, wábikira bea bingi. <sup>17</sup>Entambi y'eririsa yarekía yamarumira, watúma emukori wae wêndi kere ebakubikirwa mbu: «Mweye ke bushwa mbu ebikai bitu byamarumira.» <sup>18</sup>Ina kira mwea wabucha kwireme. Waroso wámwire mbu: «Nakuchura ishwa, na nahwa ienda kasunga ro. Nikuhemange unisasire.» <sup>19</sup>Umpě wámwire mbu: «Nakuchura nkambu ikúmi s'ihinga, na nendange kereka to kuba sámukoră. Nikuhemange unisasire.» <sup>20</sup>Na umpě wámwire mbu: «Năkührucha, na bushwa năncho ntêyi ko.»

<sup>21</sup>«Emukori wákuruka kature nyere kurwabo ebwamamusubie bo. Nampo, miné numba wasubuka n'iere emukori wae o mbu: «Endá tete ekubutara bukíri, eta na mu mitangá y'erubungu, ringá ebasene, esankáta, ebirema n'ebihumihumi bakimi múno.» <sup>22</sup>Kuruma nampo, emukori wákuruka n'ieba mbu: «Nyere kuritu, ebite byakunerenga óngo namakora byo, ina kumunda enumba kúkírí buari.» <sup>23</sup>Nampo ke, nyere kurwabo wámwire mbu: «Endá mu sâanse s'esambungu na s'ekutunsari kăringa ko bea, kímia bo na kamimo kongo enumba yani yarisa bea. <sup>24</sup>Nibwiringi mbu anga n'uma mu bákubíkírangá ani ewaserora mu bió byani.»»

### Buni bwamukía emwea wabese mwanafunsi wa Yesu

(Matayo 10.37-38)

<sup>25</sup>Otu rumă, bea bingi babesenga bamisange Yesu. Wábunduka kuri bo n'iere bo mbu: <sup>26</sup>«Kinsi mwea íngu usondángo inimisa, wánchime irénga ishe, na nina, na mukari, n'ebăna bae, na basike bábó, na bisi bábó. Na wánchime irénga mbu bwishima we. Kuba ntí mbo, watakoche ibese mwanafunsi\* wani. <sup>27</sup>Kinsi mwea ngu watangaria emusaraba<sup>a</sup> wae n'inimisa, watakoche ibese mwanafunsi wani.

<sup>28</sup>«Mbeni inyé mu banu kuba usondángo iumba numba nkiri, wamurukwă kasa irika n'ibucha iansa ebehe ebisekoresha we kongo wasiba imbi bikwengi we ebyamukindanya ebwimbe? <sup>29</sup>Bushwa mbu wámimba emúsíngi, kuruma nampo wafundwa ikindanya ebwimbe bw'enumba njo, ebea bati mbi basenda basungange yo basenda bamuseange <sup>30</sup>n'ieba mbu: «Emwea uno wakubuchanga iumba na wafundwa tu irisía enumba!»

<sup>31</sup>«Mu ntambi mubake murebe usondángo ikwana na umpě mubake, rakomenwa warike kasa, kongo wásúnga, kuba ietere emaa Ebasura bae erefu sibi, wamúkocho ihima míné eurikire n'ebasura erefu makumi abi.

<sup>a</sup> 14.27 *Eria emusaraba*: hano Yesu uhunange iere ebanafunsi bae mbu bahwa irisia inuba n'ikwa.

**32** Kuba wasúngá mbu watamakocha, kai wasekía ukiri kore, wamutúma bea kuri míné bámúshíshe mbu wakié buni kongo washée buhóro. **33** Nge bumbo hotu kuri banu! Kusira umă mu banu ewamukocha ibese mwanafunsi\* wani kuba watamakocha isía ebiti bíkwenzi we.»

### Emukwa ngu usira mufa

(Matayo 5.13; Mariko 9.50)

**34** Yesu wére tu bo mbu: «Emukwa<sup>b</sup> úshamukangă. Ina emukwa wámariminya ebushamuke bwaó, kinki ke tu echamukocha irishie tu o ebushamuke? **35** Emukwa ngo nti usira tu mufa abe mu roto abe mu buinú. Ebea batáangă o hambuka. Íngu uri n'emate erirukira warukire!»

### Emushinga w'emburi nji yariminanga

(Matayo 18.12-14)

**15** <sup>1</sup>Otu rumă, ebakongori b'ehoro na bampe bea ba nsambi batumanángá kumushi na Yesu kongo bamwerikire. <sup>2</sup>eBafarisayo\* n'ebahani b'eMyomba\* barekia basunga mbo, babucha imutera mbu: «Bushwa nki ke emwea uno ukokengi ebea b'ebibí n'írísá hima nabo!» <sup>3</sup>Nampo ke Yesu wákere bo emushinga uno mbu: <sup>4</sup>«Kuba mwea umă mu banu uri na mburi sae iyana, na nima mu to yámarimina, buni bwamuronjá we? Nge bumbo wahwa isía emakumi mwenda n'emwenda mu muchacha n'ienda kăsonda eyakurimina mupaka wásheí yo! <sup>5</sup>Wasekía wamashée yo, wasekuruka na ngoa ntwaria yo mu bituri byae! <sup>6</sup>Na wasekía wameya mu mwae, wasêbikira bira bae n'ebanunsane n'iere bo mbu: «Mweye mumoe hima nani, bushwa mbu emburi yani nji



*Emurangi washee emburi yae nji yariminanga (15.5)*

<sup>b</sup> **14.34** Emukwa ushembwange hano, wabesenga buri ikoi, na ngwabesenga ukoreshiwanga mu rirunga ebió. Wamakinda iriminya ebushamuke bwaó, nti bátáá o.

yariminanga namashéé yo!»<sup>7</sup> Nibwirengi mbu, mu mbingu murikanga ngoa nĩngi kuba mwea umă ho wansambi wamabunduka n'ireke esansambi sae, irénga bea makumi mwenda na mwenda baombokara imbi ntíbaráé tu mwireke esansambi sábo.»

### Emushinga w'ekichere nchi chariminanga

<sup>8</sup> Yesu wéba tu mbu: «Kuba mămína umă uri na bichere ikúmi bya noro, na wámariminya kimă mu mwae, nge bumbo wahwa isacha eritára n'ihae enumba mwisondekanya mupaka wásheí cho!»<sup>9</sup> Wasekía wamashéé cho, wasebikira barakasi bae n'ebanunsane n'iere bo mbu: «Mweye tumoé mongo, bushwa mbu ekichere chani nchi chariminanga, namashéé cho!»<sup>10</sup> Nibwirengi mbu bumbo nge bukíanga ebamaraika\* ba Ongo bamoa entambi mwea umă wa nsambi wámabunduka n'ireke esansambi sae.»

### Mushinga w'emwana ngu wariminanga

<sup>11</sup> Yesu wákere bo umpě mushinga mbu: «Kwarikanga mwea umă nt'uri na basike bae bábí. <sup>12</sup> Emwansare wére ishe mbu: «Etita, nikuhemange umbesi emuhango w'emwandu wani mu butumba bwabe.» Nampo ishe wabanyie bo ebütumba bwae.

<sup>13</sup> «Kuruma na matu makeke, emwansare wachüya emwandu wae na kwiire mu kimpě chuo cha kore. Năńko washata n'ebehe byae mu bikai bya busa-busa. <sup>14</sup> Warekia wamakinda ebehe byae biti, mu chuo ncho mwakime rwaka rwasuma, wabucha irúkwa na bió by'erírísa. <sup>15</sup> Nampo, wénda kakore mwea umă w'echuo ncho. Emwea ngo wamutúma mu mashwă ae karanga esampunu<sup>a</sup> sae. <sup>16</sup> Wabesenga uhunange mbu wamurísange mu bió ebirisange mõ esampunu, ina watashei mwea werimuninka mu byo.

<sup>17</sup> «Nampo ke, emushukira ngo wabucha kwiebesha mbu: «Ebakori ba tita bashatange n'ebió, ina ani nge nikwange n'erwaka kúno!»<sup>18</sup> Nasesimana n'ienda kuri tita, n'imwire mbu: "Etita, namakora nsambi kuri Ongo na kuri óngo hotu. <sup>19</sup> Ntínakomenwa tũ ibikirwa mbu ani musikyabe, ina unitingenga buri umă mu bakori babe."»

<sup>20</sup> «Nampo, emushukira wásimana n'ienda kuri ishe. Na warekia ukiri kore n'enumba, ishe wámusunga, wamukwire bonso nguru. Wámukányáhe, wámukoke n'imurimba.

<sup>21</sup> «Musike we wámwire mbu: «Etita, namakora nsambi kuri Ongo na kuri óngo hotu. Ntínakomenwa tu ibikirwa mbu ani musikyabe.»<sup>22</sup> Ina

<sup>a</sup> 15.15 Mu kutime k'eBayuta, empunu nsirwa bushwa mbu itariwanga n'itatingirwanga mo. Binwa bya nkene n'uneno nguru kuri eMuyuta.

ishe wére ebakori bae mbu: «Mwendi tete karisha nchangi yakomá na mumwambiche yo. Mumwambiche n'upete na birato.<sup>b</sup> 23 Na murishe chana cha nkambu echanone, mubae cho kongo twáronja bió bya karamu, 24 bushwa mbu musikyani uno wabesenga wamákwa ina wamafúka, wabesenga wamarimina ina wamashekana.» Nampo babucha irisa bió by'ekaramu.

25 «Mu kasháangi nko, entangi yae yabesénga iri ekwishwa. Mu rikuruka rae, warekia uri kwihhi n'enumba yábo, wárúkíra engoma n'ebéa basimbange n'imína. 26 Wabikira umá mu bakori n'imushisha kuba kinki nge chasaa nko. 27 Emukori ngo wámusako mbu: «Motó wabe ngwamaremba, na iso wamámukere nkambu, bushwa mbu emwana e wameya na nti munkangwe.» 28 Mukú wae wasubuka nguru n'itina ikime mu numba. Nampo ishe wasaa n'imuhema mbu wakimi. 29 Ina emusike wásako ishe mbu: «Namakukore myáka mingi, na nironjanga ebiti byinirengá öngo. Ina utungänininkanga n'echána ch'empene mbu nani nirise bió bya karamu hima na bira bani. 30 Ina musikyabe uno ewakukindanyanga ebehe byabe biti mwisingirana n'ebihanga, entambi yameya we, umamukere nkambu nji yanone!»

31 «Ishe wámwire mbu: «Emwana'ni, turikanga hima nabe kirotu, n'ebítí mbi birikangá nani byabe. 32 Kai rakomenwa irisa bió by'ekaramu n'imoa, bushwa mbu motó wabé uno wabesenga wamákwa ina wamafúka. Wabesenga wamarimina ina wamashekana.»»

### Mushinga w'emukori mukongobanya

**16** 1 Yesu wákere ebanafunsi\* bae emushinga uno mbu: «Kwarikanga mütumba umá. Emütumba ngo nt'uri na mwea wae w'imurange ebehe byae. Emurangi ngo, ebea benda kámusongere kuri nyere kurwabo mbu ushatange n'ebéhe byae. 2 Nyere kurwabo wámubikira n'imushisha



*Emwana ngu wariminanga wakokerwa n'ishe (15.20)*

<sup>b</sup> 15.22 Mu kutime k'eBayuta, ebyakia ishe w'emusike wamuninka byashéá mbu wamamurisia buri mwana, ina ntí buri kahungu abe mukori. Enchangi njo yabesénga ropo imbarwanga mu otu rukiri, ina ntí ya murimo. Erupete rwashea mbu emusike waninkwa tu murimo w'erisimanire ebikai biti bya mumwabo. N'ebirato byashéá mbu iwe ngié uri huru, bushwa mbu etuhungu twabeséngá tutambaranga birato.

mbu: «Íní myasi nji irukirange ani eyebange ebea bushwa nabe? Bushwa năncho, niansíri ebehe byani biti enompena, bushwa mbu utûrangi tu byo.»

<sup>3</sup>«Emurangi ngo wabucha kwíebesha mbu: «Nyere kuritu usondángo inihensa mu murimo. Naseronja ke buni? Emaa erihinga nsira o, n'erihemahema naro risendishie nkene. <sup>4</sup>Mbo! Namasiba ebuseronja ani kongo entambi nji basenihensa mu murimo, bampe bea bendi banikokengi mu manumba ábó.» <sup>5</sup>Nampo wabikira kinsi mwea ngu watingenga mwinda wa nyere kurwabo. Wáshísha ewaroso mbu: «Mbeni ongo'ri na mwinda wa nki wa nyere kuritu?» <sup>6</sup>Emwea ngo wámusako mbu: «Nkunguru iyana sa mafuta.» Emurangi wámwire mbu: «Tíngě ekaratasi kábé, rika hano tete, andika makumi asanu.» <sup>7</sup>Kuruma nampo, wabikira umpě mwea n'imushisha mbu: «Na óngo uringi na mwinda wa nki?» Nae wámusako mbu: «Tuterere iyana twa nchano ya ngáno.» Emurangi wámwire mbu: «Tíngě ekaratasi kábé, andika makumi munani.» <sup>8</sup>Nampo ke, nyere kurwabo emurangi ngo mukongobanya wamutata bushwa n'ebwenge bwae. Nameba mbo bushwa mbu ebea b'echuo kino baronjangă ebinwa byábó by'ebukongobanya hima na banachabo irénga mbi bárí mu chaka.»

<sup>9</sup>Bushwa năncho, Yesu wéba tu mbu: «Năni nibwirengi mbu: mwendi mukoresha ebehe byinu by'ebukongobanya by'echuo kino mwironja bwira. Bushwa mbu, ebehe mbyo bisekiáyo byamarukwa, Ongo wasebukokeyo mu mbingu mu numba y'ebuingo bw'ematu ati. <sup>10</sup>Emwea uringi n'eriíra mu bikai bikeke, ungo nge mwea w'eriíra hotu mu bikai bingi. N'emukongobanya mu bikai bikeke nge mukongobanya hotu mu bikai bingi. <sup>11</sup>Kuba ke banu mufundwa ibese bea b'iíra mwiranga ebehe by'ebukongobanya bya kino chuo, mbeni inyé nge usebwinyihireyo mwibuninka behe by'eriíra? <sup>12</sup>Kuba mutumakochă iranga bya bampe bea mu riíra, inyé ke ngwamubuninkă binu?»

<sup>13</sup>«Kusira mukori wamúkocha ikóre bakwakare bábí. Bushwa mbu wásebaá ho umă n'ishima umpě, abe waserandakana ho n'uma n'inéna umpě. Mutukoche ikóre Ongo n'ikore ebehe mongo.»

### Yesu wahaná mahano mingi

(Matayo 11.12-13; 5.31-32; Mariko 10.11-12)

<sup>14</sup>eBafarisayo\* bakiangă barukirá ebinwa mbyo, básea Yesu bushwa mbu babesenga bášimá behe nguru. <sup>15</sup>Yesu wére bo mbu: «Banu mwishéanga kuri ebea mbu banu ho nge bea baombokara, ina Ongo usibanga ebiri mu mitima yinu. Bushwa mbu, ekisungwanga mu meso ebea mbu kikai kikiri, Ongo iwe wanéná cho.

<sup>16</sup>«eMyomba ya Musa n'ebitabo by'ebatahwa\* nge byabesengă byemisange ebea ieya na mu matu a Yohana Mubatisai. Itukire mu matu

ngo, nitúranga eMwasi Wakonda w'eBwami bwa Ongó\*. Itukire mu matu ngo eMwasi Wakonda w'eBwami bwa Ongó nge uturwange ho mu matu ano, na kira mwea uronjange maa ae ati kongo wákime mu Bwami mbo. 17 Ratamba kuri echuo n'embingu irimina, ina eMyomba ya Ongó itatukiyo mo anga na kakinwa kakeke.

18 «Kinsi wabume wahénsá mukari n'ibinga umpě, wakórá nsingirani. Nāngu wabinga māmína ngu wahenswa na moke nae wakórá hotu nsingirani.»

### Mushinga w'emutumba bána Rasaro

19 Yesu wákera tu emushinga uno mbu: «Kwarikanga mutumba umă. Emutumba ngo wabesenga umbaranga nchangi sakonda nguru na sa busí kwasuma nguru, na nt'urisanga shu kirotu. 20 Kwarikanga hotu na musene umă mbu nge Rasaro. Rasaro ngo, emabi wae uti wabesengá urisere bihuru. Wabesenga urikanga hamiango mw'emutumba ngo. 21 Wabesenga wisanenga ebió mbi bikirengi itukire mu mesa y'emutumba ngo. N'esambibi sabesenga seyangă karamba ebihuru byae.

22 «Otu rumă, Rasaro wákwa. Ebamaraika\* bêya kămuringa n'imuria hari Ibrahîmu. Emutumba nae wákwa, n'ebesa benda kămutăa. 23 Emutumba warekia uri mu marunga nt'unubange nguru, watarisha emeso, wásunga Ibrahîmu kore, na Rasaro kumushi nae. 24 Wărake Ibrahîmu n'ieba mbu: «Etita, ninubange nguru mu kashá kano, níkwiri bonso! Nitámíri Rasaro warubike entonga y'emurimba wae mu mecha kongo waboboya erwami rwani.»

25 «Ina Ibrahîmu wámusako mbu: «Emwana'ni, uaníkirangá mbu ubésengá na butumba bwingi mu chuo, ina Rasaro iwe nt'unubange. Na hano ke, uri mu sangoa na ōngo unubange. 26 Usibanga tu mbu hari kiribu kikiri nguru munkati na bate ninu. Nge bumbo, ebari kúno, kuba bahunange isoka kuri banu nko, bátámukocha. N'ebári kuri banu nko, batamukocha isoka kúno kuri bate.» 27 Emutumba wéba mbu: «Etita, nikuhemange útumé ke Rasaro mu mwitu, 28 bushwa mbu basike bitu basanu bári mo, wēndi kătonde bo kongo batahieriyó mu minubo ino.» 29 Ibrahîmu wámusako mbu: «Basike binu bári n'ebitabo bya Musa nămbi by'ebatahwa\*, bēndi bamisange ímbu ebweba byo!» 30 Emutumba wéba mbu: «Anga, etita Ibrahîmu! Ritamende mpo nensi. Ina kuba kuri íngu wamufukă wamenda kătonde bo, basereke esansambi sábó.» 31 Ina Ibrahîmu wámwire mbu: «Kuba banakinu mbo batamukocha irukira emitiro ya Musa na y'ebatahwa, batakoche hotu irukira emahano angu wafuka.»»

**Yesu uhanange bushw'esansambi n'emusasiro**

(Matayo 18.6-7,21-22; Mariko 9.42)

**17** <sup>1</sup>Yesu wére ebanafunsi\* bae mbu: «Ebinwa by'erikiria ebea mu sansambi bisenda bíbesengí ho ko, ina emwea ngu usingwange bampe bákíre mu sansambi waherwá! <sup>2</sup>Rakomenwa rero kuri emwea ngo wáminwé osho mu ríkoti n'imutáa mu nyansa, kúkía wakíría umă mũmbi ebakeke bano.<sup>a</sup> <sup>3</sup>Mukohyanga! Kuba munakinu wakórá kibi umuhananga. Na kuba wasia ebubi bwae umusasiranga. <sup>4</sup>Kuba wakuronjee bubí meta arinda mu rotu na ukweyerengi ho meta arinda kakukonga musasiro, umusasiranga ho.»

**Yesu uhanange bushwa n'erisimira**

<sup>5</sup>Kuruma nampo, esantumwa\* sêre Nyere kuritu mbu: «eNyere kuritu, tuongereri erisimira.» <sup>6</sup>Nae wásubya mbu: «Kuba mumabesengi n'isimira rirengekane n'ekambuto k'eharandari, mumakochange iere emuti uno mbu wíkutu mpo hari o, na wêndi kwikome mu nyansa, na o wamuburukirengi.»

**Emukobe wahwa ikóre nyere kurwabo**

<sup>7</sup>Yesu wéba tũ mbu: «Kuba umă mu banu uri na mukobe umuhingengi abe umurangengi bituana, entambi wamusúngá ukurukange ekwishwa, mbeni nyere kurwabo wamumushishă mbu weye na warise? <sup>8</sup>Anga! Buno nge busemwire we: «Nironjei kasa bió, kuruma nampo mbara nchangi sakoma kongo únishee ebió. Entambi nji nasekinda irisa n'iomomo, n'ongo ke nturishă n'iomomo.» <sup>9</sup>Mbeni banu mwanikirange mbu nyere kurwabo w'emukori ngo wamámutată bushwa mbu wakukora ebyakumwiringa we? Anga! <sup>10</sup>Nge būbo hotu na banu. Entambi mukóra biti ebwakubuhema Ongo ikora, mwendi mweba mbu: «Bate bakobé ho busa, twamakora ho imbi ebyakongwa bate ikora.»»

**Yesu waramyá babembi ikúmi**

<sup>11</sup>Yesu wakíanga wendange ku Yerusalemu, wétere mu byati by'echuo cha ku Samaria\* na cha ku Ngariraya. <sup>12</sup>Entambi wakíanga wamakime mu kubungu kimă, babembi ikúmi bêya kuri we. Básímána kore nae,<sup>b</sup> <sup>13</sup>na nti bakuange mbu: «eYesu Nyere kuritu, tukwiri bonso!»

<sup>a</sup> 17.2 Hano, kuri bea bimă bahakange mbu ebakeke mbo nti nge bárí n'erisimira rikeke. <sup>b</sup> 17.12 Itukana n'eMyomba ya Musa, emubembi ntwâkomenwanga ieya kwihi n'ebea. Soma Barawi 13.46.

<sup>14</sup>Yesu warekia wamasunga bo, wére bo mbu: «Mwëndí kishéá kuri ebakuhani\*.» Barekia bendange ko, bárama. <sup>15-16</sup>Umă mu bo wabesenga Musamaria\*. eMusamaria ngo warekia wamasunga mbu wamarama, iwe wákuruka kuri Yesu na nt'utatange Ongo mu murenge mukiri. Wíndamya embaso yaé kwansi mu makako a Yesu. <sup>17</sup>Nampo ke Yesu wáshísha mbu: «Mbeni ntí bea ikúmi nge bakurama? Ebampe mwenda bári kuni? <sup>18</sup>Mbeni kusira umpě munkati nabo wakúruká kátata Ongo irénga emweni uno?» <sup>19</sup>Yesu wére eMusamaria ngo mbu: «Simaná, írí rabe. Erisimira rabe ramakuramya.»

**Buni nge busêyayo eMwana w'eMwea**

(Matayo 24.23-28,37-41)

<sup>20</sup>Kuruma nampo, eBafarisayo\* bashisha Yesu mbu: «Mbeni eBwami bwa Ongo\* busêyayo mu ání matu?»

Wásako bo mbu: «eBwami bwa Ongo\* butangeya buri kikai kisungwange mu meso. <sup>21</sup>Kusira mwea wasêbayo mbu: «Mukai, nge bunu!» Abe: «Nge bubó!» Murukire, eBwami mbo nge buri munkati ninu.»

<sup>22</sup>Kuruma nampo, Yesu wére ebanafunsi\* bae mbu: «Kuseyayo ntambi nji mukusondekanyayo inisúnga ani eMwana w'eMwea\*, nakiro mu otu rumă ho, ina mutunisungiyo. <sup>23</sup>Ebea basebwireyo mbu: «Mukai, nge uó kukó!» Abe mbu: «mukai, nge uno kúno!» Ina kiro mumisayo bo. <sup>24</sup>Bushwa mbu ani eMwana w'eMwea nasekía nakurukă, nisesúngwayo buri kimpenya bukiana chasungwa mu sankaro siti n'irisha chaka mu chuo kiti. <sup>25</sup>Ina nakomenwa kasa inuba nguru n'itinwa n'ebea b'ekiranga kino. <sup>26</sup>Ebyabesenga mu matu a Noa, nge bisebeseyo hotu mu matu nge asekiayo ani eMwana w'eMwea nakúrukă. <sup>27</sup>Bushwa mbu mu matu ngo, ebea babesenga barisange n'io, babingange n'ibingwa ieya na mu rotu ndu rwakianga Noa wákime mu bwato. Nampo, mbura nyankende yáke, yarisía echuo n'ishiria ebea bati. <sup>28</sup>Nge bumbo bwabesenga hotu mu biranga bya Roti. Ebea babesenga barisange n'io, nti bachurange n'ichuya, nti bekange n'iumba. <sup>29</sup>Ina erotu rwakianga Roti wátuka ku Sondoma, Ongo wáhicha rúngére rwa kashá ituka mu mbingu n'ishiria ebea bati.<sup>ch</sup> <sup>30</sup>Nge bumbo hotu busebeseyo erotu ruseyayo ani eMwana w'eMwea.

<sup>31</sup>«Erotu ndo, kuba mwea uri hamambio watásikiyo tú mwikime mu numba mbu waringe mo bikai. Na kuba mwea usebeseyo ekwishwa watâkurukiyo tu ku kwae. <sup>32</sup>Mwanikiranga mukari wa Roti<sup>e!</sup> <sup>33</sup>Kinsi mwea ngu wasehunayo iranga ebuingo bwae, waseriminyayo bo. Ina



íngu waseriminyayo bo, waseramyayo bo. <sup>34</sup>Nibwirengi banu: Bea bábí basebeseyo mu ntange nima mutu, umă waseringwayo na umpě wasesiayo mpo. <sup>35</sup>Bamína bábí basebeseyo bátútángé mongo, umă waserierwayo na umpě wasesiayo. [<sup>36</sup>Bea bábí basebeseyo mwishwă rima, umă waserierwayo na umpě wasesiayo.]»

<sup>37</sup>Ebanafunsi bamushisha mbu: «Nyere kuritu, mbeni ebinwa bino bisêtayo kuni?»

Yesu wásako bo mbu: «Ehasebeseyo ekĩnda nge hasekiayo esânju sakumanana.»

### Emushinga w'emushumbakari n'emushunguri

**18** <sup>1</sup>Yesu wákere ebanafunsi bae emushinga uno mwishéa bo mbu rakomenwa kiro bendi batetérange mu rihema Ongo ematu ati. <sup>2</sup>Wéba mbu: «Mu ubungu rumă, kwarikanga mushunguri wa binwa umă nti watasubahanga Ongo. Iwe wabesenga watasubahanga na nti tíwirae mu mwea uti-uti. <sup>3</sup>Mu rubungu ndo, kwarikanga hotu mushumbakari umă. Emushumbakari ngo wabesenga umweyerenga ematu ati imwire mbu: «Nikerĩ ebinwa byani ishú ebirikanga nani n'emuréndá wani.»

<sup>4</sup>«Ina kwetanga matu mingi emushunguri ngo nt'umutininenga. Kuruma nampo waanikira kumunda nae wisine mbu: «Nakiro mbu ntasubahanga Ongo na ntínirae mu mwea uti-uti, <sup>5</sup>ina bushwa mbu emushumbakari uno waniruhya nguru, nasemuninka eriíra rae kongo watêndi tú weyange hano kănitaninga.»»

<sup>6</sup>Nampo Nyere kuritu Yesu wéba mbu: «Murukire ímbu bweba emushunguri uno wemá! <sup>7</sup>Nge bumbo Ongo nae, ebea mbo barondorángá we, nămbo bamurakengí mutu na mumwishi wákereyo bo erubansa ishú na watásíyo mu risake bo. <sup>8</sup>Nibwirengi mbu iwe wasebuninkayo eriíra rinu tete. Ina ani eMwana w'eMwea\* nasekiayo nakurukă, mbeni nasekumanayo mu chuo nti mukiri bea bári n'erisimira?»

### Emushinga w'eMufarisayo n'emukongori w'ehoro

<sup>9</sup>Kwarikanga bea mbi babesenga bitatange mbu ibó nge bea baombokara mu makako a Ongo na nti bánéná bampe. Ngerikia ke Yesu wákere bo emushinga uno mbu: <sup>10</sup>«Otu rumă, bea bábí bendángá kăhema kumunda n'eNumba ya Ongo\*. Umă wabesenga Mufarisayo\* na umpě nti mukongori wa horo. <sup>11</sup>eMufarisayo wásimana nt'uhemange mu mutima wae mbu: «Tita Ongo, nakutata bushwa mbu ani ntarikanga buri ebea bampe: ibó banyai, bea ba bibí na basingirani. Nikutatange hotu bushwa mbu ntíniri buri emukongori uno w'ehoro. <sup>12</sup>Nihemanga mahemo erikwitinisha irisa

n'iomo meta abi mu riinga, na nininkananga echakumi ch'ebikai biti mbi bishéengă ani.)

<sup>13</sup>«Ina emukongori w'ehoro iwe wásimana kore, na watashimi n'irame ekwio. Ina wíkaso-kaso mu bukuba mu rishea ebonso bwae na nt'uhemange mbu: «Tita Ongó, nikwiri bonso bushwa mbu ani mwea wa bibí!» <sup>14</sup>Nampo ke, Yesu wéba mbu: «Nibwirengi mbu emukongori w'ehoro wákuruka kukwae na ntwamáansirwa eriíra mu makako a Ongó, ina ntí eMufarisayo ngo. Bushwa mbu kinsi mwea ngu witarishanga wasehichiwayo, ina kinsi mwea ngu wihichanga wasetarishiwayo.»

### Yesu wakasane etubonsobonso

(Matayo 19.13-15; Mariko 10.13-16)

<sup>15</sup>Otu rumă, bea bimă barishie tu Yesu tubonso-bonso mbu warié mine hiyo na to. Ebanafunsi\* barekia basungă mbo, báfinyae bo. <sup>16</sup>Ina Yesu wéba mbu bamurishíi ebana mbo n'ieba tu mbu: «Múreki ebana beye hano! Kiro muhangire bo, bushwa mbu eBwami bwa Ongó\* bari kuri bea mbi ebasusanyiwa nabo. <sup>17</sup>Mu riíra nibwirengi mbu: kinsi mwea ngu wafundwa ikóke eBwami bwa Ongó bari mwana mukeke, watakimiyo mo kárankuso.»



Yesu ukasanengi ebana (18.16)

### Yesu ushambarange na mutumba

(Matayo 19.16-30; Mariko 10.17-31)

<sup>18</sup>Kuruma nampo, mukwakare umă wa Bayuta wáshísha Yesu mbu: «eMuhani wakonda, mbeni nokie buni kongo nashée ebuingo bw'ematu ati?» <sup>19</sup>Yesu wamushisha mbu: «Umebá mbu nakóndá bushwa nki? Kutarikanga mwea wakonda, ina Ongó wisine ho. <sup>20</sup>Ntíongosi ebweba emyomba: «Angienda usingirana, angienda ushúrá mwea, angienda ushuma, angienda ushúkashúka, wendi usubaha iso na nsoko.» <sup>21</sup>Emwea ngo wásubíe Yesu mbu: «Emyomba iti njo, nironjanga ebwebayo itukire ebuyu bwani.» <sup>22</sup>Yesu warekia warukirá ebinwa mbyo, wámwire mbu:

«Urukwa ho kinwa kimă nchi chahwa ironja ōngo: endá kachuya ebikai biti mbi biri nabe, tíngě ebusoki mbo na ubanyii byo ebasene. Kuba uronjá būbo, ukūbésě na būtumba mu mbingu. Kuruma nampo, weyanga unimise!» <sup>23</sup>N'emwea ngo warekia wárukira ebinwa mbyo, wátindibara nguru bushwa mbu iwe wabesenga mutumba nguru.

<sup>24</sup>Yesu warekia wamasunga mbu emwea ngo wamatindibara nguru, wéba mbu: «Ííra, ntí ratamba mu basoki ikime mu Bwami bwa Ongó\* . <sup>25</sup>Rasuma nguru kuri engamia ikime mu kiribu ch'enandi ina rasuma tú nguru mu mutumba ikime mu Bwami bwa Ongó.»

<sup>26</sup>Ebea mbi babesenga barukirange ebinwa mbyo beba ke mbu: «Reroro, inyé ke ngwashukarayo!» <sup>27</sup>Yesu wére bo mbu: «Echasuma kuri ebea nge chatamba kuri Ongó.» <sup>28</sup>Nampo Petero wámwire mbu: «Kaé ke, bate twamakinda isía ebiti biri rero nitu n'íkumísa ōngo!» <sup>29</sup>Yesu wére bo mbu: «Nibwirengi mu riíra: kuba emwea wasia enumba yae, abe mukari, banachabo, babuti bae bushwa n'eBwami bwa Ongó\* , <sup>30</sup>Ongó wasemuninka bikai bingi nguru hano hansi, na mu matu ngi asewayo, waseninkwayo ebuingo bw'ematu ati.»

### Yesu waturá tu emwasi w'erikwa n'erifuka rae

(Matayo 20.17-19; Mariko 10.32-34)

<sup>31</sup>Kuruma nampo, Yesu wátinge ebanafunsi bae ikúmi na bábí, wére bo mbu: «Múnítée emate ke! Bate nge bano twendange ku Yerusaremu. Mu rubungu ndo nge kuri ebiti mbi byaandikwángá n'ebatahwa\* itukana nani eMwana w'eMwea\* , na nge kusébererá byo. <sup>32</sup>Basenisibura mu mine y'ebapakani,<sup>a</sup> basenisea, basenikambaa n'initúráe intě. <sup>33</sup>Basenirasaka tushushu, kuruma nampo basenishura. Ina nasefuka erotu rw'emeta ashatu.»

<sup>34</sup>Ina esantumwa ntíbarukiranga kikai bushwa mbu ebinwa mbyo byabesengá byabisamá. Ntíbasibanga kinki chakianga Yesu wahuna iere bo.

### Yesu waramyá kihumihumi

(Matayo 20.29-34; Mariko 10.46-52)

<sup>35</sup>Yesu wakíanga wásonda ikime mu rubungu rwa ku Yeriko, wákumana kihumihumi kimă chabesenga charika mwendende n'ense nti kikongakongange. <sup>36</sup>Warekia warukirá erukindo rw'ebea bingi betange, wáshísha mbu: «Mbeni kinki cheta nku?» <sup>37</sup>Ebea bamwíre mbu: «Yesu wa ku Nasareti ng'wetange.» <sup>38</sup>Ekihumihumi ncho chakua mbu: «eYesu Musike wa Ndauti, nikwiri bonso!»

<sup>a</sup> 18.32 Ebapakani bea imbi ntí Bayuta.

<sup>39</sup>Ebea mbi babesenga basondórá bamufine mbu wakobe, ina iwe wakua ketu na nguru mbu: «eYesu Musike wa Ndauti, nikwiri bonso!»

<sup>40</sup>Yesu watindira, wére bo mbu bamurishé hari we. Warekia wêya kwihi na Yesu, Yesu wamushisha mbu: <sup>41</sup>«Ōngo uhunange nikuronjei kinki?»

Wásúbya mbu: «eNyere kuritu, nisondángo mbu nikai tu.» <sup>42</sup>Nampo, Yesu wámwire mbu: «Eo ke kaé tu! Erisimira rabe ramakuramya.» <sup>43</sup>Hihihihi wabucha tu ikae, wamisa Yesu na nt'utatange Ongo. Ebea mbi basungángá mbo nabo batata Ongo.

### Yesu wakumanáná na Sakayo

**19** <sup>1</sup>Yesu wakíanga wakimě mu rubungu rwa ku Yeriko, wéta munkati na ro. <sup>2</sup>Kai mu rubungu ndo nti mări mwea umă mbu nge Sakayo. Sakayo ngo wabesenga kapíta k'ebakongori b'ehoro, na nti mutumba. <sup>3</sup>Wabesenga uhunange isúnga Yesu, ina bushwa mbu wabesenga mwih, ntíwakochangá imúsúnga bushwa n'ebwingi bw'ebéa. <sup>4</sup>Bushwa náncho, wátibita tete kubusondori n'ebéa n'itaya mu mutí kongo wásúnga Yesu, bushwa mbu himpo nge hakomenwanga ho ieta Yesu. <sup>5</sup>Yesu wakíanga wêya mpo, wárarame ekwio n'iére Sakayo mbu: «Sakayo, hitá tete, bushwa mbu runotu nakomenwa isame mu mwabe.» <sup>6</sup>Sakayo wáhita tete n'ienda kakoke Yesu mu mwae na ngoa.



*Sakayo hiyo n'emuti (19.5)*

<sup>7</sup>Ebea bati bakiangá basunga mbo, babucha imutera mbu: «Rero-rero, Yesu wendá kasame mu numba ya mwea wa nsambi!» <sup>8</sup>Ina Sakayo wásimana, wére Yesu mbu: «eNyere kuritu, nasebanyie ebasene muhango w'ebehe byani, na kuba nashumanga kikai cha mwea mwimuhusa, nasemukuruchie cho meta anye.» <sup>9</sup>Yesu wéba mbu: «Runotu, Ongo wamashukaya enumba ino bushwa mbu emwea uno hotu mwana wa mu ruanda rwa Iburahimu, <sup>10</sup>bushwa mbu ani eMwana w'eMwea\* nareya kásonda ebariminanga n'ishukaya bo.»

### Mushinga w'ebakori bashatu

(Matayo 25.14-30)

<sup>11</sup>Yesu wákera tu emushinga uno kuri mbi babesenga bamurukirengi. Nāmbu ebwakianga ngié ubungurengi ku Yerusaremu, ebea báanikira mbu eBwami bwa Ongó\* ngié buri kēya hiha-hiha. <sup>12</sup>Nampo ke Yesu wákere tu bo umpě mushinga mbu: «Kwarikanga wabume umă nti murúsi. Emurúsi ngo wēnda mu chuo cha kore kongo bāmusímíka ko buri mwami. Kuruma n'erisímíkwa, wákuruké tú kasimanire echuo chae. <sup>13</sup>Wakíanga wāsonda ienda, wábikira bea ikúmi mu bakori bae. Wábanyie bo kira mwea kichere kimă cha noro,<sup>a</sup> n'iere bo mbu: «Mwēndí kănonka n'ebehe mbyo ieya nāmbu busekurukáyo ani.»

<sup>14</sup>«Ina ebea b'echuo chae babesenga bāmuyongwa. Bushwa nāncho, bátúma bea kuruma nae kongo bamwĩre mbu ntífbáshima mbu wabesi mwami wăbó. <sup>15</sup>Ina emwea ngo wasímíkwa ho buri mwami, n'ikuruka tu ku kwabo. Warekia wamakuruka, wéba mbu bamubíkíri ebea ikúmi mbi ebabanyiengá we ebehe mwisíba kuba kira mwea wakukimisha sínga. <sup>16</sup>Emukori waroso wēya, wéba mbu: «Enyere kuritu, ekichere chambesenga ōngo chamabuta bimpe ikúmi.» <sup>17</sup>Emwami wamusubie mbu: «Ushamucha, ōngo mukori wakonda. Ímbu bwamabesa ōngo mwea w'inyihirwa mu bikai bikeke, nasekuninka isimanire mbungu ikúmi.» <sup>18</sup>Emukori w'emeta abi nae wēya, wéba mbu: «Enyere kuritu, ekichere kimă chambesenga ōngo chamabuta bimpe bisanu.» <sup>19</sup>Emwami nae wámwire mbu: «Na ōngo hotu, ukúsimanire mbungu isanu.» <sup>20</sup>Kuruma nampo, umpě mukori nae wēya n'ieba mbu: «Enyere kuritu, ekichere chambesenga ōngo nge kino. Naranganga cho mu muri w'eribike mo behe. <sup>21</sup>Năkukusubahānga bushwa mbu ōngo mwea wasuma. Ōngo ukutonga entibyakubikanga ōngo n'ikao entibyakuhinganga ōngo.»

<sup>22</sup>«Emwami wamusubie mbu: «Ōngo mukori wemá! Nasêkukere erubansa itukana n'ebwamēba ōngo. Usibāngá mbu ani nirikanga mwea wasuma, na nibákanga entibyakubikanga ani, na nikaonga entibyakuhinganga ani, <sup>23</sup>mbeni ke bushwa nki ufundwāngá iría ebehe byani ekubánki? Mu rikuruka rani, namákúmánange ebehe byani nti byamabúta!» <sup>24</sup>Ngerikia wére ebea babesenga mpo mbu: «Emukori ngu, mumunyake ekichere kimă ch'enoro ncho tete, na múninké cho íngu uri n'ebichere ikúmi.» <sup>25</sup>Nabo bamwĩre mbu: «Enyere kuritu, íngu ngié uri na bichere ikúmi!» <sup>26</sup>Wásubíe bo mbu: «Nibwirengi mbu kinsi mwea ngu uri na kikai ng'waseninkwayo

<sup>a</sup> 19.13 Kikoroto kimă chabesenga kikorerwanga mibisi iyana.

kîmpě, ina eusira kikai wasenyakwa tu n'ekakeke kárí rero nae. <sup>27</sup>Wéba tu mbu: ebarénda bani mbi ebatinángá mbu ntabesi mwami wăbó, murishe bo hano na mushure bo mu meso âni.»»

### Yesu wakímé ku Yerusaremu

(Matayo 21.1-11; Mariko 11.1-11; Yohana 12.12-19)

<sup>28</sup>Yesu wakíanga wameba ebinwa mbyo, wasondore ekikembe ch'ebea mu rienda ku Yerusaremu. <sup>29</sup>Wakíanga wăsonda ieya kwihi n'erubungu rwa ku Betefake na ku Betania kumushi n'erou rw'eMiseituni, wátúma banafunsi\* bae bábí, wére bo mbu: <sup>30</sup>«Mwëndí mu rubungu erurí kubusondori ninu. Măkía mumeya kuro, mukusungă chana cha mbúndá chámínwa kitangaria nensi umpě mwea, muboronga cho na murishe cho hano. <sup>31</sup>Kuba mwea wabushisha mbu bushwa nki mwobora cho, mumusakonga mbu: «Nyere kuritu waráé mu cho.»»

<sup>32</sup>Ebanafunsi mbo bēnda. Bákúmana ebikai biti ímbu bwakúkianga Yesu wére bo. <sup>33</sup>Barekia b'oborange echana ch'embúndá cha, bîsa cho báhisha bo mbu: «Mbeni banu mwoborange echana ch'embúndá bushwa nki?» <sup>34</sup>Basako bo mbu: «Nyere kuritu waráé mu cho.»

<sup>35</sup>Ebanafunsi barishie Yesu echana ch'embúndá cha. Batereka enchangi sábó hiyo n'emongo w'embúndá, ituka mpo batárísha Yesu



Yesu hiyo n'embúndá (19.36)

hiyo nayo. <sup>36</sup>Yesu wakíanga ukiri mu ruendo, ebea nabo nti bánsansange esanchangi sábó mu munse.<sup>b</sup> <sup>37</sup>Wakíanga ubungurengi mu rubungu rwa ku Yerusaremu, ihita n'erou rw'eMiseituni, ebanafunsi\* babesenga bamoá nguru na nti batatange Ongó mu murenge mukiri bushwa n'ebishisharo biti byasúngángá bo. <sup>38</sup>Babesenga bebange mbu:

«Wákasanirwé eMwami ngu weyange mu rina ra Nyere kuritu!  
Mu mbingu kubesi buhóro,  
Na Ongó watatwe!»<sup>ch</sup>

<sup>39</sup>Bushwa námbo, Bafarisayo\* bimă munkati n'ekikembe ch'ebea, bere Yesu mbu: «eMuhani, finé ebanafunsi\* babe mbu bákobé!» <sup>40</sup>Yesu wásako bo mbu: «Nibwiringi banu: kuba ebea bano bāmubibiră, emakoi asékúá.»

### Yesu wariré erubungu rwa ku Yerusaremu

<sup>41</sup>Yesu wakíanga urikasáá ku Yerusaremu, warekia wasúngă kuro, wabucha ire. <sup>42</sup>Wéba mbu: «Kuba na ōngo umusibange ebyamukurishiengi ebuhoro runotu! Ina ubiswa bo, utukoche isúnga bo enompena! <sup>43</sup>Kuseyayo matu ngi asekiayo ebarénda babe basekutimbayo kongo bakukwanisha. N'entambi basekiá bamumba erukito rw'erikwiranga kwihi ninu, nampo ke basekuekenyayo mu sankaro siti. <sup>44</sup>Basekushiriayo shŭ-shŭ, ōngo n'ebăna binu. Batakusieriyo kiro n'ikoi hambasiro na rimpe, bushwa mbu Ongó wameya kăkushukaya, ina ntí ukumuteerera!»

### Yesu wahénsá ebachurusi mu Numba ya Ongó

(Matayo 21.12-17; Mariko 11.15-19; Yohana 2.13-22)

<sup>45</sup>Yesu wakíanga wamakime habutara bw'eNumba ya Ongó\*, wabucha ihénsa ebachurusi mpo, <sup>46</sup>wére bo mbu: «Mu Mitiro Yashurukara, Ongó wéba mbu: «Enumba\* yani isebeseyo numba ya mahemo.» Ina mumabundura yo ibese numba inji ibisamengi mo ebĭbi!»<sup>e</sup>

<sup>47</sup>Kirotu, Yesu wabesenga uhananga ebea kumunda n'eNumba ya Ongó\*. Ebakwakare b'ebakuhani\*, ebahani b'eMyomba\* hima n'ebampe bakwakare babesenga básonďangă buni bwamúmuyă bo. <sup>48</sup>Ina batáshéi mbu bwamuronjă bo, bushwa mbu ebea bati babesenga bamurukirirengă nguru.

---

<sup>b</sup> 19.36 eBayuta bakiangă bákokengi emukwakare, bánsansangă esanchangi sábó mu munse mwimunika itúndá. <sup>ch</sup> 19.38 Soma Saburi 118.26. <sup>e</sup> 19.46 Yesu washemba ebachurusi mbu ibó bĭbi bushwa mbu babesenga bahunangă mbu ebea báchure ebikai byábó kongo basibura byo kuri Ongó mu Numba ya Ongó. Babesenga bachuyangă ebikai mbyo busi kwasuma nguru kuri ebea. Soma Isaya 56.7



*Yesu uhensange ebachurusi mu Numba ya Ongo (19.45)*

### **Emaa a Yesu asaa kuni?**

*(Matayo 21.23-27; Mariko 11.27-33)*

**20** <sup>1</sup>Otu rumă, Yesu wabesenga uhanange n'ihubiri ebea eMwasi Wakonda kumunda n'eNumba ya Ongo\*. Ebakwakare b'ebakuhani\* n'ebahani b'eMyomba\* hima n'ebikondó by'eBayuta bamusaire nsisu, <sup>2</sup>bamushisha mbu: «Ebinwa bino, twĩri inyé ngwakukutuma karonja byo, abe inyé ngwakukuninka emaa erironja byo?»

<sup>3</sup>Yesu wásubie bo mbu: «Nani nibushishange kinwa kimă. Munĩri ke, <sup>4</sup>mbeni Yohana wakutonga emaa eribatisa kuni? Kwa Ongo abe kuri ebea?» <sup>5</sup>Nampo, bábucha ihakanyana mbu: «Kuba twamwire mbu emaa ae asaange kwa Ongo, wasetushisha mbu: «Bushwa nki ke ntímukumusimira?» <sup>6</sup>Kuba twamwire tu mbu emaa a Yohana asáá kuri ebea, ebea bati basetushura na makoi, bushwa mbu ebati basimira mbu Yohana wabesenga mutahwa\* wa Ongo.»

<sup>7</sup>Nampo bámusubie ke mbu: «Bate ntítosi kwakianga Yohana wakuto emaa eribatisa ebea.» <sup>8</sup>Yesu nae wére bo mbu: «Nani hotu ntâbwiri mbu mu maa ányé nge aronjange mo ani ebinwa mbi.»

### **Mushinga w'ebakori bema**

*(Matayo 21.33-46; Mariko 12.1-12)*

<sup>9</sup>Kuruma nampo, Yesu wákere ebea emushinga uno mbu: «Kwarikanga wabume umă ngu wahinganga ishwa ra misabibu. Wásombya ro bahingi



bimã kongo benda bamuninkange muhango mu mirime, nae wênda mu chuo cha kore matu mingi. <sup>10</sup>Emirime yakianga yamase, emwea ngo watúma mukori wae umã kuri ebahingi mbu bamuninke emuhango wae mu mirime. Ina ebahingi mbo bahumba emukori ngo n'imuhensa, n'imukurucha kobokobo. <sup>11</sup>Miné erishwa wátumire tu bo umpě mukori, ina bamuhumba hotu n'imukambaa, n'imukurucha kobokobo. <sup>12</sup>Wátumire tu bo mukori wa meta ashatu, nae hotu bamubabaya n'imutáa kumushi n'erishwã. <sup>13</sup>Nampo ke, miné erishwa wéba mbu: «Nasekía ke buni? Mbo! Nasetúma ke musikyani, kitwana chani, munantambi básemusubaha.» <sup>14</sup>Ina ebakori mbo barekia basunga emwana ngo weyange, bamwende rwanko, beba mbu: «Uno nge miné emwandu w'erishwa ríno, kai tumushure kongo twasia na ro.» <sup>15</sup>Bámutinge, bámutáa kumushi n'erishwã n'imushura.

«Nampo Yesu wáshísha ebea mbu: Ebahingi mbi, mbeni miné erishwa wamuronjá bo buni? <sup>16</sup>Waseya kashiria ebahingi mbo n'ininka ro bampe bahingi.» Ebea barekia barukira mbo, beba mbu: «Ebinwa buri mbyo, kiro byatuhierero rotu!» <sup>17</sup>Ina Yesu wásindera bo n'iere bo mbu: «Múníri kuba eMitiro Yashurukara ino yebá buni!

«Erikoi ratawanga n'ebimbi,  
iro nge ramabese ikoi rikiri r'enkuso y'enumba.»<sup>a</sup>

<sup>18</sup>Kinsi mwea ngu wasekireyo mu rikoi ndo wasenechaayo,  
nãngu wasehukirwayo na ro risemubunguraayo.»

<sup>19</sup>Ebahani b'eMyomba\* n'ebakwakare b'ebakuhani\* barekia bamarukira mbo, basiba mbu Yesu wamakera emushinga ngo bushwa nabo. Hiha-hiha básonda imutinge, ina bákwa böba bushwa n'ebwingi bw'ebea.

### Eritúa ehoro ya Kaisari

(Matayo 22.15-22; Mariko 12.13-17)

<sup>20</sup>Ebakwakare mbo b'eBayuta babucha ikairire Yesu kongo bashée kinwa chimusongere kuri emukwakare w'eBaroma. Nampo ke básonda bea, batúma bo kuri Yesu. Ebea mbo bironjángá buri bea baombokara, kai babesenga basondange itingire Yesu mu binwa byae kongo bámusibura kuri ebakwakare b'echuo. <sup>21</sup>Ebea mbo bamwĩre mbu: «eMuhani, bate twosi mbu ebinwa byebangã öngo n'ebihanangã öngo ebea birikangã byaombokara. Utwiraenga rabe mu birira bya bea, ina öngo uhananga bo binwa byaombokara by'ense ya Ongó. <sup>22</sup>Eo twiiri ke, mbeni eMyomba yitu yarisía ituwa ehoro kuri Kaisari abe anga?»

<sup>a</sup> 20.17 Soma Saburi 118.22.

<sup>23</sup>Ina Yesu warekia wamăkengura ebwamamutéa bo ebinwa mbyo, wére bo mbu: <sup>24</sup>«Munishée kasa kikoroto kimă.» Nampo ke wáshísha bo mbu: «Mbeni ensusanya ino yanye? N'erina ríno raandikwa hano mbeni raneye?» Nabo basubya mbu: «Bya Kaisari.» <sup>25</sup>Nampo ke Yesu wére bo mbu: «Kai mwendi muninka Kaisari ebikai mbi byae, na Ongó nae mbi byae.»

<sup>26</sup>Ebea mbo ntíbakochanga imushée mo kinwa echamumutingiré bo mu mbi ebyabesenga byebange we munkati n'ebea. Ina báshishárángá mu kinwa nchi chasubienga we, bákóba!



*Ebehe by'emwami Kaisari (20.24)*

### Mbeni ebakwire basefukayo?

*(Matayo 22.23-33; Mariko 12.18-27)*

<sup>27</sup>Kuruma nampo, Basandukayo\* bimă beyere Yesu. (eBasandukayo nge bebangă mbu ebakwire batafukiyo.) <sup>28</sup>Bamushisha mbu: «eMuhani, Musa watwandikirenga mu kitabo ch'eMyomba bunu mbu: «Kuba mwea wabinga na wámakwá usira mwana, munachabo wahwa ibinga emushumbakari kongo wabutire íngu warikwa băna.» <sup>29</sup>Nge bumbo, kwarikanga misike írinda ya bura buma. Entangi yábinga mumína, ina yákwa nti tíyasia mwana. <sup>30</sup>W'emeta abi nae wátíngé emushumbakari ngo, ina nae wákwa nti tíwabuta n'emushumbakari. <sup>31</sup>Kuruma nampo, w'emeta ashatu nae hotu búbo. Rabesenga bumbo-bumbo mu bati barínda. Ebati bákwangá nti tíbáributa nae anga na mwana umă. <sup>32</sup>Kuruma nampo emushumbakari ngo nae wákwa. <sup>33</sup>Mbeni ke, erotu rw'erifuka, emumina ngo wasebeseyo wanye, bushwa mbu emisike írinda iti yamubinganga?»

<sup>34</sup>Yesu wásubíe bo mbu: «Mu chuo kino, ebea babinganangă. <sup>35</sup>Ina ebea mbi ebasungwa mu makako a Ongó mbu bakomenwa ífuka mu rikime mu Bwami ebuseyayo, batábingiyo abe ibingwa. <sup>36</sup>Batákwiyo tu. Bushwa mbu basebeseyo buri bamaraika. Ibó nge băna ba Ongó bushwa barífuka. <sup>37</sup>Musa washéanga shŭ-shŭ mbu ebakwire basefukayo, ekwaandikanga we itukana n'ekitundi ch'ekashá.<sup>b</sup> Híhă nge habikira we Nyere kuritu mbu Ongó wa Ibrahimu, Ongó wa Isake na Ongó wa Yakobo.» <sup>38</sup>Yesu wéba

<sup>b</sup> 20.37 Soma Ituka 3.1-6.

tu mbu: «Ongo ntí Ongo w'ebakwire, ina iwe Ongo w'ebári ho; ebea bati bári ho bushwa na we.»

<sup>39</sup>Bahani bimă b'eMyomba\* bamwĩre mbu: «eMuhani, umasúbyá shu.»

<sup>40</sup>Kuruma nampo, kusira mwea íngu werekangá imushísha tu kinwa kiti-kiiti.

### Kirisitu mukiri irénga Ndauti

(Matayo 22.41-46; Mariko 12.35-37)

<sup>41</sup>Kuruma n'ebinwa mbyo, Yesu wáshísha ebea mbu: «Bushwa nki ebea bebange mbu Kirisitu\* nge Mwana wa Ndauti? <sup>42</sup>Ntí Ndauti wisine ke ngwebanga mu kitabo ch'eSaburi mbu:

«Nyere kuritu Ongo wakweré Nyere kuritu mbu:

"Rika mu kuboko kwani kw'ekwabume,

<sup>43</sup>ieya n'erotu ndu rusekia ebarénda babe bábése kikai ch'eritereke mo ebisando byabe<sup>ch</sup>."»

<sup>44</sup>«Kuba Ndauti wakubikira Kirisitu mbu «Nyere kurwabo», buni ke tu Kirisitu ngo ngwamubesě musike wa Ndauti?»

### Mukohyanga kuri ebahani b'eMyomba

(Matayo 23.1-36; Mariko 12.38-40)

<sup>45</sup>Ebea bati bakiangá bakírí batéange Yesu emate, wére ebanafunsi\* bae mbu: <sup>46</sup>«Mukohyanga n'ebahani b'eMyomba\*! Ibó bashimangă ietana-etana na nchangi sareha-reha. Na bashimangă tu ikeiwa munkati n'ebea n'irika mu bitumbi bya kubusondori by'emasinangoki\* nănku kuriwanga ebió. <sup>47</sup>Banyakangă ebashumbakari ebikai byábó biti. Na bahemangă tu mahemo a mundiendie kongo basúngwa n'ebea. Bushwa năncho, Ongo wasehukumuyo bo nguru!»

### Ebisabo by'emushumbakari musene

(Mariko 12.41-44)

**21** <sup>1</sup>Yesu wakíanga uri mu Numba ya Ongo, watámbya emeso mu bea, wásúnga ebukiange ebatámhá bária ebisabo byábó mu nkũ y'ebisabo. <sup>2</sup>Wásúnga tu mushumbakari umă musene íngu weyangá nae karia mo twabikoroto túbí. <sup>3</sup>Nampo Yesu wéba mbu: «Nibwirengi mu riíra, emushumbakari uno musene, iwe nge wamakuto bisabo bingi irénga mbi ebyamakia ebea bati bakuto. <sup>4</sup>Bushwa mbu ebati bano, ebisabo byamakuto bo ibyo muhango wambi byakusianga mu behe byábó nti bamakindanya

kasa emirao yăbo iti. Ina emushumbakari uno, iwe mu busene bwae, wamakuto ebite biri rero nae by'erimusake mu buingo bwae.»

**Yesu waturá mwasi w'eribiha r'eNumba ya Ongó**

*(Matayo 24.1-2; Mariko 13.1-2)*

<sup>5</sup>Bea bimă babesenga bashambarange bushwa n'eNumba ya Ongó\*. Babesenga bebange mbu yimbwa mu makoi akóndá-kóndá hima na bimpe bikai mbi byakíangá ebea básaba Ongó. Ina Yesu wére bo mbu: <sup>6</sup>«Bino ebisungange banu, kwásêya matu ngi mutusungiyó tu ikoi rima hambasiro na rimpe, ebisusu biti bisekakurwayo.»

**Ebinwa by'ematu a hende**

*(Matayo 24.3-14; Mariko 13.3-13)*

<sup>7</sup>Ngerikia ebanafunsi bae bamushisha mbu: «eMuhani, mbeni ebinwa mbi byebange óngo byasetayo mu ání matu, na buni nge busekíayo ebea basiba mbu ebinwa mbyo biri keya?» <sup>8</sup>Yesu wásako bo mbu: «Mukohyanga, kiro muhuswa na mwea uti-uti. Bushwa mbu bea bingi baseyayo mu rina rani n'ieba mbu ibó ke nge Kirisitu, entambi yameya! Ina kiro mumisa bo. <sup>9</sup>Mukákíayo murukira emyasi y'ebita n'ebushokoshoko, kiro musubahi bushwa mbu ebite mbyo byakomenwa kasa isúngwa, ematu ngo echuo kisebeseyo ntíchahieré nensi engendero ya cho.»

<sup>10</sup>Yesu wéba tu mbu: «Bea ba chuo kimă basekwanayo na bea ba kímpě chuo, na bwami buma busekwanayo na bumpe bwami. <sup>11</sup>Kwasetayo karingiri kákiri mu chuo. Kusebeseyo rwaka rwingi na makoni mingi ásuma mu byuo. Kusesungwayo biteerere bya bishisharo ituka ekwio.

<sup>12</sup>«Ina kubusondori n'erísúngwa r'ebinwa mbyo, ebea bendi bábúmínange n'ibunubya, kongo musambishwa mu masinangoki\* n'ibutáa mu mwiýóróró. Na básenda baburiange tú mu makako ebami n'ebakwakare b'echuo bushwa nani. <sup>13</sup>Ietere mbyo, mukwenda banu mwebange ebinwa ebyosi banu bushwa nani. <sup>14</sup>Kino nge chasibiriranga banu: kiro mwinubya na kwishishirisha mbu mbeni buni nge busenda bwebange banu. <sup>15</sup>Bushwa mbu ani ngi nendi nibuninkange ebinwa by'ebutesa ebisenda byebange banu, ieya n'entambi nji ebarénda binu batendi bakochange ienga byo abe itina byo. <sup>16</sup>N'ebabuti binu, na basike binu, na banakinu, na bira binu nabo basebusiburayo kuri ebakwakare. Na bimă munkati nñu basekererwayo ubansa rw'ikwa. <sup>17</sup>Ebea bati basebubaayo bushwa n'erina rani. <sup>18</sup>Ina mu biti mbyo, kusira anga n'uteo rumă rw'emintwe yinu indu ruseriminayo. <sup>19</sup>Mwendi mwiandiya, bushwa náncho mukushukayayo ebuingo bwinu.»

### Erishamburwa ra ku Yerusaremu

(Matayo 24.15-21; Mariko 13.14-19)

**20** Kuruma nampo, Yesu wênderana n'ieba mbu: «Mukûkiayo musungă ebasura batimba erubungu rwa ku Yerusaremu, musibanga mbu ngie ruri kashamburwa. **21** Nampo, ebea mbi basebeseyo mu chuo cha ku Yundeabábekĩ mu sângu, nãmbi basebeseyo ku Yerusaremu bátuké kuro. Nãmbi basebeseyo mu tunsari kiro bákúruka tũ.

**22** «Bushwa mbu ematu ngo ngyasekiayo Ongo wahukumu ebea kongo ebityi mbi byebwangá mu Mitiro Yashurukara bíberereré.<sup>a</sup> **23** Mu matu ngo, risebeseyo buhanya kuri ebamína barito na mbi barishange ebana mabere, bushwa mbu kusebeseyo minubo mingi mu chuo ncho. Na Ongo waseshéayo ebea mbo mbu iwe wasúbúké bo. **24** Bimă baseshurwayo mu myere na bampe basendayo rereke mu byuo by'esankaro siti. Nãmbi ntĩbosi Ongo basenantayo ku Yerusaremu ieya nãmbu busekiayo ematu aninkwangá bo árumira.»

### Erikuruka ra Yesu Kirisitu

(Matayo 24.29-31; Mariko 13.24-27)

**25** Kuruma nampo, Yesu wéba tu mbu: «Ebea basesungayo biteerere mu mwĩshĩ, mu mwěri na mu sankekeni. Na hano hansi, ebea basekwayo koha n'itingirwa na böba bushwa emibimbi n'emirurumo y'enyansa. **26** Ebea baseriminyayo ebwenge bushwa n'eböba mu rianikira ebinwa mbi bisetayo mu chuo. Bushwa mbu ebityi mbi biri n'ema mu mbingu bisetenjiwayo. **27** Kuruma nampo, ebea basenisungayo ani eMwana w'eMwea\* bweyange ani mu rutundo na maa hima na busimé bwingi. **28** Mu ntambi ebinwa mbyo bisekiayo byabucha isungwa, musimananga n'ibese na maa, bushwa mbu ematu inu erishukara ameya.»

### Ebiteerere by'erikuruka ra Yesu

(Matayo 24.32-35; Mariko 13.28-31)

**29** Kuruma nampo, Yesu wákere ebea emushinga uno mbu: «Mwĩhanisanga mu mutĩ w'etini n'emítĩ impě: **30** Entambi nji yasunga banu emasani aó abúchá ishuka, banu musibanga mbu ekiranga chakonda ngie kírĩ kéya. **31** Nge būmbo, mukûkiayo musungă ebinwa mbyo ngie byetange, musibiriranga mbu eBwami bwa Ongo\* ngie buri keya. **32** Nibwirengi mu riira mbu: ebinwa bino biseberereshiwayo na bea bimă b'ematu ano

<sup>a</sup> **21.22** Soma Osea 9.7.

nensi nti t́ibakwa. <sup>33</sup>Embingu n'echuo bisetayo, ina ebinwa byani ibyo bitetiyo kárankuso.»

### Erotu rwa hende ruseyayo nsisu

<sup>34</sup>Kuruma nampo, Yesu wéba mbu: «Mukohyanga! Emitima yinu kiro yabinduke n'embusha y'erisonda irisa ringi, n'itamira, na kwinubya bushwa n'ebuingo bwinu. Kuba nt́imukae shu, erotu rwa hende <sup>35</sup>rusebeseyo ímbu bukíanga emuteo wátinge. Bushwa mbu erotu ndo ruseyayo, rusesarimiyayo ebea bati b'echuo. <sup>36</sup>Mwendi mukohya na mwendi muhema kira ntambi. Mu rikía mbo, mukushee emaa eribeka ebinwa mbi biseyayo n'emaa erisimana mu makako nani, ani eMwana w'eMwea\*.» <sup>37</sup>Kirotu ndu rwakianga Yesu wabesenga usibanange mwihana ebea mu Numba ya Ongo\*, wabesenga wendanga kasame mu rou rw'eMiseituni. <sup>38</sup>Na kirotu muranga-ranga, ebea bati babesenga béyangă kamurukira ha Numba ya Ongo.

### Enama y'erishura Yesu

(Matayo 26.1-5; Mariko 14.1-2; Yohana 11.45-53)

**22** <sup>1</sup>Erotu rukiri rw'emikati nji isira chachu, rwabikirwa mbu Pasaka\*,<sup>a</sup> rwabesenga ngíe ruri keya. <sup>2</sup>Ebakwakare b'ebakuhani\* n'ebahani b'eMyomba\* babesenga basondange buni buseshurishayo bo Yesu, ina babesenga basubahange ebea.

### Yuta warisía isibura Yesu

(Matayo 26.14-16; Mariko 14.10-11)

<sup>3</sup>Nampo ke, Mushumbu\* wákime mu mutima wa Yuta Isikarioti, umă mu santumwa sa Yesu. <sup>4</sup>Yuta wênda kashambara n'ebakwakare b'ebakuhani\*, hima n'ebakwakare b'ebasura mbi barangangă eNumba ya Ongo, kongo warana nabo buni busesibure we bo Yesu. <sup>5</sup>Ebakwakare mbo bashima nguru, na b́arana nae mbu basemuninka behe. <sup>6</sup>Yuta ẃarisia, wabucha isonda ntambi yakónnda y'erininka bo Yesu n'ebea nti t́ibósi.

### Yesu warísá ebió bya hende hima n'ebanafunsi bae

(Matayo 26.17-25; Mariko 14.12-21; Yohana 13.21-30)

<sup>7</sup>Erotu rukiri rw'emikati nji isira chachu rweya. Mu rotu ndo, eBayuta babesenga bashurangă mburi bushwa n'erotu rukiri rw'ePasaka. <sup>8</sup>Yesu

<sup>a</sup> **22.1** ePasaka yashembwa hano nge yasubúkia erotu ndu rwatukanga Baisiraeri mu bukobé bwa Farao ku Misiri, ina nt́i nge Pasaka y'erifúka ra Yesu Kirisitu.


watúma Petero na Yohana, wére bo mbu: «Mwendi katuteke bió by'erotu rukiri rw'ePasaka\* kongo twarísa.» <sup>9</sup>Bamushisha mbu: «Mbeni ushima twêndĩ katekere byo kuni?» <sup>10</sup>Wére bo mbu: «Mwendi mu rubungu rukiri. Mumeya ko, mukukumana mwea umă waria irea ra mecha. Emwea ngo mumumisanga mu numba nji yasekime mu we, <sup>11</sup>na mwerenga miné mo mbu: «Muhani ukushishange kuba hání nge hari buari mu numba haseríre we ebió by'ePasaka hima n'ebanafunsi\* bae.» <sup>12</sup>Nae wasebushéa buari bukíri ekwio ínkũ ekwamatunganyiwa. Nánko nge kutekĩ banu ebió by'ePasaka.» <sup>13</sup>Ebanafunsi mbo benda. Bakiangá bameya ko, bákúmána ebikai bitu mbu bwakíangá Yesu wére bo. Nampo, bateke ho ebió byábó by'erotu rukiri rw'ePasaka.

### Ebió by'erikandire mõ Nyere kuritu

(Matayo 26.26-30; Mariko 14.22-26; 1Bakorinto 11.23-25)

<sup>14</sup>Entambi yakianga yameya, Yesu n'esantumwa\* sae bárika n'ibucha írisa. <sup>15</sup>Wére bo mbu: «Nákuhunángá nguru írisa ninu ebió bino by'erotu rw'ePasaka\* kubusondori n'erinuba rani! <sup>16</sup>Bushwa nibwirengi mbu ntârisiyo tu ninu Pasaka ieya n'erotu ndu rusekiayo narísa imbi byarumira mu Bwami bwa Ongó\*.»

<sup>17</sup>Nampo, Yesu wátinge erusára, wátata Ongó n'ieba mbu: «Mutingĩ erusára runo, na mwomu banu bati. <sup>18</sup>Bushwa nibwirengi mbu itukire enompena, ani nt'omu tuyo ndifai\* ieya n'erotu ndu ruseyayo eBwami bwa Ongó\*.»



Yesu ubengange emukati (22.14)

<sup>19</sup>Kuruma nampo, Yesu wátinge mukati, na watata Ongo. Wanoa o n'ininka esantumwa sae n'iere bo mbu: «Uno nge mubi wani ewamakinda isiburwa bushwa ninu. Mwendu muronja buno murinikandira.»

<sup>20</sup>Bakiangá bamahea irisa, Yesu wáninka hotu bo usara rwa ndifai n'ieba mbu: «Erusára runo ng'erirai rishasha r'enchama yani eisekubuka bushwa ninu. Iro ng'erirai ndi raronjanga Ongo mu nchama yani inji isekubuka bushwa ninu.

<sup>21</sup>«Ina mukaenga! Emwea ngu usenisibura ngié urisange hima nani. <sup>22</sup>Mu riíra, ani eMwana w'eMwea\* nasêkwa ímbu bwakíangá Ongo wéba. Ina wahérwá emwea ngu wasenisibura!» <sup>23</sup>Nampo, esantumwa sabucha ishíshana munkati nato kuba inyé ngwasekora ekinwa ncho!

### Inyé nge mukwakare?

<sup>24</sup>Kuruma nampo, ebanafunsi babucha buhaka bukíri bw'isiba kuba inyé ngwamubesé mukwakare munkati nabo. <sup>25</sup>Yesu wére bo mbu: «Mu bea mbi ntíbosi Ongo, ebami bábó basimanirengá bo mu maa. Ina ebakwakare bashimangá ebea bábikiré bo mbu: «Bakori ba binwa byakonda.» <sup>26</sup>Ina kiro byendi bibesange mbo munkati ninu. Kinsi mwea ngu mukwakare mu banu ngwakomenwa ibese buri iwe nge mwanunke, n'emukwakare wahwa ibese buri iwe nge mukori. <sup>27</sup>Mbeni inyé nge mukwakare mu bea bano: íngu wariká mwirisa ebió abe íngu eumusheéngi byo? Kai ntí ngu wariká n'urisange ebió! Ina ani niri munkati ninu buri mukori.

<sup>28</sup>«Banu ntímukunisíanga mu ntambi y'emyereko yani. <sup>29</sup>Bushwa náncho, namábuninka eBwami ímbu bwakíangá hotu Tita wánininka bo, <sup>30</sup>kongo murisa n'iomu hima nani mu Bwami bwani. Na banu tu mukurikayo mu bitumbi by'ebami kongo muhukumuyo esangandá ikúmi na sibi s'eBaisiraeri.»

### Yesu weré Petero mbu wasemutúna

(Matayo 26.31-35; Mariko 14.27-31; Yohana 13.36-38)

<sup>31</sup>Kuruma nampo, Yesu wére Simoni mbu: «eSimoni, Simoni! Rukira! Mushumbu\* wamaninkwa ntambi y'eribufufura ebukianga emwea wafufurá engáno. <sup>32</sup>Ina namakuheme kongo utusii erisimira rabe kuri ani. N'entambi isekia ukuruká kuri ani, usakenga banakinu kongo báandira nguru mu risimira.»

<sup>33</sup>Petero wámwire mbu: «eNyere kuritu, ani nasimira imínwa hima nabe n'ikwa hima nabe.»

<sup>34</sup>Yesu wámusako mbu: «Nikwiréngi óngo Petero mbu runotu enchongore isebikira na nt'umakinda inítúna meta ashatu mbu ntíongonosi.»



### Behe, kimbesa na mbengé

<sup>35</sup>Kuruma nampo, Yesu wáshísha ebanafunsi bae mbu: «Mbeni nakíángá nabutúma, banu nti tímuria behe, kimbesa abe birato, mbeni kuri kikai charukwanga banu?» Nabo mbu: «Anga!»

<sup>36</sup>Nae wére bo mbu: «Eo ke, kinsi ngu uri na karufaranga watingi ko, nǎngu uri na kimbesa nae wátingi cho, nǎngu usira mbengé wachúye enchangi yae kongo wachúra yo. <sup>37</sup>Nibwirengi mbu rakomenwa ebinwa bino binihieri imbi ebyaandikwa mu Kitabo Chashurukara mbu: «Uansirwange munkati n'ebabisha.»<sup>b</sup> Íra, ebinwa biti mbi byanikae ani ngié biri kwíhi n'ieya hende.»

<sup>38</sup>Nampo, ebanafunsi bamwíre mbu: «eNyere kuritu, kaé, turí na mbengé sibi hano.» Nae wásako bo mbu: «Ae, múshirí mpo.»

### Yesu wahema Ongó mu rou rw'eMiseituni

(Matayo 26.36-46; Mariko 14.32-42)

<sup>39</sup>Yesu wátuka mpo, watáríe mu rou rw'eMiseituni ímbu bwabesenga bukíanga ho we. N'ebanafunsi\* bae bamutucha. <sup>40</sup>Warekia wameya ko, wére bo mbu: «Muheme kongo muhundusa emyereko.» <sup>41</sup>Kuruma nampo, wíshíka kore kakeke nabo mu bwende ebwamuhieré mo ikoi ritawa na mwine, wákome emaru n'ihema mbu: <sup>42</sup>«eTita, kuba usasá, erusára runo rw'eminubo ino n'echei ro kore nani! Ina kiro byabunduke burí ebwashima ani, ina ebyashima óngo nge bikorwe.» [<sup>43</sup>Nampo, maraika umǎ wátuka mu mbingu wéya kongo wámuninka maa. <sup>44</sup>Yesu wabesenga na koha nguru, nampo wabucha ihema ketu na maa. N'esantubano sabucha imutuka mo n'irara ekwansi burí matondi a nchama.]

<sup>45</sup>Yesu wakíanga wamakinda ihema, wásimana n'ikuruka hari ebanafunsi\* bae. Wákumana bo nti barere bushwa babesenga na bonso bwingi. <sup>46</sup>Wére bo mbu: «Mbeni banu murére bushwa nki? Musumuke na muheme kongo kiro mukime mu myereko.»

### Eritingirwa ra Yesu

(Matayo 26.47-56; Mariko 14.43-50; Yohana 18.3-11)

<sup>47</sup>Yesu wakíanga ukíri webange, hiha-hiha kikembe cha bea chamusaire nsisu. Yuta umǎ mu santumwa sae nge wasondorenga bo. Wákensere hari Yesu kongo wámukoke. <sup>48</sup>Ina Yesu wamushisha mbu: «eYuta! Mbeni mu rinikoke nge ranisibura mo óngo, ani eMwana w'eMwea\*?» <sup>49</sup>Ebea

<sup>b</sup> 22.37 Soma Isaya 53.12.



*Yuta wasibura Yesu (22.47)*

mbi babesenga hima na Yesu barekia basunga ebyasondanga isúngwa, bamushisha mbu: «eNyere kuritu, mbeni tukondae bo na mbengé?» <sup>50</sup>Hihihihi umă mubo wákera ekote kw'ekwabume kw'ekahungu k'emukwakare w'ebakuhani\*. <sup>51</sup>Ina Yesu wéba mbu: «Kôko, burómbó!» Wátinge mu kote kw'emwea o n'imuramya.

<sup>52</sup>Nampo Yesu wére ebakwakare b'ebakuhani\*, n'ebakwakare b'ebasura mbi ebarangangă eNumba ya Ongó\*, n'ebakúngú mbi béyángá kămumína mbu: «Bushwa nki banu muniyere na mbengé hima na mihumbo burí ani mwibi? <sup>53</sup>Ematu ati nabesenga niri nínu mu Numba ya Ongó ina ntímunitingenga. Ina entambi ino nge yinu na ntambi y'emukwakare w'emwirimya.»

### **Petero watúná Yesu**

*(Matayo 26.57-58,69-75; Mariko 14.53-54,66-72; Yohana 18.12-18,25-27)*

<sup>54</sup>Kuruma nampo, ebea mbo batinge Yesu. Bakiangá bamamutinge, bamuria mu numba y'ekuhani mukwakare\*. Petero wabesenga umisange bo kasando kihi na kare.

<sup>55</sup>Barekia bêya, bákóya kashá munkati n'ebutara bw'ekuhani mukwakare, n'irika. Petero nae wêya kanyukara mu kashá hima nabo. <sup>56</sup>Mukori umă wamumína wásúnga Petero ntwarika kumushi n'ekashá. Ekikumi ncho chamusisirisira nguru n'ieba mbu: «Ewabume ngu nae uri rero hima na Yesu!» <sup>57</sup>Ina Petero wítuna n'ieba mbu: «Óngó mumína, ntínosi emwea ngo!»

**58** Kuruma na ntambi nkeké, umpě mwea nae wásúnga Petero n'imwire mbu: «Na óngo hotu umă mu bo.» Ina Petero wásako emwea o mbu: «Etita, ani ntínimosi.»

**59** Kwakianga kwameta buna ntambi nima, umpě mwea wéba na kwimíma mbu: «Mu riíra, emwea ngu iwe nae wabésěyo hotu hima na Yesu, bushwa mbu iwe nae mwea w'echuo cha ku Ngariraya.»

**60** Ina Petero wámwire mbu: «Etita, ntínosi chebange óngo!» Wakíanga ukiri webange, enchongore yábikira nákubá. **61** Nyere kuritu wíkebera, wásindera Petero. Petero wásubukia ebinwa byamweréngá Nyere kuritu mbu: «Nikwiréngi óngo Petero mbu runotu enchongore isebikira na nt'umanitína meta ashatu mbu ntíongonosi.» **62** Petero wátuka habutara na nt'urengi nguru.

### Ebea basea Yesu n'imuhumba

(Matayo 26.67-68; Mariko 14.65)

**63** Ebea mbi babesenga barangange Yesu babesenga bamuseange n'imuhumba. **64** Bamumína emeso n'imushisha mbu: «Tabura k'emwea ngu wamákukaso!» **65** Ibó bamurekérángá bimpe binwa bingi by'imukambaa.

### Yesu warierwá ha Rüşu rukiri rw'eBayuta

(Matayo 26.59-66; Mariko 14.55-64; Yohana 18.19-24)

**66** Ebutu bwakíángá bwamacha, ebakwakare b'eBayuta n'ebakwakare b'ebakuhani\* hima n'ebahani b'eMyomba\* bákúmánana mu Rüşu rukiri rwabo. Nampo barisha Yesu mu makako ábó. **67** Bamushisha mbu: «Eo twíri ke, mbeni óngo nge Kirisitu\*?» Yesu wásubíe bo mbu: «Nakiro namubwire, mutunisimiri, **68** na namubushishá kinwa mutúnisubii. **69** Itukire enompena, ani eMwana w'eMwea\*, mu ruharo rw'ekwabume rwa Ongo miné maa nge mwěnda karika ani.»

**70** Nampo ke, ebati bamushisha mbu: «Ngerieba mbu óngo ng'eMusike wa Ongo?» Na Yesu mbu: «Banu nge mumeba mbo!»

**71** Mu rikindanya, beba mbu: «Ntí twirae tuna mu mwea uti-uti ngu wamututúre emyasi y'emwea uno! Bushwa mbu twamakinda irukira bate bisine ebyameba we!»

### Yesu warierwá kuri Pirato

(Matayo 27.1-2,11-14; Mariko 15.1-5; Yohana 18.28-38)

**23** **1** Kuruma nampo, ebea bati mbi babesenga ha nkumanano y'eRüşu rukiri rw'eBayuta basímána n'iria Yesu kuri Pirato. **2** Bakiangá bameya ho, babucha imusogere mbu: «Twamakumanyanya emwea uno nt'usheereshange ebea bitu. Werengi rero bo mbu kiro bendi

batuange tu ehoru kuri Kaisari, na webange tu mbu iwe kisine nge Kirisitu\*, mwami.»

<sup>3</sup>Pirato wáshísha Yesu mbu: «Mbeni ōngo nge Mwami w'eBayuta?» Yesu wámusako mbu: «Ōngo ng'umeba mbo!» <sup>4</sup>Nampo, Pirato wére ebakwakare b'ebakuhani\* n'ekikembe ch'ebesa mbu: «Ntínasúngá kinwa nchi chamusingwa mbu emwea uno wáhukumiwe ikwá.» <sup>5</sup>Ina bímíma nguru n'ieba mbu: «Emwea uno, ebinwa bihanange we ebea bisheeresha echuo kiti cha ku Yundea. Wākubúchie nabyo mu chuo cha ku Ngariraya, na nge uno wamaremba nabyo kúno ku Yerusaremu.»

### Yesu warierwá kwa Herote

<sup>6</sup>Pirato wakíanga warukirá ebinwa mbyo, wáshísha mbu: «Mbeni emwea uno mwísa ku Ngariraya?» <sup>7</sup>Wakíanga wamarukira mbu Yesu mwísa echuo nchi chabesenga chasimanirwa na Herote, wére bo mbu barie Yesu kwa Herote bushwa mbu erotu ndo Herote wabesenga uri ku Yerusaremu.

<sup>8</sup>Herote wabesenga urukiranga ho emyasi ya Yesu. Itukire kare nt'usondanga ho imúsúnga. Wabesenga uhunanga imúsúnga nt'uronjange bishisharo. Nampo ke wámoa nguru mu rimusúnga. <sup>9</sup>Washishirisha Yesu binwa bingi, ina Yesu ntwamusakonga. <sup>10</sup>Ebakwakare b'ebakuhani\* n'ebahani b'eMyomba\* ebabesenga mpo babesenga bákwmíma nguru mu ríhambike Yesu binwa bingi. <sup>11</sup>Herote n'ebasura bae babucha ikambaa Yesu n'imucharika. Bamumbaricha nchangi inji yabesénga yakomá nguru, nampo Herote wámukurucha tu kwa Pirato. <sup>12</sup>Herote bána Pirato babesenga barénda, ina itukire erotu ndo bábése bamwíra na mwíra.

### Pirato wakerá erubansa rwa Yesu mbu wáshurwe

(Matayo 27.15-26; Mariko 15.6-15; Yohana 18.39—19.16)

<sup>13</sup>Pirato wábikira ebakwakare b'ebakuhani\* n'ebampe bakwakare hima n'ebesa. <sup>14</sup>Wére bo mbu: «Mumanirishié emwea uno mbu usheereshange ebea. Namámushisha mu makako inu bushwa n'ebinwa mbi byamamusongere banu, ina ani ntínasúngá kiro na kinwa kimá chema mu'mbi ebyamamusongere mo banu. <sup>15</sup>Herote nae ntíwasunga kinwa chema kuri we nge chasingwa wamatukuruchie tu we. Kai emwea uno ntwákukora kinwa chema inchi chamusingwa wáshurwa. <sup>16</sup>Kai naseninkana ho momba bamurase tushushu, kuruma nampo nasemwobora.» [<sup>17</sup>Mu kirotu rukiri rw'ePasaka, Pirato wabesenga wobórenga bo mwea umá ituka mu mwiyóró.]

<sup>18</sup>Ina ebea bati bakúa mongo mbu: «Shúrá emwea uno, ina twoboreri Baraba!» <sup>19</sup>Baraba ngo waminwangá bushwa n'eburúngá mbu bwabesenga

mu rubungu, na kwákwa mwea. <sup>20</sup> Mu riíra, Pirato wabesenga uhunange ibora Yesu. Wéba tu kasa n'ebéa. <sup>21</sup> Ina ebea babesenga bakúange mbu: «Mútundíke mu musaraba, mútundíke mu musaraba!»

<sup>22</sup> Pirato wáshisha tú bo r'emeta ashatu mbu: «Mbeni emwea uno wákukora kinki chema? Ani ntínasunga kiro kinwa kimá chema nchi chamusingwa washurwa. Kai naseninkana ho momba bamurase tushushu, kuruma nampo nasemwobora.»

<sup>23</sup> Ina bákúá ketu nguru n'ieba mbu Yesu wátundikwe mu musaraba. N'emirenge yábo yáhundusa Pirato. <sup>24</sup> Nampo, Pirato wásúnga nti rakoma waronjei bo ímbu ebuhunange bo! <sup>25</sup> Wóbore bo Baraba ngu waminwangá bushwa n'eburúngá mu rubungu n'erikwa r'emwea.

### Ebasura batundika Yesu mu musaraba

(Matayo 27.32-44; Mariko 15.21-32; Yohana 19.17-27)

<sup>26</sup> Ebasura barekia bendange na Yesu, bakúmana wabume umá mbu nge Simoni wa mu rubungu rwa ku Kurene na nt'utukange ekwishwa. Bamuriesha emusaraba wa Yesu, n'imwire mbu wamumise kuruma.

<sup>27</sup> Bea bingi babesenga básiere Yesu kuruma. Mubo, habesenga hotu bamína bingi baréngi na bonso bwingi bushwa nae. <sup>28</sup> Yesu wíkebera kuri ebamína n'iere bo mbu: «Banu bamína ba ku Yerusalemu, kiro murire bushwa nani! Ina mwíriri banu bisine n'ebána binu. <sup>29</sup> Bushwa mbu mu matu ngi eyange, ebea básebayo mbu: «Esangumba, námbi bátangabútanga, n'ebátangaríshanga bána mabere, nge bakasanirwá!» <sup>30</sup> Mu matu ngo, ebea basêréyo esángu mbu: «Mútúsurúki!» N'íire esantata mbu: «Mútúsiki.»<sup>a</sup>


<sup>31</sup> Bushwa mbu kuba baronjee emuti mubísi mbo, ngyâbere hání emuti wakama?»

<sup>32</sup> Ebasura barishángá tú babisha bábí kongo báshura bo hima na Yesu. <sup>33</sup> Bakiangá bameya mpi habikirwangá mbu «Kahangasi», bátundika Yesu mu musaraba. Bátundika hotu n'ebabisha mbo, umá ekwabume kwa Yesu n'eumpě ekurembe kwae. <sup>34</sup> [Yesu wéba mbu: «eTita, sasírá bo bushwa mbu ntíbosi ebikorange bo.»]

Mu risonda ibanya esanchangi nsi sabesenga sámbara we, ebasura bárekerá mishari ekwansi kongo básiba emuhango wa kira mwea.

<sup>35</sup> Ebea babesenga bákusimana mpo nti bákaengi. Ebakwakare b'eBayuta babesenga bamuseange na nti bebange mbu: «Wákushukayanga bampe, wíshukaye ke nae, kuba iwe ho nge Kirisitu\* ngu warondorwanga na Ongol!»

<sup>a</sup> 23.30 Soma Osea 10.8.



*Yesu watundikwa mu musaraba (23.33)*

**36** Ebasura nabo babesenga bámúseange. Bákensere kwihi nae n'imuninka ndifai eyashubuka, **37** bamwĩre mbu: «Kuba ōngo nge Mwami w'eBayuta mu riira, ishukáye mpo ōngo kisine!» **38** Na hambasiro n'emuntwe wae habesenga haandikwa bunu mbu: «Uno nge Mwami w'eBayuta.»

**39** Umă mu babisha mbi bătundikwángá mpo, wabesenga umucharikange mbu: «Mbeni ntí ōngo nge Kirisitu\*? Ishukáye ke, na bate hotu tushukaye!» **40** Ina eumpe wáfine míné n'ieba mbu: «Mbeni ōngo ntúsubahá Ongo nakiro mbu umahukumiwa hima n'emwea uno? **41** Bate bábí twahukumiwa itukana n'ebibí byakoranga bate. Ina emwea uno usira bubí buti-buti bwakukora we.»

**42** Kuruma nampo, wéba mbu: «eYesu, anginobya mu ntambi isekurukayo ōngo kasimanire ebea mu Bwami bwabe!» **43** Yesu wamusubie mbu: «Mu riira, nikwiréngi mbu runotu hona ukúbése hima nani mu Paratiso.»

### **Erikwa ra Yesu**

*(Matayo 27.45-56; Mariko 15.33-41; Yohana 19.28-30)*

**44-45** Rakianga rarengeka buna ntambi mutuba sa mumwishi, emwishi wárima. Emwirimya wírasa ekwansi mu chuo kiti ieya na mu ntambi

mwenda. Enchangi nji yabesénga irembengi mu Numba ya Ongó\* yábereka bebe bíbí.<sup>b</sup> <sup>46</sup>Nampo, Yesu wákua mu murenge mukiri n'ieba mbu: «eTita, natereka emutima wani mu mine yabe.» Wakíanga wamahea ieba ebinwa mbyo, wákera emutima.<sup>ch</sup>


<sup>47</sup>Emukwakare w'ebasura ba ku Roma wakíanga wamasunga ebyameta, watata Ongó n'ieba mbu: «Ííra, emwea uno wabesenga w'ííra!»

<sup>48</sup>Ebea bati mbi beyanga kakae, bákúruka nti bikaso-kasongi mu bukuba bushwa n'ebönso. <sup>49</sup>Ebati mbi babesenga bosí Yesu n'ebamína mbi babesenga bámutindikia itukire mu chuo cha ku Ngariraya, babesenga bakusimana kore mu risúnga mbu bwabesenga bwetange ebinwa bití mbyo.

### Eritawa ra Yesu

(Matayo 27.57-61; Mariko 15.42-47; Yohana 19.38-42)

<sup>50-51</sup>Kwabesenga mwea umă mbu nge Yosefu w'erubungu rwa ku Arimatayo, mu chuo cha ku Yundea. Yosefu ngo wabesenga murongu na mwea waombokara. Wabesenga urindirengi eBwami bwa Ongó\* bweye. Wabesenga tu umă mu bakwakare b'eRüşhu rw'eBayuta. Ina iwe ntwákimenga mu nama ya banachabo y'erishura Yesu. <sup>52</sup>Yosefu ngo wênda kuri Pirato n'imukonga ekında cha Yesu. <sup>53</sup>Kuruma nampo, wéba mbu bahiche cho. Wábiririre cho enchangi na wataa cho mu risinda



Yesu warierwa murisinda (23.53)

<sup>b</sup> 23.44-45 Enchangi njo yabesénga yabanyá mpi hashurukara nămpi hashurukara nguru mu Numba ya Ongó. <sup>ch</sup> 23.46 Soma Saburi 31.6.

rũmbwa shu mu ukanga rukiri. Kusira mwea uti-uti ngu wabesenga wamatáwanga mu ro. <sup>54</sup>Ebiti mbyo byetángá otu rwa asanu, n'eSabato\* nti ngié iri kabucha.

<sup>55</sup>Ebamína mbi babesenga batindikiane Yesu itukire mu chuo cha ku Ngariraya, bámísa Yosefu. Basúnga erisinda nãmbu bwaterekangá bo mo ekĩnda cha Yesu. <sup>56</sup>Kuruma nampo, bákuruka n'itunganya mafuta na marashi erisingo ekĩnda. Erotu rw'eSabato\*, báruhuka itukana n'ebwébá eMyomba.

### Yesu wafuká

(Matayo 28.1-10; Mariko 16.1-8; Yohana 20.1-10)

**24** <sup>1</sup>Erotu rw'eriinga muranga-ranga, ebamína mbo baramuke hisinda nti báhátá emarashi ngi atunganyangá bo. <sup>2</sup>Bakiangá bameya ho, bákúmána erikoi rikiri ndi rabesenga raribia erubi rw'erisinda nti ramashíkwa kore n'erísinda. <sup>3</sup>Bákíme kumunda n'erísinda, ina ntĩbakumanangá mo ekĩnda cha Nyere kuritu Yesu. <sup>4</sup>Nampo bárúkwá busekía bo. Hiha-hiha, kumushi nabo hasúngwa babume bábí nti bambara nchangi sisanángé nguru. <sup>5</sup>Ebamína batingirwa na böba nguru, nabo bindamya emintwe yábo ekwansi. Ina ebabume mbo bere ebamína mbu: «Bushwa nki banu musondekanyange mwea ngu ushère munkati n'ebakwi? <sup>6</sup>Iwe usira tu hano, wamafuka! Musubukianga ebwabwirenga we ntukiri mu chuo cha ku Ngariraya. <sup>7</sup>Wabwirenga mbu iwe eMwana w'eMwea\* rakomenwa wasiburwe mu bea b'ensambi. Wabwirenga tu mbu wasetundikwa mu musaraba, ina wasefuka kuruma na matu ashatu.»



*Ebomina h'isinda ra Yesu (24.5)*

<sup>8</sup>Nampo, ebamína mbo basubukia ebinwa byebanga Yesu. <sup>9</sup>Batuka hisinda, benda kature ebinwa mbyo kuri esantumwa ikúmi na nima na kuri ebanpe banafunsi. <sup>10</sup>Ebamína mbi batúrérngá esantumwa\* ikúmi na nima emwasi nge bano: Maria wa ku Makitara, Shani na Maria nina wa Yakobo, hima na bampe bamína. <sup>11</sup>Ina esantumwa ntĩsasimiranga emwasi ngo, báhaká mbu binwa bya busa-busa. <sup>12</sup>Ina Petero iwe wásimana



n'ienda hisinda nt'ukanyahange. Warekia wěya ho, wíndama n'irungurira kumunda erisinda, ina wákumana ho emirémbe y'enchangi njo, wákuruka kukwae na nt'ushisharange mũmbi ebyakweta.

**Yesu wasáiré ebanafunsi bae bábí mũnse ya ku Emausi**

*(Mariko 16.12-13)*

**13** Erotu ruro-ruro ho, kai banafunsi bábí ba Yesu babesenga bendange mu rubungu rwa ku Emausi, ubungu ndu rwabesenga ruri mu biometere buna ikúmi na kimă na ku Yerusaremu. **14** Babesenga bashambarange bushwa n'ebinwa mbi byakweta. **15** Barekia bakiri bebange n'ishishana, Yesu wisine wákumana bo n'imisanya nabo mingo. **16** Bábesenga bamusungangé ina emeso ábó abumbirwangá kongo batamuteereri. **17** Yesu washísha bo mbu: «Banu mwendange n'ishambara binwa nki?» Batindira na nti bári na bonso mu mitima yăbo. **18** Umă mubo wabikirwá mbu Kireopa wámusako mbu: «Kai mu bea bati bári rero ku Yerusaremu ōngo kisine ho nge ntíongosi ebinwa byakweta ko mu matu abi ano?» **19** Yesu wáshísha bo mbu: «Mbeni binwa nki?» Nabo mbu: «Ebyakusunga Yesu wa ku Nasareti. Wabesenga mutahwa\* na nti uringi na maa mu rieba na mu rironja ebishisharo mu makako a Ongo na kuri ebea bati.

**20** «Ebakwakare bitu b'ebakuhani\* hima n'ebampe bakwakare bitu, bamusibura kongo wakererwa ubansa rw'ishurwa. Nampo bamutundika mu musaraba. **21** Twabesengá twamămwinyihire mbu iwe ngwasëshukayáyo eBaisiraeri. Kai, ōho! Na runotu ngie matu ashatu ebinwa mbyo byeta. **22** Na bamina bimă ba mu kikembe kitu bakutushishaya. Baramukěyo hisinda, **23** ina ntíbasungayo ekinda chae. Bákurukăyo n'itwíre mbu ebamaraika\* bakusaire bo nsisu n'iere bo mbu Yesu munkangwe. **24** Banakitu bimă hotu bëndáyo hisinda, nabo basungayo ebikai biti ímbu bwakukianga ebamina bere bo. Ina nabo ntíbakusunga ekinda chae.»

**25** Nampo Yesu wére bo mbu: «Banu birunge! Banu mutusibanga tete ebinwa byébangá ebatahwa\*! **26** Mbeni ntírakomenwa rero mbu Kirisitu\* wasunge minubo kubusondori n'erikime mu busimé bwae?» **27** Ngerikia ke Yesu wánsansomore bo ebiti byaandikwángá kuri we mu Kitabo Chashurukara cha Ongo. Wabuchie mu bitabo mbi byakíangá Musa waandika, n'iyere mu bitabo biti by'ebatahwa.

**28** Bakiangá bábungurengí erubungu rwendange mo ebanafunsi bábí mbo, rasúngwa buri Yesu iwe usondángo ienda kore, **29** ina ebanafunsi mbo bámuhema warike nabo bushwa mbu abesenga ngie murisisi n'ebutú nti bwamasiro. Nampo wákime mu numba n'irika nabo. **30** Entambi Yesu wakíanga urisange nabo, wátíngé mukati, watata Ongo. Wánoa o n'ininka

bo o. <sup>31</sup>Nampo ke emeso ábó óboka, nabo bámuteerera ke. Ina hiha-hiha, Yesu wáriribana mu meso ábó. <sup>32</sup>Babucha ishíshana mbu: «Ííra! Etambi yebange rero we nitu mu munse n'itunsosomore eMitiro Yashurukara, emitima yitu yakubesenga ntyamarisa ngo!»

<sup>33</sup>Hiha-hiha básímána n'ikuruka ku Yerusaremu. Bákúmána esantumwa ikúmi na nima hima n'ebampe banafunsi himpi habesenga hatumána bo <sup>34</sup>nti bebange mbu: «Ííra, Nyere kuritu wamafuka! Simoni wákumusunga!» <sup>35</sup>N'ebanafunsi bábí mbo nabo bature babine ebyakusungangá bo mu munse, nambu bwakúkíanga bateerera Yesu entambi nji yakunoanga we emukati.

### Yesu wishéá kuri ebanafunsi bae

(Matayo 28.16-20; Mariko 16.14-18; Yohana 20.19-23;

Mikorere 1.6-8)

<sup>36</sup>Ebanafunsi bakiangá bakírí bebange mu binwa mbyo, Yesu wisine wísaisha munkati-nkati nabo, n'iere bo mbu: «Mubesi na buhóro!»

<sup>37</sup>Bisarima na bátingirwa na kóha, bahaká mbu batíngwá na kifwasi. <sup>38</sup>Ina Yesu wére bo mbu: «Bushwa nki mumakwa böba? Bushwa nki banu munitikatikange? <sup>39</sup>Mukai emine n'ebisando byani: mu riíra, ani nge uno! Múningi mo, na munikai; bushwa mbu ekifwasi kítarikanga na mununku n'ikúa, ina ani niri nabyo ímbu bunisungange banu.»

<sup>40</sup>Wakíanga ukiri webange mbo, wáshéa bo emine n'ebisando byae. <sup>41</sup>Ebanafunsi mbo babesenga ntíbasimira nensi ebinwa mbyo bushwa n'esangoa n'erishishara. Nampo ke Yesu wáshísha bo mbu: «Mbeni banu muri na bió hano?» <sup>42</sup>Bámuninka chunda kimá cha kikwa chahwa. <sup>43</sup>Wátíngé cho n'írísa cho mu meso ábó. <sup>44</sup>Kuruma nampo wére bo mbu: «Ematu abesenga ani nínu, nabwirengá mbu ebinwa biti byaandikwángá bushwa nani mu Kitabo ch'eMyomba na mu mbi by'ebatahwa<sup>\*</sup>, na mu kitabo ch'eSaburi, byakomenwa biti bíberereré.»

<sup>45</sup>Nampo ke Yesu wóbora bo emyanikiri kongo bateerera ebwaandikwa eMitiro Yashurukara. <sup>46</sup>Wére bo mbu: «Raandikwa mbu Kirisitu<sup>\*</sup> wahwa inubiwa, na wasefuka munkati n'ebakwi kuruma na matu ashatu.<sup>a</sup> <sup>47</sup>Na mu rina rae nge basehubiri ebea bati mbu báreki esansambi sábo kongo basasirwa to. N'emurimo ngo ubuchíí ku Yerusaremu. <sup>48</sup>Banu ngi mwendi mutúränge ebiti mbi byákusungángá banu. <sup>49</sup>Munirukiri, nasêburebeka echakianga Tita waburaa. Ina murike kasa ku Yerusaremu ieya n'erotu rwaseshééyo banu emaa ngi asetuka mu mbingu<sup>b</sup>.»

<sup>a</sup> 24.46 Soma Isaya 53; Osea 6.2. <sup>b</sup> 24.49 Soma Mikorere 1.4-5.

**Yesu wendá mu mbingu**  
(*Mariko 16.19-20; Mikorere 1.9-11*)

**50** Kuruma nampo, Yesu wênda nabo kwihi n'erubungu rwa ku Betania. Nampo wáría emine yae kwiyo n'ikasane bo. **51** Warekia ukiri ukasanengi bo, wasia bo n'itarishwa mu mbingu. **52** Ina ibó bîndama mu makako ae, kuruma nampo bákúruká ku Yerusaremu na ngoa ningi. **53** Babesenga bárikangă mu Numba ya Ongo\* ematu ati nti bamutatange.



*Yesu watayá mu mbingu (24.51)*

## Ebinwa bishasha mu Kinyanga

**Bafarisayo** Ibo kikembe kimă cha Bayuta mbi babesenga bifunsangă nguru emyomba nji yakianga Ongo wáninka Musa. Babesenga bebangă mbu ebea bati bakomenwa imísa emyomba njo. Ina ibó babesenga batáríkangă mu yo ekutime yăbo na nti bahanangă yo ebea. Bingi mubo babesenga bea ba ngari na bea bakwitundurika kuri bampe (Mariko 7.1-13).

**Bahani b'eMyomba** Ibo nge bea imbi babesenga bifunsangă, n'insonsomora, n'ihana emyasi yaandikwa mu bitabo by'eMyomba ya Musa.

**Barawi** Babesenga bea babutwa mu ruanda rwa Rawi, b'ekisasa cha Isiraeri. eBarawi nge babesenga bariangă esanduku y'erirai, na nge baninkwangă hotu emurimo w'erisake ebakuhani mu Numba ya Ongo ku Yerusaremu (Ituka 10.8).

**Basandukayo** Ibo kikembe kimă cha Bayuta mbi babesenga bamisangă ebinwa bya Ongo na nti bahanangă byo ebea. Ina ibó babesenga bebangă mbu kusira ifuka (Ruka 20.27-38). Babesenga bebangă hotu mbu kusira bamaraike abe kikai kiti-kiti nchi kitasungwanga mu meso ebea. Mu Rirai Rishasha, eBafarisayo n'eBasandukayo basungwa buri bea mbi babesenga bengangă ebinwa mbi byabesengă bihanange Yesu.

**Bwami bwa Ongo, Bwami bwa mu mbingu** Ebinwa mbyo byeba kinwa kimă mbu Ongo nge Mwami. Ina bushwa mbu eBayuta babesenga bahangirwa ishemba erina ra Ongo, kicha nge chasingwangă Matayo waandika mbu "eBwami bwa mu mbingu" kură ieba mbu "Bwami bwa Ongo". Ongo ngwasimanire ebiti by'echuo na bya mu mbingu. Ebinwa mbyo byashéa mbu ebwami mbo ngie buri mu chuo itukana n'erieya ra Yesu rae raro hano hansi, n'itukana n'ebyakoranga we (Matayo 12.28; Ruka 7.28; 8.1). Ina ebwami mbo bwashiwa buri kikai nchi kiseyayo mu rotu rwa hende (Mariko 9.1; Ruka 22.30; 1Bakorinto 6.9-10; 15.50).

**Kuhani** Iwe wabesenga mwea íngu wasimanire murimo mu Numba ya Ongo. Wabesenga tuna mwea w'eriria ebihembo mbi byarishiwa n'ebea mu makako a Ongo n'iebere bo.

**Maraika** eRirai ra Karekare n'eRirai Rishasha ashea mbu ebamaraika ng'esantumwa sendangã katura emyasi nji yatúmwá bo na Ongo (Ntangiuro 3.24; Matayo 4.6). Ina eRirai Rishasha rashea tu mbu kurikanga bamaraika ba Mushumbu (Matayo 25.41).

**Masia, Kirisitu** Mu mwebe w'eKieburania, "Masia" ngerieba mbu íngu wamasingurwa mafuta mwironja murimo. Wamubese kuhani abe mwami. Mu mwebe w'eKikiriki, "Masia" wabikirwá mbu "Kristos". Himpo nge habuchiénga erina ra Kirisitu. Ebatahwa bebánga bushwa na rukombora uma ho w'íira. Bebangá mbu wasebseyo wa mu kisasa ch'emwami Ndauti. Wasebeseyo mwami, na iwe ngwasekomborayo Baisiraeri n'ikuruchie bo ebwami bwábó (Isaya 61.1; Ruka 4.16-21).

**Mushumbu** Mu ntangiuro, erina ra Mushumbu rabesenga rininkwanga mwea ngu usongerengi bampe ekumaturubinari. Kuruma nampo, Mushumbu wabikirwá mbu nge mukwakare w'ebifwasi, murenda wa Ongo. Bamubikira hotu mbu mushuanyi, mubí na mukwakare w'echuo kino (Sakaria 3.1-2; Saburi 109.6; Yubu 1.6).

**Mutahwa** Iwe mwea ngu uninkwange myasi na Ongo, ituka mpo nae ntwenda kature yo ebea. Ina mu Bibiria murikire bampe bea mbi babesenga bibikirangã mbu batahwa na nti tibakutúmwá na Ongo (Mikorere 13.6-12).

**Mwana w'eMwea** Yesu wisine wabesenga wibikirange mu rina ndo mwishea mbu nakiro mbu iwe Ongo, ina iwe hotu mwea (Ruka 5.24). Rashea hotu ebunakima bwa Yesu n'ebea imbi beyanga kashukaya we (Ruka 19.10). Wabesenga wibikirange hotu mbu Mwana w'eMwea kongo ebea nensi batasibi mbu iwe nge Masia (Mariko 8.29-33). Erina ndo rashéá hotu erikwihicha rae (Ruka 9.58; Mariko 8.31) n'ebusime bwae hende echuo (Matayo 25.31; Mariko 8.38).

**Mwanafunsi** Iwe mwea ngu umisange muhani mwirukira emahano ae. Mu Rirai ra Karekare, Ongo wabikirwá mbu Muhani (Isaya 54.13). Mu Rirai Rishasha hotu, meta mingi Yesu wabikirwá mbu nge muhani (Matayo 22.16; Ruka 8.24). Ebati mbi barimusimira n'imumisa babikirwá mbu banafunsi (Ruka 14.26-27).

**Ndifai** Iyo mau ngi atunganyiwangã ituka mu byuma by'emuti w'emusabibu.

**Ntumwa** Iwe mwea ngu watúmwa na Yesu. Yesu warondoranga mu banafunsi bae bea ikumi na bábí mbu bêndi bebange mu rina rae. Warondoranga bo mbu bamumise, barukire emahano ae n'itura emwasi w'eBwami bwa Ongó (Mariko 3.13-19). Yesu wakianga wamafuka, esantumwa samusunganga. Na mu rotu rw'ePentekosite, Yesu waninkanga bo emaa eMutima Washurukara. Watúmánga bo kature emwasi mbu bakumusunga ntwamafuka na katura eMwasi Wakonda mu chuo kiti. Kuruma n'erotu rw'ePentekosite, Yesu wásaire Sauri, ngwabikirwa tu mbu Poro, n'imubikira mbu wabesi nae hotu ntumwa yae (1Bakorinto 9.1; Bangaratia 1.1).

**Numba ya Ongó** Iyo yabesenga numba nkiri nji yimbwánga mu rubungu rwa ku Yerusaremu. eBaisiraeri babesenga batingengá yo buri burikí bwa Ongó hano hansi. Mu numba njo, mwabesenga murikanga buarí mbu bwashurukara impi habesenga hakorengá ebakuhani emurimo wábó kira otu. Mwabesenga hotu Buari mbu bwashurukara nguru impi habesenga hakimengá ekuhani mukiri rima mu mwáka, na nti wahátá nchama ya nyama nji yasiburwa n'ebea kuri Ongó bushwa n'erisasirwa esansambi sábó. Habesenga hotu na butara imbu bwabesenga burikangá mo bea bampe.


**Pasaka** Iyo otu ruma mu matu makiri eBayuta. Baisiraeri babesenga barisangá ePasaka mu rikandira mbu bwatukanga bo mu bukobé mu chuo cha ku Misiri (Isubukia 16.1-8). Mu bakirisitu, ePasaka yasubukia erikwa n'erifuka ra Yesu murikombora bo (Ruka 22.1-23).

**Sabato** Iyo nge rotu rw'emeta arinda rwa mu riinga r'ekarandirie k'eBayuta. Erotu ndo rubesenga otu rw'ikandira bwakianga Ongó waruhuka muribúmba ebikai biti. Rubesenga hotu otu rw'iruhuka n'itata Ongó (Ituka 20.8-11). eBayuta babesenga bárikangá na myomba yashéa ebikai imbi byahangiswa ikora mu rotu ndo. Na mu biranga bya Yesu, eBayuta babesenga bakumananangá erotu rw'eSabato mu masinangoki kahema n'isoma eMitiro Yashurukara (Ruka 4.16).

**Samaria** Icho chuo kírí munkati n'echuo cha ku Ngariraya na cha ku Yundea. Bísá ku Samaria babesenga barisiangá ho ebitabo bisanu mbi byaroso bya Musa. Babesenga batarisianga emyomba iti y'eBayuta. Bingi mubo babesenga batabingánga Bayuta. Ebiti mbyo byashéa mbu kwabesenga burenda munkati eBasamaria n'eBayuta. eBayuta babesenga bánénangá eBasamaria na nti batashimanga ikoane nabo (Ruka 10.25-37; Yohana 4.1-42).

**Sinangoki** Iyo yabesenga numba yumbwanga n'eBayuta mu kira ubungu. Kumunda n'enumba njo nge mwabesenga muhemerenga bo Ongo, isoma ekinwa chae, ihubiri n'ihana cho kuri bampe bea.

**PARESITINA**  
**mu matu a**  
**Yesu**



**ENYANSA YA MUNKATI**

**FENISIA**

**NGARIRAYA**

**SAMARIA**

**YUNDEA**

**INDUMEA**

**ITUREA**

**ABIRENE**

**SIRIA**

**TARAKONTI**

**NDEKAPORISI**

**PEREA**

**ENYANSA YEMUKWA**

kunanda echuo  
 ekuraamenga emwishi  
 ekusairenga emwishi  
 kumbo echuo

0 20 40 60  
 biometere